



Digitized by the Internet Archive
in 2014

IOSEPHI BONFADII

D E

CIVILIS ADMINISTRATIONIS
OPTIMA FORMA.

D I S P U T A T I O

Aduersus oppugnantes Aristocratiam.

Præcipuè verò { Ioannem Bodinum.
Guilielmum Barclaium, atq;
Iustum Lipsium.

A D

SERENISSIMUM
LEONARDVM DONATVM
Ducem Venetiarum, &c.



PATAVII, M. DC. XI.
Apud Laurentium Pasquatum.
Superiorum Permissu.

JOSEPH BONFADY

D. E.

CIVIL SERVICE

OFFICE OF THE

COMMISSIONER

OF THE

STATE

OF NEW YORK

ALBANY


1890



JOSEPH BONFADY
ALBANY, N. Y.
1890

SERENISSIMO
SAPIENTISSIMOQUE
PRINCIPI

LEONARDO DONATO
Venetiarum Duci, &c.



Iosephus Bonfadius.



VINAM

*verò de opti
mo genere*

*Prīcipatus
par est ma-*

*gis cognoscere, ac sententiā
ferre, quàm tibi PRIN-
CEPS OPTIME, atque*

SAPIENTISSIME?

qui sicut ingenio plurimum,
ita quoque usu vales, cum
insigni peritia civilium re-
rum, quæ comparatur ex hi-
storia, & philosophia, tum
longa tractatione Reipubli-
cæ diu, multumq; eruditus,
quò ut primum per leges li-
cuit, acriter aggressus, &
perfunctus honoribus maxi-
mis quibusque, ad præcla-
rissimam florentibus exi-
stimationem singularis pru-
dentia, atque integritatis,
ad hunc tandem celsissimū
dignitatis gradum, in quo

maie-

maiestas elucet Reipub. sum-
ma, conscendisti. Hec ta-
men in genere, & maiora,
& illustriora constiterunt
in Rempubl. tua, vel officia,
vel merita, quàm quæ pro-
fecta sunt à Repub. in te cun-
cta ornamenta. Hac enim
virtuti tuæ palam debeban-
tur, neq; verò magis hono-
rifica tibi, quàm ipsi accide-
runt; illa constat non modò
fructum, sed etiam salutem
laborantibus rebus attulif-
se. Profectò si quo alio no-
mine, vel hoc ipso precipuè,
universis ordinibus est exi-

Stimandum præclarissimè ,
atque optimè secum actum ,
quòd sibi diuinitus planè is
Princeps contigerit, qui pu-
blicæ meminerit dignitati,
non ullis priuatis commodis
se se natum , turbulentissi-
misq; temporibus ad clauū
sederet , qui præstantissimi
robur ingenij , atque aucto-
ritatem eo conferendam, con-
uertendamq; sibi existima-
ret, ut tempestates fœdissi-
mas declinaret, & sartam
tectam rempublicam conser-
uaret in pristina sua quiete,
ac tranquillitate . Fructus
igitur

igitur ex te uberes admo-
dū, ac latos, PRÆSTAN-
TISSIME, atque AM-
PLISSIME DUX, Res-
pub. tulit, & in dies feret
uberiores, atque latiores.

Nam ciues Principem suum
susplicere soliti, tanquam lu-
men quoddam sublatum ex
altissima specula, seseque
ad exemplum illius fingere,
& componere, quem præ-
cellere omnino persuasum ha-
bent, tuam incredibilem in
prospiciendis rebus acrimo-
niam, & in gerendis soler-
tiam, atq; alacritatem, iusti

tia pariter, ac pietatis non
minùs tuenda, quàm publi-
cæ maiestatis ardentissimũ
studium cum admirabili vi-
tæ innocentia perpetuò con-
iunctum; hæc, & alia tua de
cora summa contemplantēs,
quorum laudibus ipsa pri-
ma quoque adolescentia,
non modò integra, & corro-
borata isthæc ætas floruit,
ad ea te Auctore, atq; Du-
ce incitati, & erecti, pro se
quisq; in contentione virtu-
tis excellentiùs se gerere,
atq; ita Reip. nauare operã
studebit, ut sibi ad amplissi-
mos

mos honores aspirare liceat.
Sed immortalia tua in Rēp.
merita, & celeberrima præ-
conia virtutis tue, quorum
caussa, vel apud barbaras,
& longinquas nationes im-
mensa, & nunquam inter-
moritura gloria circūfluis,
complecti oratione hac per-
breui non est mihi consilium.
Dabitur, si quidem facul-
tas suppetet, atq; ocium, de
rebus tuis amplissimis di-
cendi opportunus locus. Nā-
que illos convincere statui,
qui precipuas Venetæ Reip.
laudes obscurare, atq; omne
falsis

falsis obtreſtationibus obte-
rere decus, inani quidem illi
conatu, connituntur tamen,
ementiendo, atq; litteris mā-
dando, quæ vel è parum sin-
ceris fontibus hausta sunt,
vel longè ſecus, quā par eſt,
ab ipsis accepta. Veruntamē
huic diſputationi, quam ſum
aggreſſurus, premunienda
exiſtimavi hac pauca in præ-
ſentia, tuoq; nomine, et au-
ſpicijs in vulgus edenda,
quæ de Summa præſtantia
Ariſtocratiae aduerſus è re-
centioribus quosdā ſum elu-
cubratus, qui Ariſtotelice
disci-

discipline, rationi, ac natura tradiderunt haud consentanea, immò pleraq; absurda. Quod si hac mea non ingrata tibi accidisse intelligā, quodq; opto, ac spero, tuo acerrimo iudicio probari; excitabit hoc industriam meā, atq; exacuet acrius, ut opus institutum vigeā, & absol- uā. Te, tuaq; SERENIS- SIME PRINCEPS, Deus consilia fortunet, ac Rempublicam ipsam tuæ fi- dei, ac prudentiæ commissā. Vale. Venetijs M. DC. XI XI. Kal. Martias.

INDEX CAPITVM.

Quid administratio ciuilis, quot ex rebus constet, & in qua sita sit eius vis præcipua. Ut ceteras omnes formas, ita vnius imperium nullo diuino iure sancitum esse. Antiquissimum esse quidem illud, & communissimum omnium, sed ex ijs rebus eidem nihil dignitatis accedere, quidquid notandum, monendumq; duxerit IUSTVS LIPSIVS. Quibus de causis institui cæptæ Respublicæ multis ætatibus, atq; adeò sæculis post regna, per quã optimè ab Arist. explicatum. Quæ contra GVILIELMVS BARCLAIVS obijcit, nullius esse ponderis. De collatione priscorũ temporum cum nostris non longa digressio.

CAPVT PRIMVM.

Ratio Aristocratia instituendæ quænam ex Aristotele. Cõfutatatio eorum, qui docent, optimatum imperium non suapte natura, & simpliciter expetendum, sed vitio, & imbecillitate humanæ naturæ. Quonam modo multiplex sapere dicantur, quam vnus, & longa disputatio aduersus BARCLAIVM, hoc, & alia quædam axiomata frustra conuellentẽ.

CAPVT SECVNDVM.

Cuiusnam

I N D E X

Cuiusnam modi sit idea illius monarchiæ, quam Philosophi magnificè celebrare solent. Ex eo, quòd vnus mundi sit rector, atq; Princeps Deus, captiosè, & fallaciter admodum concludi, magis optandum vnius imperium, quàm plurium. De varia simplicitatis, & gubernationis ratione non pauca. Præstantia ciuilis principatus vndenam existat. Cur habeantur ciues Reipublicæ sui iuris, ac liberi, contra verò serui, qui premuntur regio dominatu. CAPVT TERTIVM.

Iustitiam magis vigere in Aristocratiâ, quàm in Regno, contra quàm IVSTOLIPSIUS visû fuerit monere. Aristotelis locus, vbi expressè hoc tradidit, à BARCLAII calumnijs vendicatus. Quenam ciuilis administrationis labes omnium sit deterrima; Regni ne, an Aristocratiæ, seu Democratiæ. Sententiæ Polybij, D. Thomæ Aquinatis, nec non Aristotelis de optima temperatione simplicium formarum, in quâ tamen Regni tota vis abeat in Remp. Quid sibi velit Aristoteles, vbi statuit, præstare multò legi parere, quàm homini. CAPVT QVARTVM.

Cuiusmodi rerum status apud Hebræos fuerit, antequam Saul primus Rex eligeretur,

C A P I T V M.

tur, allatis auctorum varijs in medium sententijs, vbertim, accuratèq; disputatur: Opinionones duę præcipuè examinantur, altera Caietani, altera Toſtati. D. Thomę ſententia, & Sigonij probatur. Sacrarum litterarum teſtimonio ſuperiore proximo capite tradita confirmantur. CAPVT QVINTVM.

Quinque præcipuę conditiones optimi imperij, & alię quædam cum ijs connexę, atq; implicitę exactè perpenduntur, & examinantur, & non minus Ariſtocratię, quàm Regno conuenire oſtenduntur. Quę contra diſſerunt aduerſarij, cuncta refelluntur. Summa totius diſputationis, atque brevis epilogoſ. CAPVT SEXTVM.



Pag. 19. Non ne nonne. 27. ὑπέμμενον ὑπέ
μενον. 29. dictum dictum. 30 qui primis
qui primus à primis. 39. vigent. Nam, in eadē lineā.
45. exequari exæquari. 46. tum inibi ita inibi.
47. conictu confictu. 62. historiijr. historijs.
68. non pauca præstantia non pauca. Præstantia.
ibid. super ius superius. 69. ἴσε ὤσε.
70. excellentiam excellentia. 73. tunc tunc.
79. incælesti in cælesti. 87. adsciscunt ad-
sciscuntur. 91. horum non item. horum au-
tem non item. 92. Βελτίον; Βελτίωμ.
ibid. ἀπό τελόμενον ἀποτελόμενον.
ib. à melioribus è melioribus 93. possuat vt effu-
gere possunt effugere. ib. ab obcundū ad obcundū
103. ὡσπερ ὡσπερ. III. excœat excœcat
129. in adagio vteri in adagio veteri. ibid. si enim.
princeps is enim princeps. 131. sanxerit sanxerit.
ibid. est amentia cit amentia. 138 adamussim ad
amussim. 144. affert affertur. 148. iam superius
attuli iam inferius afferam; ibid abiecernnt abie-
runt. 153. & cum sequeretur & cum insequeretur.
169. attendebat attendebant. 164. & 165. impune
patrentur impune vt patrentur. 173. humana sunt
omnia humana sint omnia. 186. fabel. ls fabellis.
188. tot, tantibusq; tot, tantisq;

Quidquid aut in orthographia variatum, vt causa
pro causa, aut in interpunctionibus vitiatū, quod
non semel accidit, aliaq; errata id genus animaduer-
tere, atq; emendare si libeat, nulli non licebit.

Ego Marius Mazzolenus Theologus, & in Padua-
no Gymnasio publicus philosophiæ professor, m̃
dato ac nomine admodum R. P. Zachariæ de Ra-
uenna generalis Patauni Inquisitoris legi diligen-
ter præsens opus, de Ciuili administrationis opti-
ma forma, & quoniam insigni eruditione ac doctri-
na pari cum eloquentia coniunctum esse animadu-
ueri, ac propterea studiosis omnibus perutile fu-
turum existimo, dignissimum esse testor, quod ty-
pis mandetur. Dat. Pad. 1610. men. Octob. Die ix.

Stante supradicta fide. Imprimatur.
Mutius Carandinus Vic. Gener.

Qua stante fide Reu. P. Inquisitor
Paduæ concessit imprimendi li-
centiam.

Fr. Zacc. manu propria.

*Imprimatur. Octavius Li-
uelli pro Ser. Rep. Ven.*

1611. xxij. Ian.

Imprimatur, &c.

Blasius Sappius Coad. Pr. sub.

IOSEPHI BONFADII

De Ciuilibus administrationis
optima forma

Aduersus oppugnantes Aristocratiæ

Præcipuè verò IOANNEM BODI-
NVM , GVILIELMVM BAR-
CLAIVM , atq; IVSTVM
LIPSIVM Disputatio.



ETVS, & perdif-
ficilis est ea con-
trouersia , quæ
semper hominū
doctissimorū e-
xercuit ingenia;
inter ciuilibus ad-

ministrationis simplices formas ,
quenam potissimum excellat, & su-

A per

per omnes emineat. Habent quidē singulæ defensores, patronosq; suos; Respublica popularis haud ita multos; multis partibus autem plures Aristocratia; sed omnium plurimos Monarchia, hoc est Regia potestas: ut si rei veritas expetenda, spectandaq; sit ex multitudine testimoniorum, atq; auctoritate, in eam sententiam convenire necesse sit, in quam videmus auctores plurimos, & maximos vel implicatos, vel propensos maximè fuisse. Hoc enim ut validissimum argumentum lib. I. contra Monarchom. vrget nobilissimus, atq; eruditissimus vir Guilielmus Barclaius, quide Regno & Regali potestate scripsit eleganter; Philosophos, Oratores, Poetas, Historicos, atq; etiam ipsos Theologos, & Iuriconsultos in eo consentire, ut inter varias ciuilis administrationis formas præcellere omnino statuant

Monar-

Monarchiam ; proindeq; totius antiquitatis iudicio atq; testimonio certissimum esse de hac re præiudicium factum . Quæ tamen potius magnificè, quàm verè iactantur . Nam ex antiquis nec paucos, nec vulgares philosophos plus Aristocratix, quàm Regno tribuisse constat : in quorum numero (vt ceteros omittam) Aristotelem, & Platonem fuisse persuasissimū habeo, illa duo philosophiæ præclarissima lumina . Deinde vir ille non meminit, quod meminisse oportuerat, Imperatoris Iustiniani prudentiam in eo se agnouisse, & nō exiguis laudibus celebrasse, quod hæc disertè præceperit, & mandaue-rit ijs, quibus negotium dedisset Pā-
dectas conficiendi . *Sed neq; ex multitudi-
ne auctorum, quod melius, & æ-
quius est, indicatore ; cum possit forsi-
tan deterioris sententia & multos, &
maiores in aliqua parte superare .*

Ex hac enim auctoritate probare cōtendit, non facilè in eam ſententiam concedendum eſſe, quæ plurimorū aſſenſu comprobetur . Hoc autem in philoſophia maximè verum eſt, ſi quo in alio genere. Nam quicūq; rectè philoſophari, ſolidèque inſtituunt, eos non tantùm quid alij dixerint, atq; verum duxerint, ſed qua ratione duxerint pariter, & dixerint, oportet inueſtigare, ac exactè conſequi, animoq; planè libero ſtudio ſuum nauare, vt tandem pateat, quid verum, & quid falſum ſit, non minùs etati ſuæ, quam poſteritati . Fecit ea cogitatio nitens ratione, vt rem, quæ eſſet in manu, dijudicare noluerim ex alieno potius, quàm ex meo ſenſu: ideoq; argumenta conquiſita vndiq; collegi, & collata in vnum probè cuncta examinaui, vt intelligerem, quid, & quantum haberent momenti, vniuerſorum Monarchiæ

narchiæ primas deferentium; qui tamen omnes non sentiunt eadem, neque probant. Nam quidam vnā præconijs hanc in cælum ferunt, reliquas formas deprimunt, & prorsus abijciunt, vt alienas à natura, nō ignobiles modo. Nonnulli vero distinguentes rem hoc modo tēperant: absolutè, simpliciter, & suapte natura vnius administrationem præstantia excellere; vitio tamen atq; hominum culpa fieri, vt expediat minus vni, quam pluribus rerum summam committere. Quapropter non ipsius naturæ causa, & ratione, sed humanę duntaxat imbecillitatis, vti le videri, vt sit permixta, & coniuncta cum Regio statu quædā species, & forma Aristocratix. Nam, quæcunq; sunt necessaria optimæ Reip: multò facilius in pluribus inueniri, quàm vno; quandoquidem summus omnium rerum moderator Deus a-

lijs alia ornamenta, muneraq; elargitus est, quæ si ad communem usum Reipub: pariter conferantur, ex omnibus absolutissimum quid confuari queat. Hic locus ex Arist. videtur expressus, apud quem lib. tertio Polit. leguntur hæc verba.

Τοὺς γὰρ πολλοὺς, ὧν ἕκασός ἐστιν οὐ σπουδαῖος ἀνὴρ, ὅμως ἐνδέχεται συνελθόντας εἶναι βελτίους ἐκείνων, οὐχ ὡς ἕκαστον, ἀλλ' ὡς σύμπαντας, ὅτιον τὰ συμφορητὰ δεῖπνα τ' ἐκ μιᾶς διαπάτης χορηγῇ δέντων. πολλῶν γὰρ ὄντων, ἕκαστον μόνιον ἔχειν ἀρετῇ, καὶ φρονήσεως, καὶ γίνεσθαι συνελθόντας ὥσπερ ἓνα αἰθρῶπον τὸ πλεῆθος, πολὺ ποδῶν, καὶ πολὺ χεῖρα, πολλὰς ἔχοντα αἰδήσεις, οὕτω καὶ πρὸς τὰ ἤθη, ὅτι τὴν δίκαιοιαν. Quæ Latinè id sonant.

Fieri potest, ut multi, quorum singuli non sunt viri boni, ubi tamen omnes conuenerint, paucis optimis antecellant, non ut singuli, sed ut uniuersi, quemadmodum sunt meliores illa cæna

na, quæ suppeditantur è plurium symbolis, quàm quæ vnius sumptu. Nam ubi multi sunt, insidere unicuiq; particulam ciuilibus virtutis, & prudentiæ, atq; adeò multitudinem in vnum locū congregatam instar vnius hominis esse, qui multis pedibus, atq; manibus sit instructus, necnon multis sensibus, & hac ratione polleat maioribus cū animi, tū ingenij viribus. Huc etiam celeberrimum illud apophthegma, quod à Federico Vrbinate præstantissimo ac fortissimo Duce profectū memoratur, quidam retulerunt: *Nullum caput in terris esse maiori sapientia cumulatum, quàm S E N A T V M V E N E T V M.* Dicunt igitur hoc vnum argumentum, magis optandam videri aliquam formam Reip:, quàm simplicem Monarchiā, persuadere posse; quod plena, & omnibus numeris absoluta virtus in vno tantum homine reperiri nō pos-

fit: hoc tamen non alicuius præstantiæ, & nobilitatis, sed potius imbecillitatis humanę documento esse. Disputant quidem non improbabiler illi, qui ita sentiunt. Nam qui perniciosas omninò Respublicas putant, hos planè desipere, atq; furere persuasissimum habeo. Verumtamen argumenta non desunt, rationesq; grauissimę, quibus euidentissimè demonstrari potest, Aristocratiam Monarchiæ præferendam esse, non solum usu quodam, atq; utilitate, sed naturæ præstantia, & nobilitate; vitioq; humanę naturæ imprudenter adscribi, quod eius dignitati omninò tribuendum. Vendicemus ergo rem ipsam à calumnijs hominum, & euellamus ex animis, si fieri potest, tam inhærentem opinionem, penitusq; insitam. Atque vt in arcē controuersię acrius inuadamus, aditus omnes erunt
ante

ante muniendi, & si qua occurrunt obstructa, patefacienda, quoad pedetentim, & gradatim eò perueniamus. Ne quis tamen, quæ dicenda sunt, ea secus accipiat, quàm consentaneum meæ voluntati, ac propositæ rei; illud hoc loco præmonendū necessariò duxi, non de alia gubernatione, siue Principatu, quàm qui Ciuilis appellatur, agere me aggressum; sacrum attingere nulla ex parte instituisse. Nam me non fugit, sacrarum, & ciuiliū rerum ita disiunctam, & diuersam rationem esse, vt quæ proprie cadunt in alteram, alteri adaptare sine argumentationis vitio manifesto non liceat: quinimò ita naturam vtriusq; comparatam existimo (quod quidem ex ijs, quæ disputabuntur infrà, colligetur facile) vt, cum in administratione ciuili præstet Aristocratia; contrà præcellere in Sacra Monarchiam oporteat.

porteat. Nam quæ societas in vnũ, atque idem corpus res ita dispares cogit, atq; coagmentat, & suprema cū infimis, cum terrenis cælestia, humanaq; cum diuinis sociat, & coniungit; huic societati, ad exemplar illud institutę, quo cuncta rerum vniuersitas à Deo gubernatur, forma illa gubernationis apta esse non potest, quæ res vnius nature duntaxat complectitur, fluxæq; mortalitatis conditione, ad omnes vicissitudines pariter obiectas. Sed hæc omnia patebunt satis euidenter, vbi proposita fuerint, atq; inspecta probè præcipua causæ nostræ robora, atq; fundamenta, quę iacere, atq; constituere tempus est iam aggredi.

*Quid*

Quid administratio civilis, quot ex rebus constet, & in qua sita sit eius vis præcipua. Ut ceteras omnes formas, ita unius imperium nullo diuino iure sancitum esse. Antiquissimum esse quidem illud, & communissimum omnium, sed ex ijs rebus eidem nihil dignitatis accedere, quidquid notandum, monendumq; duxerit IVSTVS LIPSIVS. Quibus de causis institui cæptæ Respublicæ multis ætatibus, atq; adeo sæculis post regna, per quæ optimè ab Arist. explicatum. Quæ contra GVILIELMVS BARCLAVS obijcit, nullius esse ponderis. De collatione præcorum temporum cum nostris non longa digressio.

CAPVT PRIMVM.

QVæ Latinè administratio civilis appellari solet, ea Græcè vsitato vocabulo πολιτεία dicitur, quo tametsi non numquam Respublica popularis præcipuè notari, ac designari consuevit ab ijs, qui Democratix nomen auersati sunt, tanquam vitio, quàm laudi aliquan-

tò propius ; tamen propriè non certum quoddam singulare, sed genus vniuersum complectitur administrationis. Deducitur autem ἀπὸ τοῦ πόλεως, hoc est à ciuitate, qua ciuiles conuentus, atq; societates cum primis contineri perspicuum est, non autem modicis vicis, atque pagis. Quæ caula fuit Aristoteli, breui ea descriptione, quàm lib. 3. Polit: initio proposuit, de Ciuitate mentionē faciendi, cum ait. πολιτεία τὴ πλὴν πόλις οἰκόντων ὅσι τάξις τις. *Politia est ordo quidam inter eos, qui colunt ciuitatem.* Duo sunt pariter obseruanda, quidnam sibi velint; cūm ordo, tūm qui colunt ciuitatem. Ordinis autem tota vis in eo sita est, vt alij subijciantur, alij præsint: illi ἀρχόμενοι imperio parentes, hi vero ἀρχοντες imperantes à Græcis dicuntur. Hoc inter personarum genus vtrumq; , licet appareat manifestò tantum

tantum interesse, quantò agere, mouere, ac dirigere præstantius habetur, quàm dirigi, moueri, atque ab alio perpeti; nihilominus hæc si nō gradu, atq; dignitate, numero certè, atq; loco eodem censentur: quandoquidem, & ad Ciuitatem æquè necessario pertinent, & ea ratione præterea sunt inter sese affecta, vt existant simul natura pariter, ac tempore, iuxta naturam eorum, quæ dicuntur πρὸς τι idest *ad aliquid*. Veruntamen ab vtro genere magis pendeat gubernatio ciuilis, controuerti solet. Fuerunt, qui arbitrarentur à gubernante; quod ab eo gubernatio dicitur, totaq; ipso nititur: Contra sunt, qui eiusdem vim referendam eò censent, quò tendere natura conspicitur, ad suum nempe terminum, quem statuunt esse multitudinem, quæ gubernatur. Sed vt omnis controuersia de medio tollatur, hoc modo

do gubernatio erit distinguenda .
 Nam quædā imperantis vsum, atq;
 cōmodum, primò, præcipuè, ac per
 se spectare dicitur ; eius autem , qui
 pareat, non nisi fortuitò, aut certè se
 cundum illud, quod potissimum dū-
 cit : atq; hoc genus *δεσποζικόν* a
 Græcis vocatur, à quibusdam heri-
 le imperium Latinè fuit dictum, sed
 Cicero appellare solet Dominatum.
 Alterum verò genus, Ciuile nomina-
 tur, & à Græcis *πολιτικόν*, eadem
 notione ; quòd suapte natura, & vi
 propria ad publicum bonum, non ad
 priuatum commodum vllum est cō-
 positum. Vtrumque genus admini-
 strationis negari non potest, quin
 inde magis pendere necessariò de-
 beat, vnde rationem præcipuā, atq;
 propriam sumit. Sed à ciuili com-
 munionē procul illud ablegandum,
 quod non est liberorum hominum,
 sed Mancipiorum. Relinquitur ergò
 ciuile,

ciuile, de quo sermo nobis, eoque non adulterino, neq; vitiatum, reijciendo ad impotentissimum dominatum; sed legitimum, ac sincerum nobis est propositum, quod à ciuili multitudine, cuius ergò institutum, cum nomen ipsum, tum vim suam atq; id omne sortitur, per quod determinatur ab aduerso genere. Qui verò tempus quoddam fuisse persuasum habent, quo per montes, ac syluas ferarū more dispersi, dissipatiq; homines vagarentur, habent rationem ad comprobandum id peculiarem; nonnumquam sine ciuili gubernatione multitudinem consistere potuisse: cum tamen coetibus hominum de medio sublatis, & à gubernanda multitudine gubernatio seiuncta ne momento quidem vlllo temporis existat. Veruntamen quia vix habent fidem in præsentia, quæ de hominum victu ferino sunt à priscis tradita

tradita, & certa in primis est ratio, qua Philosophus probat, cum natura sit homo ciuile, atque sociabile animal, naturæ vi quadam propria duci, immo impetu ferri ad cōmunicandum cum alijs, hoc est ad vitam ciuilem: Principio rerum videtur necessarium fuisse, vt homines cōuenirent in vnum locum, vnde statim coaluerint coetus, & concilia; multitudo verò quælibet in vnum coacta, vt commoda vitæ ciuilis adipisceretur, certa quadam ratione ordinanda erat, vt alij facerēt imperata, alij verò imperarent. Atque hæc ciuilis administrationis primordia extiterunt, non alia ex causa comparatæ, atque constitutæ, nisi regendæ multitudinis, quò tota refertur. Nihil igitur attinet disquirere fuerint nec ne homines vnquã sine vllis imperijs, hoc est gubernatione ciuili prorsus destituti. Satis est

est, hanc hominum causa, neque alterius præterea; homines autem illius causa, nequaquam existere, ad rem propositam declarandam, & stabilendam; à multitudine scilicet, quæ regitur, administrationem ciuilem totam suam vim sumere. Quod obseruare, atque meminisse eò diligentius oportet, quò grauiora supeditabit argumenta nobis ad statuendam præstantiam Aristocratice. Gubernatio verò ipsa generatim, nimirum summa potestas, supremaq; auctoritas ad continendam multitudinem in officio, non ex alio fonte manauit, quam ab ipsa natura, immò verò ab auctore naturæ Deo: sed singulæ gubernationis formæ qualescumque, siue optimatum, siue populi principatus, siue Regis vnus imperium, quam Monarchiam vocant, variarum gentium diuerso iure constitutæ, planeq; inuenta homi-

B num

num ex hac parte sunt: neq; hoc audebunt negare, satis certò scio, vel acerrimi propugnatores quique regiae potestatis. Enim verò quod aperte aggredi, rectaq; non possunt, hoc quibusdam cuniculis moliri nō cessant, vt in arce summa diuinæ auctoritatis defigant imprudentib. nobis signa quasi illata, in efferēdo, proferēdoq; sūmo vnus imperio, ultra quā res, veritasq. sustinet, nimis obfirmati. Laudant enim D. Ioannem Chrysostomum Hom. 34. in Epist. i. ad Cor. cap. 13. ita differentem. Ab vno tantum homine, Dei iussu vniuersum genus humanum editum, atq; procreatum, vt non democratia vigeret, sed regnum. Neq; tamen acutissimi homines animaduertunt, si qua esset vis argumento, illud ex eo consequi; vti constat vnum hominem cūctos procreasse, ita opus esse, atq; id ex diuino

præ-

præscripto, vt simul omnibus hominibus, terrarumq; orbi vnus Dominus, atq; Princeps tantum imperaret, contra quàm fieri videmus, atq; factum legimus in omnium seculorū etatib. oīq; memoria. Nam quo tempore traditum fuit, aut in quibus annalibus, in vnius hominis ditionem, atq; potestatem concessisse pariter vniuersa imperia, atq; regna? Non ne singulę propè Vrbes, nedum nationes, suos vel Reges, vel Principes initio habuerunt? Ergò ne auctoritas diuina fuit perpetuò frustrata? Cur autem Deus, & Dominus noster Iesus Christus, qui restituit in integrum tam multa, quę corrupta fuerant, & ad institutionem diuinam cuncta reuocauit, ciuili quoq; societati hoc remedium non attulit, vt uni summā traderet omnium rerum, atque omne Rerump. nomē prorsus aboleret, vbiq;

restituta Monarchia ex antiquo præscripto? Qui verò proferunt illud ex diuinis oraculis Prou. cap. 28. *propter peccata terræ multi Principes eius: vt ostendant hominum peccata causam attulisse, cur ortæ fuerint alioqui numquam futuræ, neque inter homines habituræ locum, nomenq; Respublicę; hi certè aut suam imperitiam produnt, aut fucum faciunt. Si quidē proxima verba statim declarant, in quam sententiam Rex id sapiētissimus dixerit. Subijcit enim: & propter hominis sapientiam, & horum scientiam, quæ dicuntur, vita ducis longior erit. Magnæ rerum vicissitudines, id quod omnes norunt, perturbationesque innumeræ oriri solent, & non numquam conuersiones imperiorum ex assidua, & frequenti regū mutatione, peracerbōq; ac immaturo Principum interitu. Vt autem non nisi prouecta*
etate

etate illi moriantur, permagni hoc interest ad populorum tranquillitatem; quam quidem ob immensa flagitia, & immania scelera interturbatum iri Deus interminatur. Quid hoc facit contra Respublicas? an non potius arguit, eas efficere perquam tranquillos, & felices populos, quatenus immortalitatis quandam speciem gerunt; ideoq; diuini cuiusdam muneris loco iure habendas? Quemadmodum ergò, & perperam, & preposterè admodum hoc ex diuinis litteris testimonium afferatur: sic etiam illa coniectura est inanis, & planè fallax, ex omnium hominum procreatione ab vno petita; quatenus arguit à Rebuspub. aliena Deum, in regna verò quam propèssissima voluntate, non tantum exemplum aliquod Monarchiæ statuisse (quandoquidem statuit etiam Aristocratiæ) sed præcipuè mandasse.

atq; præscripsisse, ut vni ubiq. deferretur imperium, non pluribus.

Neq; D. Ioannem Chrysostomum ferio id puto sensisse; verum seruisse temporì, ac necessitati, quò plebē illam seditiosissimam, atque insolentissimam contineret in obsequio, & fide erga imperatorem, ornando, augendoq; plurimum oratorio more, quod genus tūm vigeret administrationis. Ita q; maneat illud, quod fuit antea dictum, neque Monarchiam, neque formam aliam Principatus initio rerum à Deo constitutam fuisse. Quænam verò ex his omnibus antiquissima fuit, & priscis illis temporibus primum vsurpata? Equidem dominatio Régia. nam quis ambigat? Id apertissimis verbis tradit Aristoteles. libr. Polit. 1. *Διὸ καὶ τὸ πρῶτον ἐβασιλεύοντο αἱ πόλεις, καὶ νῦν ἔτι τὰ ἔθνη.*

Principio regebantur à Regibus ciuitates,

tates, & adhuc his temporibus gentes.
Sic etiam Marcus Tullius libr. 4. de
legibus ex Platone ait. *Omnes anti-*
quæ gentes regib. quondam paruerunt.
Iustinus autem suam Epitomen in-
choat his verbis. *Principio gentium,*
nationumq; imperia penes reges erant.
Monarchiæ porro forma non aliun-
de, quam ex administratione fami-
liarum tota sumpta est. Nam qui
præcedebat ætate, vt docent Philo-
sophi, is vniuersæ familiæ præerat
de more, qui deinde processit pari-
ter ad vicos, & paulatim peruenit
quoq; ad ciuitates, vnde Regna
maiora tandem ortum habuerunt.
Triplex equidem forma, seu ratio
gubernationis agnoscitur in familia
qualibet ab Aristotele libr. 8. Ethic.
capit. 10. & libr. 1. Polit. *δεσποτική*,
inter dominum, atq; seruos; *τεκνο-*
ποικτική inter patrem, & eius libe-
ros; *γαμική*, inter virum, & vxorē:

Sed quia postrema duntaxat ex his tribus habet significationem Reipublicę, siue Politicę, ceterę verò spectant omnes ad Monarchiam, ideò Philosophus ad eas reiecit potissimū administrationē familię, siue οἰκονομίας, quam separare videtur à Politia, & distinguere planè tanquam rem diuersā: ait enim. μοναρχεῖται πᾶς οἶκος. *Cuncta domus vnius imperio gubernatur.* Sed quamuis domos atque familias intuentibus ea species administrationis præcipuè occurrat, quę ad vnius imperium, atq; nutum vniuersa refert; si quis tamen penitus duxerit introspicendum id, quod longa inuestigatione non eget, animaduertere poterit, ex maris, atq; feminę legitima coniunctione, auctore Deo primum sancta, nec non celebrata, licuisse non minus vtiliter exemplum Reipublicę, quam Monarchię ex alijs coniun-

ctio-

ctionibus capere, vel parentis & liberorum, vel domini, ac serui; quarum alteram ductam ab illa omniū principe, alteram vtriusq; causa institutam nouimus. Veruntamen quod priscis illis temporibus, rudiq; adhuc sæculo, vbi primum Ciuitates frequentari sunt coeptę, deprõpta fuerit ex familijs ratio Monarchiæ, quæ videbatur magis expedita, & proposita ante oculos; hoc certè nihil habere potest nec præstantiæ, nec laudis, quin potius nescio quid imperfecti continet, atq; arguit. Nam semper à rudioribus inchoatum esse, & impolita principiò cuncta generari, quæ deinde procedente simul opere, atque tempore paulatim expoliantur, atq; elaborentur, donec absoluta reddantur, & omnino integra, quis, obsecro, quamuis ignarus ignorare potest? Ab ortu mundi rudes homines adhuc

huc erant ; nondum inuentis tot artibus atq; disciplinis, quibus exculti postea sumus ad humanitatem, paucissimi præstabant ingenio, atq; sapientia. Hæc attulerunt necessitatē, nō modo causam, vt gubernacula ciuitatum vni traderentur . Cum autē generosissimi, & sapientissimi viri, quorum copia, & vbertas plurima se effuderat, in ciuitatibus non amplius desideraretur, adhibita industria, curaq; ut cetera omnia, sic etiā forma ciuilis administrationis exposita, & ad eam rationem postmodū fuit perducta, quæ maximè decet excellentem hominum naturam . Hæc totidem fere verbis expressa sunt ab Aristotele libr. III. Politicor.

ὡς διὰ τῶτ' ἴσως ἐβασιλεύοντο πρό-
τερον, ὅτι σπάνιον ἦν εὐρεῖν ἀνδρας
πολὺ διαφέροντας κατ' ἀρετὴν, ἄλ-
λως τε καὶ τότε μικρὰς οἰκῶντας πό-
λεις· ἐτι δ' ἀπ' εὐεργεσίας καθίστασαν
τοὺς

τοὺς βασιλεῖς, ὅπερ ἐστὶν ἔργον τῶ ἀγα-
θῶν ἀνδρῶν. ἐπεὶ δὲ συνεβαλε γί-
γνεσθαι πολλοὺς ὁμοίους πρὸς ἀρετῇ,
ὃ καὶ ἐτι ὑπέμμενον, ἀλλ' ἐζήτουρ κοινόν
τι, καὶ πολιτείαρ καθίσασαυ.

*Et propterea fortasse Regibus antea
parebant, quod homines multum præ-
stantes virtute rari inueniebantur;
cum præsertim habitaretur tunc in par-
uis opidis. Ad hæc autem reges consti-
tuerunt acceptorum beneficiorum me-
mores, & grati, quod certè fuit eorum
magnæ probitatis. Posteaquam verò
contigit, ut inuenirentur equali, simi-
liq; virtute multiviri præditi, non am-
plius certè reges sustinebant, sed com-
mune quiddam scrutati instituerunt.*
*Resp: Potestnè hoc Aristotelis testi-
monio quidquā clarius esse? Quod
homines initio regibus paruerint,
causæ duæ memorantur. Prima vi-
rorum excellentium maxima penū-
ria; proxima verò quædam gratia-
nimi*

nimi virtus, qua benè de Rep. meritos remunerabantur. Sunt, qui tertiam præterea causam addiderunt, nempe ab oppressa potentiorum viribus multitudine in tutelam, atque præsidium Reges exoptatos. Quam certè causam Barclaius lib. i. contra Monarch. ita probat, vt multò potiore ducat, quàm ceteras omnes; atque inde duo colligit. Alterum, ad cauendum consilij, ad agendum auctoritatis plus in vno homine, quàm in turba, vniuersoq. populo fuisse: Alterum, cum multò magis sit hoc tempore plebs obnoxia iniurijs, quàm olim, cum sese in Regū clientelam, & præsidium contulit; ex eo quòd audacia nobilium, & potentiorum cum opulentia & auctoritate adeo fuerit aucta, vt ad immanitatem peruenerit, & inhumanitatem: manere adhuc eādem necessitatem, & si vnquam aliàs, hac tempestate

pestate vniuersis populis Monarchiā
maxime expetendam . Hæc à Bar-
claio dicta, videntur eam quæstionē
habere ; Vtrum nequitię, violentię,
atq; rapinarum plus ferat hæc ætas
nostra, quàm superiores . Sed pro-
fectò qui vetera multū laudant, atq;
adeò suspiciunt, nostra verò tempo-
ra improbant, immo detestantur,
ostendūt hi sese annales nullos euol-
uisse, veteraque monumenta nulla
inuestigasse . Quod enim homines
initio belluarum instar in syluis, &
montibus errasse commemorantur,
quamuis ita planè non fuerit, vt su-
perius admonui, & καθ' ὑπερβολήν
τινα *per Hyperbolem quandam* di-
ictum fuerit ; indicat tamen priscos
illos homines belluino magis, quàm
humano ritu ætatem egisse, quod
apertissimè testatū reliquit Thucy-
dides auctor grauissimus, atq; fide-
lissimus de suis Græcis, cum perhi-
bet

bet eos latronum more grassantes non multò ante bellum Troianum cedes vulgò facere, piraticamque exercere solitos fuisse. Quam verò fuerint antiquissimis temporib. homines facinorosi, formidolosi, atq; truculenti, ex eo certam coniecturā facere possumus, quod parricidio fraterno se inquinavit is, qui primis parentibus fuit in lucem editus, & accitis vndiq; latrociniorum, ac nequitiae socijs, dux, & magister illis ad omne facinus extirrit, quod Iosephus in suis antiquitatibus lib. I. capit. II. memoriae prodidit. Ingentia verò flagitia, quibus Deus offensus vniuersum terrarum orbem aquis obrutum perdidit, satis arguunt nihilo meliores priscis etatibus, quàm hac ipsa, in qua degimus, mortales fuisse; quinimmò longe deteriores, atq; nequiores. Equidem recta educatio, atq; disciplina, quibus homines

con-

conformati sunt ad humanitatem, in
ciuilem communionem, & vitam
multa contulerunt, effeceruntq; ut
temperantia, moderatio, & pruden-
tia, nō minus quā opulētia, & po-
tentia incrementi caperet. Quapro-
pter si qua necessitas multitudinem
impulit, vt ad vnius Regis præsidiū,
tutelamq; confugeret, quo tempore
se se diripere, atq; trucidare, ferarūq;
more homines viuere solebant; ea
profectò in præsentia nihil vrget am-
plius, cum exulta tantoperè sit hu-
mana vita, sublataque impunitas
grassandi in liberos homines: aut
certè quod eadem necessitas ab inui-
tis expressit, consequens est, ut neq;
voluntarium dicatur, neque satis
congruens naturæ, cum sit violentū:
stabile certè non fuerit, neq; diutur-
num; quod à vitio, non à virtute suā
originem ducat. Hæc omnia neces-
sariò fateri coguntur illi, qui, nisi

maleficia, & iniuriæ multæ intercessissent, nihil umquam de Rege putant cogitandum fuisse. Nonne autem maleficiorum tantò minus extitisset, quantò plures homines fuissent excellentes, ac probi? Iure igitur Aristoteles in horum penuriam Monarchiæ primum institutę causã omnem contulit, ex qua pendet hæc etiam uti apta, & connexa, quam Barclaius existimat, sed falsò, potiorẽ esse. Ut cunq; se res habeat (nãq; id parui refert) summa nostrę conclusionis hæc ipsa fuerit. Antiquitatem regię administrationis nihil illi conferre prorsus ad dignitatem. Quo fit, ut argumenti loco eam rem vsurpasse cum doctrina excellenti complures viros, tum Iustum Lipsium Mon. Pol. lib. II. cap. I. in primis ob eam rem admirer, quòd sicut prudentissimi imperatores, ut copias suas firment, in acie prima fortissimum

mum quemq; collocare solent: sic
 etiam ipse id primo loco statuendū,
 obijciendumq; vt omnium validis-
 simum duxerit, *Vnius imperium om-
 nium antiquissimum*. Cui proximè
 alterum adiungit: *Etiam communis-
 simum esse*. Quasi res præstantissimæ,
 vulgares sint adeò, vt omnibus expo-
 sitæ pateant, faciles, atq; obuię, ne-
 que vlllo pacto sit verum illud Arist.
 lib. I. Rhet. Axioma. ὁ χαλεπώτε-
 ρος, καὶ ὁ σπανιώτερος, μείζων. *Quò-
 dā inuentu difficilius, & rarius, hoc
 etiam præstantius*. Certè liberæ gen-
 tes, atque ciuitates semper admira-
 tionis multum habuerunt, quod nu-
 mero non essent admodum frequen-
 ti; neq; vbilibet illorum copia inue-
 niri posset, quos Aristoteles appellat,
 ἄνδρας πολὺ διαφέροντας κατ' ἀρε-
 τὴν. *Homines multum præstantes,
 atque excellentes virtute; & ἄνδρας
 πολλοὺς ὁμοίους πρὸς ἀρετὴν*. *Homi-
 nes*

nes plures, æquali virtute præditos.
 Hæc autem verba quid sibi velint,
 & quam vim habeant, operæpretiū
 fuerit explicare vberius. Siquidem
 hæc explicatio præcipua capita con-
 tineret, quibus hæc expediri contro-
 uersia valeat.

*Ratio Aristocratia instituendæ quæ
 ex Aristotele. Confutatio eorum, qui do-
 cent, optimatum imperium, non suapte na-
 tura, & simpliciter expetendum, sed vitio,
 & imbecillitate humanæ naturæ. Quonam
 modo multi plus sapere dicantur, quàm vnus;
 & longa disputatio contra P. ARCLAIUM
 hoc, & alia quædam Axiomata frustra con-
 uellentem.*

CAPUT SECVNDVM.

VErum tamen illud necessariò præ-
 monendum existimo, neq; Ari-
 stoteli, neq; vlli sanæ mentis homi-
 ni, vt regnorum status labefactet,
 propositum esse. Si quis enim popu-
 lis auctor esse velit, Aristocratia quã
 uis

uis præstantissimæ causa instituendæ,
vt legitimos reges extrudant, aut in
ordinem cogant, se pariter, atq; illos
obligarit multiplici crimine; iniqui-
tatis, cum qua fraudatio coniuncta;
stragium, non modò cædium, quæ
fiunt ciuilibus bellis; quodq; om-
nium maximè detestabile, impieta-
tis in Deum, vnde legitima potestas
cuiusmodicumque. Ergo quemad-
modum ciues tenuiores, quò para-
tiores euadant à rebus domesticis, in
locupletiorum fortunas non licet in-
uadere: ita qui ius omne iampridem
renunciarunt, & ea ratione transfu-
lerunt imperium in vnum, vt sem-
per hæreditario iure transmitteretur
ad posteros, in eo regimine debent
omnes acquiescere, quod assensu, &
comprobatione maiorum olim sta-
bilitum sine perfidia, & latrocinio
conturbari non potest; multòq; an-
tiquius habere pacis, & iustitiæ ruen-

de, quàm decoris intempestiuum cōparandi studium . Quibus autem populis omnia manent integra, nullius imperio stabili, ac fixo mancipatis; his nihil esse potest vlllo impedimento, quo minus ita statuant de rebus publicis, quemadmodum tradit Aristoteles, immo ratio veriùs ex ipsis naturæ fontibus deriuata, & hausta . Vitæ ciuilis humanæq; societatis finis, qui propositus debet esse cunctis ciuitatibus, vt philosophia cum moralis, tum ciuilis egregie demonstrat, felicitas est quædam, non in contemplando, sed in agendo sita, atq; collocata, secundum optimam rationem, quæ dicitur, Practicæ virtutis, nimirum prudentiæ, quæ viuendi est egregia magistra, ceterarumq; virtutum omnium, moderatrix . Nam scitè, rectè, ac verè admodum Chæremon, ὁ γὰρ φρονῶν ἐν πάντα συλλαβῶν ἔχει . *Vir enim*

prudens continet, & comprehendit omnia & præclare Salomon Regum lib. III. cap. III. vbi tractare prinũ cœpit regni gubernacula, facta sibi à Deo potestate facilè impetrandi, quidquid sibi maximè collibitum, atq; gratũ foret, hac se virtute tantũ modo augeri petijt, cuius adminiculo benè, tutòq; imperaret. Id verò Sapientiæ diuinæ tantopere placuit, vt Salomonem hoc nomine commẽdarit plurimum, donatumq; prudentia quadam summa, & singulari, ceteris etiam facultatibus copiosè instruxerit; quæ vbi pariter omnes suppetunt, & confluunt, efficiunt plenã, cumulatamq; felicitatem. Nã quò maiora, & plura sunt adiumenta cõsequendi finem, quis nesciat eò facilius, atque expeditius fore ad ipsum iter? Quamobrem in eo, qui Principatum gerat, etiam Aristoteles, nò solum prudentiam desiderat, aliasq;

virtutes, sed ubi fieri potest, etiam illa bona, quæ corporis, aut fortunæ communiter appellari solent, cuiusmodi sunt diuitiæ, gratia, pulchritudo, robur. Quia tamen vix vnquã fieri potest, vt hæc tot, tantaque in vnum pariter conueniant; homo autem maximè est homo non ratione corporis, sed propter insitã vim mentis, atq; consilij; idcirco statuit in tribuendo Principatu præ ceteris omnibus hoc vnum spectari oportere, vt præsent ij, qui prudentia plurimum excellant: quam prudentiam non semel politicam virtutem, nonnunquam etiam *ἡ ἀρετὴ ἐξ ὁλότητος*, idest *per excellentiam quandam simpliciter appellat Virtutem*, propterea quod in ciuili administratione ad hanc vnã ceteræ omnes referuntur. Expedire autem plurimum dubitari non potest, & cum rationi, tum naturæ quoq; ipsi consentaneum fore,

re, vt qui propter animi remissionē, aut imbecillitatem seipſos, ne dum alios, vt par eſt, gubernare nequeūt, obſequantur, & pareant ijs, qui prudentia vigent.

Nam licet humanæ præſtantiæ dignitas communis ſit omnibus; eademq; mentis facultas à natura tributa; hæc tamen vbi expedita, proutq; non reperit, quæ dici ſolent agendi ſubſidia, & instrumenta, quod ſecus atq; oporteat, conſtituta ſint, hebetatur animi præclara vis, & quodammodo languet, vt obire, & præſtare ſua munera tantò minus valeat, quantò deterius à contagione corporis afficitur, & opportunis auxilijs magis deſtituitur. Quanquam non ſolumabilitas, & propenſio à natura indita, ſed etiam alia duo per magni momenti, nimirum diſciplina, & exercitatio (his enim prudentia excolitur, atq; comparatur) illā

inter homines pariunt, quam miramur, ingenij dissimilitudinem, ac diuersitatem. Hinc Aristoteles Platonem meritò arguebat, quòd honorum pariter, vt omnium ceterarum rerum, perniciosissimam communionem, & æqualitatem in suam Rempubicam inducere conabatur. Nam ex eo, quòd naturæ sunt similis vniuersi homines, non omninò similes, atque pares sunt existimandi, neq; spectari debet capitorum numerus, sed præstantia, & dignitas, vt ornamenta publica decentissimè distribuuntur, hoc est imperia, Magistratus, & honores cuncti: proptereaque Philosophi prædicare solent, ea non iuxta proportionem Arithmeticam singulis hominibus, sed præstantissimis tribuenda iuxta Geometricam. Sed quam re præstantissimis, & præcellentissimis? non opibus

bus, atq; censu maximo, non splendore generis, non robore, ac fortitudine, & id genus alijs, quæ minùs attingunt excellentem hominis naturam; verùm ea re, quæ maximè ad publicum bonum, & ad humanę societatis finem quàm proximè accedit, vitæ ciuilibis origo, atq; forma, nempe ipsa prudentia. Præterea tamen id quoq; necessariò exigitur, sine quo prudentia esset inutilis, manca, & imperfecta. Vocat hoc Aristot.

δύναμιν τὴν πρακτικὴν τῆ ἀρίστων.

Vim, aut facultatem effectricem rerũ optimarum, de qua quidem sic ait.

*δεῖ δ' οὐ μόνον ἀρετὴν, ἀλλὰ καὶ δύναν
μιν ὑπάρχειν, καθ' ἣν ἔσται πρακτικός.*

Opus est, vt non sola virtus, sed etiam suppetat vis, qua res geri queat.

Hæc igitur vbi fuerint vtraq; coniuncta, & prudentia, & auctoritas ad negocia gerenda, magnopere desideranda

randa reliqua non erunt, quæ superius ostendimus esse longius dissita; non spernenda certè, si adfuerint, imò verò exoptanda, sed non anteponenda rei præcipuæ, neq; vlllo modo exequanda. Cum enim equa rerum omnium distributio, mensura quadam, & regula indigeat, quæ aberrare non sinat, vnde nam melius, atque opportunius poterit ea peti, quàm ab ipso fine, hoc est à beata vita, cui seruire, & consulere Magistratus debent? ad eam rem qui parati maximè, atq; prompti sunt, omnibus cum naturæ, tum disciplinæ, & consuetudinis, & exercitationis præsidij instructi, adiunctis ijs adiumentis rerum gerendarum, quæ prudentia necessariò requirit in administrando; hi præ ceteris debent esse communium rerum participes, & quidè iure optimo. Nam bonum publicum atq; politicum idem prorsus est vt lib.

lib. polit. III. Aristoteles tradit, & perspicue probat : Iustitiæ verò lex præcipit, atq; exigit, vt non omnes in honorum communionem temerè vocentur, sed qui apti nati sunt in commune aliquid conferre, quo in ciuitatibus feliciter, beateq; viuatur. Qui sunt eiusmodi, à philosophis æquales, & similes, non propter ipsam naturæ coniunctionem tantū appellantur, sed ob excellentissimæ virtutis similitudinem. De his autem ita loquitur Aristoteles Polit. libro VII. & alibi ea repetit.

τοῖς γὰρ ὁμοίοις τὸ καλόν, καὶ τὸ δίκαιον ἐν μέρει. τὸτο γὰρ ἴσον, καὶ ὁμοιον. τὸ δὲ μὴ ἴσον τοῖς ἴσοις, καὶ τὸ μὴ ὁμοιον τοῖς ὁμοίοις, παρὰ φύσιν. οὐδὲν δὲ τὸ παρὰ φύσιν καλόν.

Nam is, qui similes, atq; pares sūt, hoc est honestum, & æquum, vt veniāt in partem imperij. Id enim par atq; simile. Qui verò sunt æquo iure, non æ-

qua

qua eis tribuere, & qui sunt pares, non paria, est præter naturam. Nihil autẽ ex ijs, quæ præter naturam, est honestũ, ac decens. Hoc axioma de iuris equabilitate accepit Aristot. à Platonis Republica, sed ad meliorem sententiam traduxit, atq; accommodauit. Nam Plato fuerat adductus hac ipsa ratione, vt rerum omnium æqualitatem induceret citra vllum discrimen: Aristoteles autem non nisi imperium communicat, nec promiscuè id cum omnibus, sed cum illis tantum, qui ciuili virtute alijs multum antecellunt, inter se quàm similimi, atq; omninò pares. Quapropter contra Platonem, quas Bodinus adducit, eæ rationes nõ tollunt, neq; verò infirmant Aristotelicam hanc iuris equabilitatem. Arguit enim hoc modo. Quemadmodum pueris, adultis, senibus, egris, sanis, & athletis idem victus atq; vestitus nõ est

est impertiendus: ita etiam ius imperij non omnibus æque tribuendū.

Et rursus. Imperandi prudentia quā paucissimis est natura tributa: igitur imperia minimè exequari debent.

Sed Plato popularem statum tuebatur, & ex equo propterea cunctis oīa tribuebat: Aristoteles verò probat eam formam, quæ cum optimis tantum non omnia, sed honores equat.

Præstabile certè admodum, atque optandum esset, ut omnes, qui versantur in ciuitatibus, probi, & sapientes quàm maximè, tales denique existerent, ut pariter ad gerendam Repub. haberentur idonei. Nā summa naturæ coniunctio, quæ est inter homines, desiderare id atq; exposcere iure quodam videtur. Sed quia propter humanæ vitæ commoda, & necessitates natura solers, atq; prudens commenta est in tanta similitudine magnam quoq; varietatē;

id optare saltem licebit, quod est huic proximum, vt quamplurimi nascantur, euadantq; ad imperiũ apti, quo præclarissimè nobiscum agatur, & cum ipsa Repub. Qui verò putāt, hominum vitio, atq; culpa fieri, vt Respublicę appareant meliores, quā vnus imperium, hos oportet sentire, quod est perabsurdum: vt plurimi fuerint in ciuitatibus præstantissimi uiri ad capeffendam Rempublicam habiles, & prompti, tum inibi culpæ, atq; vitij residere plurimum. Quod monstrum, atq; portentum quis, amabo, ferat? Culpari debet paucitas hominum præstantissimorum, & non multitudo: hæc autem genuit Respublicas, atq; propagauit; illa, vt imperia deferrentur vni tantum, coegit. Si qua igitur culpa est humanæ imbecillitatis, ea multò magis in Monarchia hærebit, quàm vlla in Republica. Postulat hic locus

cus, vt respondeamus ad ea, quę afferri solent pro sententijs eiusmodi argumenti loco. Multò plus videre atq; sapere multos, quam vnum tantum, propter humani ingenij summā tenuitatem. Ex multis, quorum singula nō sunt satis perfecta, conflare posse vnū quid absolutum, atq; integrum. Temperamentum quoddā, & moderationem oriri ex aduersantiū rerum concursu, & coniūctū. Barclaius hęc, quę pleriq; ponunt tanquam certa, & vera, non modò reuocat in dubium, sed omninò negat. Rationes eius multiplices, atq; varię sunt. Primò quia multis, ac varijs exemplis illi demonstrarunt, qui populorum res gestas commendarūt memorię, præ tota multitudine semper emicuisse vnus viri summam virtutem, atque sapientiam. Eiusmodi verò exēpla fuerint. Agamemnonis, qui à tot Gręcię ciuitatibus, & popu-

populis, atq; adeò Principibus, ut omnibus imperitaret, electus fuit, idq; in expeditione omnium celeberrima, quotquot vnquam susceptę hominũ memoria. Nestoris quoq; Vlyssis, & Æneę præconia, quorum prudentię fama late peruagata; & à Miltiade præclara edita facinora, cui detulerunt Athenienses summã belli gerendi, Ducibus, quos creauerant decẽ, abrogato imperio. Attexit Gręcis exempla quoq; Romanorũ, gesta Furij Camilli, Appij Cœci, C. Fabij, Scipionumq; recẽset: Post hæc Apophthegma quoddam Phocionis vituperantis multitudinis iudicium de publicis rebus, quale est illud ẽt Hippomachi; κακῶς ἠύλησας *Male cecinisti*, ad discipulum, qui plausum multitudinis canendo affecutus fuerat. Deinde verò sic amplius argumentatur. Maior est numerus improborum, quàm proborum, & lō-

ge maior est multitudo stultorum, quàm sapientum, præditorumq; nō solum perfecta, & exquisita, sed vulgari quoq; illa, & communi prudētia, quæ in quotidiana vitæ consuetudine occupata est. Bonorum quoque, & prudentium animi sunt discordes ob ingenitam φιλαυτία, *amorem sui ipsius*, atq; varia studia, diuersasq; animorum affectiones, immò planè aduersas, quatenus alios timidos, & alios audaces, hos patientes, & lentos, illos iracundos, animiq; impotētes natura procreat. Quæ certè cū inter se permisceri cōtigerit tantoperè dissidentia, nec nō aduersantia, fore, vt turbamentum oriatur, non temperamentum. Tandem verò ait, hoc argumentum; *Multò plus videre multos, quam unū,* eorum esse, qui popularem statum præferant imperio optimatum, & in hanc ipsam sententiam ab Aristote-

le afferri; ergò non magis illud contra vnus, quam aduersus imperia paucorum, facere videri. Hæ sunt omnes Barclaij ratiocinationes, quæ licet nos offendere parum videatur, qui dignitatem, præstantiamq; Aristocratiae ex humane nature propria excellentia, non ex aliqua imbecillitate, aut vitio colligendâ ducimus; attamen quia multa falsa, & fallacia continent, & præter occultam oppugnationem nostræ huius sententiæ, reprehensionem quoq; apertissimâ ipsius Aristotelis, cuius auctoritatem conuellere ille multum nititur; propterea quæ dicta sunt ab eo disputando refellere, potissimumq; enucleare sensum Aristotelis, quem probè nō fuit affecutus, necessarium fuerit. Trifariam inter se committi, & conferri possunt iudicia, seu consultationes, ac deliberationes, vnus viri, paucorum, atque multitudinis.

Hanc

Hanc triplicem cōparationē lib. III. polit. diuersis tamen locis affert Aristoteles, & primò quidem dum multos cum paucis comparat, ostendit non verè semper ita dici posse, *Plus multitudinem sapere, quam paucos viros*; distinguit enim duplex multitudinis genus. Vnum, in quo singuli habeant è multitudine non modò magnam propensionem ad probitatem, sed etiam aliquam particulam civilis virtutis, quam deinde in commune conferre possint, quando simul conueniūt omnes congregati, & hac ratione conflare vnum quid absolutum. Atque ita intelligendū est illud lib. VII. Polit. ἀκολουθεῖ τὸ καὶ ἑκάστων, καὶ τὸ πᾶντας. *Consequitur singulos esse, ubi omnes sunt.* Si quidem oritur ex ea, quam singuli habent, totius multitudinis vis, atque virtus in vnum coacta multò præstantior, quàm cum erat antea.

dissipata . Est autem alterum quod
 dam genus multitudinis, in quo vir-
 tutis, aut nihil residet, aut certè adeò
 exiguum , vt vndique collectum nō
 possit aliquid efficere, quod medio-
 cre videatur, si non egregium . Et
 in hac multitudine docet Aristoteles
 non posse locum habere illud argu-
 mentum, quod multi meliùs delibe-
 rent , sapiantq; quàm pauci . Idem
 quoq; in priori multitudine cernitur
 valde fallax esse, nihilq; habere fir-
 mum, atq; stabile in ipsa re infixum,
 sed aduenticiū quoddam, & con-
 sequens, sed non necessario . Nam
 secus etiam contingere , atq; id sæ-
 pius potest, vt virtus eius multitudi-
 nis, quam diximus, in vnum colla-
 ta , non æquet illam paucorum,
 sed optimorum . Quo fit, vt hac in
 multitudinis collatione cum paucis
 sapientibus , eiusmodi voces identi-
 dem exaudiantur ; ἐνδοξέστεραι : οὐκ

ὅτι ἐν κωλύει, contingit: nihil prohibet,
 quæ non definiunt quidquam, neq;
 certò statuunt: quinimmodò ita com-
 ponuntur ibidem optimates cum po-
 pulo, vt illis pulchritudo insita, ve-
 raq; tribuatur; huic aduenticia dun-
 taxat, hinc, atq; illinc adscita, quæ-
 admodum pictis imaginibus vsu
 venit; ex quibus etiam concludit
 apertè Aristoteles, populari quidem
 iudicio quædā permittenda; summū
 tamen imperiū paucis deferendū,
 qui prudentia, & consilio ceteris præ-
 cellant. Hæc de comparatione, quæ
 cadit inter multos, & paucos. Vbi
 verò multi cum vno tantum confe-
 runt non multò post ea contentio
 prorsus ita tollitur. διὰ τὸ τὸ κρεί-
 νει ἅμεινον ὄχλος πολλὰ, ἢ εἰς ὅσις ὅν.
*Propterea multitudo multa rectius in-
 dicat, quam vir unus, qualiscunq; sit.*
 Hæc verba constat habere vim as-
 seuerandi: nam rem velut ancipitem

non amplius in medio relinquunt, quemadmodum in superiori comparisonem. Sic etiam omnino à natura institutum est, ut multi prospiciant acutius, quam vnus, vel admodum perspicax. Quid in extrema illa cōtentione inter paucos, & vnum? Lōgè optimates proculdubio præferuntur; nisi si adeò supra humanam cōditionem quis euectus fuerit, ut ad naturam diuinam quàm proximè accedat. Hoc enim singulariter excipit Philosophus, quod etiam nobis explicandum copiosè inferius. Nā quod illas deliberationes Barclaius vituperat, in quibus id esse firmum, atq; ratum solet, quod pars maxima ciuiū iusserit, ac sanxerit, summamq; decernendi grauissima quæq; potestaté vtilius vni, quam multis committi arbitratur, sic tamen ut in consilium quoq; adhibeantur, audianturq; optimates, siue Senatores: Aut

ita vult in eorum consilij acquiescere Principem, vt id, quod pluribus visum fuerit, eligat, & iubeat; atq; ita inclinabunt omnia, recidētq; ad rempublicam: Quid enim obsecro interest, ipse ne deliberes, an alter ex arbitrio, & sententia tua? Aut censes in deliberando Regem oportere non quidem aliorum sensum, & iudicium sequi, sed vni sibi obtemperare, atq; obsecundare, & sic in errorem, & fraudem quàm facillimè incidet. Nam dubitari non potest, quin ea comprobet, in quæ maximè animatus, propensusq; fuerit. Regis autem ipsius hac propensione intellecta (non enim diu latere poterit homines acutos) quous in consilio quisq; contra hiscere audeat? Nota sunt aulicorum omnium ingenia, atq; studia; nihil magis horrent, quam principis indignationem, atq; ideo facilè ad eius voluntatem sese totos

singunt. Neq; defuturi sunt vñquā homines subdoli, & assentatores, qui cupiant, studeantq; Regis dare auri- bus, ut aliquod emolumentum au- cupentur, atq; gratiam ineant. Qua propter is in malitiam facile induce- tur nō minus ex animi sui vitio, atq; prauo sensu, quā ex eorum astutia, qui circumsident ipsum, captantque hominis voluntatem, atq; vnā suum commodum. Hos ille consiliorum omnium participes faciet, maioriq; studio complectetur, & libentiū au- diet, quā si qui fuerint consilia- rij optimi, ac fideles. Exempla mul- ta commemorari, & adduci possunt; sed insigne sufficiat illud Roboam Regum libr. III. cap. XIII. qui cum haberet in suo consilio eiusmodi vi- ros, quorum fides, atq; sapientia perspectissima fuerat, & comproba- ta grani iudicio sapientissimi Patris, hos tamen omnes posthabitos pro-
pterea

pterea neglexit, quod ea dixissent, quę minus arriderent sibi, & consiliorum auctoribus illis vti maluit, qui per insignem imprudentiam, summamq; arrogantiam, multò maximam regni partem ab ipso alienarunt. Tanti optio refert optimorū consiliariorum: quo certè in genere quis manifestè non videt, eò meliori conditione, quàm Reges, fore semper Respublicas, quò multorum iudicia, atq; testimonia grauiora, certioraq; procul dubio, quàm viri vnius tantum? Veruntamen dicturi plura sumus hac de re, cum exquisitis rationibus illud cōprobabimus, quod ab Aristotele verè scriptū fuit: *Aberraturum facilius in iudicando, corruptumq; iri procliuus unum multo, quàm multos.* Quod certè non est adscribendum naturę ipsius vitio, neq; arguit vllam eiusdem imbecillitatem. Contrà enim debilis natura, &

ra, & infirma esset, contraheretq; nō modicum labis, atq; detrimenti, si quidquid ingenij, solertię, ciuilibsq; virtutis in vniuersos homines diuina sapientia distribuit, & certa quadam ratione, & modo ita temperauit, vt commune omnium ornamentum, & commune bonum, si non ad omnes, ad quamplures certē pertineret; id omne transfunderetur in vnum, aut alterum, ceteris omnibus exhaustis, atque exinanitis. Si quis autem humanę naturę conditionem culpāt, atq; in ipsa vitium hærere propter hoc existimat, quod ipsa per se rerum prorsus omnium expers, non nisi magno cum labore, ac difficultate qualemcunq; notitiam earum comparare potest adminiculo sensus duntaxat, atq; experientiæ; is quod sacrę litterę testantur, meminisse debet, singula Dei opera in suo genere perfecta existere.

existere, tametsi cum alijs composita, atq; comparata, minùs perfectà videri possunt, minùsq; absoluta.

Longè perfectiores sunt animantes, quàm stirpes; si tamen hominem spectamus, erunt imperfectæ. sic etiam apparet hominis natura imperfecta, si cum intelligentia quapiã conferatur, quæ imperfectissima fortasse putanda fuerit præ alijs, quæ superioris sunt ordinis, atque dignitatis. Quapropter vim cuiq; naturæ insitam, & propriam, non ea, quæ superant illius conditionem, inspicere oportet: & quemadmodum pecus iure conqueri non posset, quòd sortita non sit eam vim mentis, atq; ingenij, quæ singulari Dei munere fuit homini tributa: ita non est, cur homo existimet sibi expostulandù, si non habet omnium rerum intelligentiam tam exactam, & claram, quàm beatę illę mentes quo æterno fru-

fruentes, à mortali concretionē, atq; labe penitus segregatæ; neq; ipsius Dei iudiciū reprehendendum temerè, quod omnia maxima, atque summa non tribuerit vni, vt longissimo interuallo post se alios omnes relinqueret; cum sapientia diuina potius in eo multum eluceat, quod propriū facere noluit vnus hominis, sed communicare, quod ad communem dignitatem pertineret admodum. Non est igitur naturæ probrum, atq; vitium, sed laus, & ornamentum cōueniens, siquid aliud, maximè; plures vt sint prudentiæ, hoc est rationis participes. Et si rerum pulcherrimarum inopia grata nulli accidit, iucundissima cunctis meritò debet esse copia, qua scimus ipsarum fructum omnem contineri, & dignitatem, & vim, & præcipuum robur. Optima est igitur rationis huius conclusio, quam

III. Politicorum affert Aristoteles.

αἱ δὲ πλεονεχίαι τῶν πλειόνων ἀρχαί, ἀγα-
θῶν δ' ἀνδρῶν πάντων ἀριστοκρατίαν
θετέον, πλεονεχίαν δ' ἐπὶ ἐνὸς βασιλείαν, αἴρε-
τώτερον ἂν εἴη ταῖς πόλεσιν ἀριστο-
κρατία βασιλείας, ὅτι μετὰ δύναμει,
καὶ χωρὶς δύναμει οὐσης ἢ ἀρ-
χῆς, ἂν ἢ λαβεῖν πλείους ὁμοίως.

*Si ergò statuenda quidem Aristocra-
tia, quæ sit principatus plurium, sed qui
omnes probi viri sint, Regnum autem
vnius viri; magis optanda fuerit ciui-
tatibus Aristocratia, quàm Regnum
siue adsit, siue absit potestatis vis,
modo sit integrum plures inuenire
similes. Et non multò post.*

ἔτι καὶ τὸ πρότερον εἰρημένον δεῖν,
εἰπερ ἀνὴρ ὁ σπουδαῖος διότι βελ-
τίων, ἀρχεῖ δίκαιος, τῷ δ' ἐνὸς οἱ δύο
ἀγαθοὶ βελτίους. Ἰδὲτο γὰρ ἐστὶ τὸ
σύντε δ' ὑ' ἐρχομένω, καὶ ἢ εὐχὴ τῷ Ἀγα-
μέμνονος, τοιοῦτοι δέκα μοι συμ-
φράδμονες. *Ad hæc quod superius
fuit dictum, si vir probus ac prudens
ex eo*

ex eo, quod melior, dignus est, qui imperet ; certè duo probi, ac prudentes sunt uno meliores. hoc enim est, quod dici solet. Duo simul gradientes : & Agamemnonis optatum : Tales mihi consultores decem. Quid ergò dicemus esse in caula eius rei, quam Barclaius ex historijs colligit, ac probat, vnius viri præconia decantari solita, & supra ceterorum omnium virtutes extolli ? Certè non tam præstantissimorum perexiguam copiã, quàm quod suscepit cõsuetudo, atq; hominum vita, vt rectè consultorum omnium, factorumque laus, cuius auspicio res gesta fuerit, illi tribuatur, non autem consiliarijs, ceterisque ministris, quamuis eorum fides, atque industria maximo vsui fuerit. Quàm verò multi aut sua sponte, aut temporum vitio, nunquam fuerunt in aliquo numero atq; loco ? Quot, quantorumq; egregia virtus in occulto

culto versata, è circumfufis tenebris eripi non potuit; & si quando fortè prodijt in lucem, conspectumq; hominum, ad extremum tamen obruta longa vetustate, omne decus, atq; nomen penitus amisit? Verè hoc, si quid aliud, Horatius cecinit Carminum lib. IV.

*Vixere fortes ante Agamemnona
Multi, sed omnes illacrymabiles,
Vrgentur, ignoti, longa
Nocte, carent quia vate sacro.*

Exempla verò illa Miltiadis, Furij Camilli, & Q. Fabij, nihil aliud probant, quàm quod infra suo loco melius explicabimus, vbi consilia fuerint capta salutaria Reip: non eligēdos vnà plures eodem iure Duces, qui rem trahant aliò, atq; aliò in diuersa distracti, sed quidquid est opus factò, per magni referre, si vni spectata virtute, ac fide Duci committatur; ea quoq; adhibita cura, nec nō cau-

cautione, ne quid accipiat detrimenti summa Reipublicę. Phocionis aut, atq; Hippomachi Apophthegmata illa, non cuiuscunque multitudinis improbant iudicia, sed promiscuę, vulgaris, atq; adeò multum imperitę; paucorum, & optimorum sententias nulla ex parte attingunt. Sic etiam ratiocinatio illa ducta, atque petita ex numero stultorum, & malorum plurimo, si quid valeret, ac probaret, hoc tantum efficeret; humani ingenij prauitatem, seu imbecillitatem in ciuiles hominum cętus Monarchiam induxisse, quamuis naturę minus apta foret, exclusa Reipublica. Dissensiones autem illę animorum, & concertationes ob ingentem φιλαυτίαν, *amorem sui ipsius* siue alia de causa, minimum poterunt eos afficere, ne dum planè auferre, qui reipsa, non solùm nomine fuerint optimates. Quod si etiam

quid

quid leuiter incommodēt, tolerari poterunt. Siquidem commodis incommoda facilè compensantur, vbi cōtentiones susceptæ de honore, atq; gloria excitant hominum industriā, & prudentiam exacuunt. Præterquam quod inimicitijs priuatis, vt res ipsa docet, plerumq; augentur publicæ vires, atque propagantur. Quod si peruicacia contentionū tam magna extiterit, vt certam pernitiē rebus allatura videatur; argumentum hoc fuerit cuiusdam Politix aut nō satis in ortu suo primo benè temperatæ, aut incipientis apertè à statu suo declinare, & sensim labefactari innato aliquo vitio: in qua si turbamentum sit potius, quàm temperamentum ex illa commixtione, ac conflictatione pugnantiū inter se studiorum, atq; voluntatum; nihil est, quod mirum, aut insolens cuiquam videatur. Contingere solet

E hoc

hoc facile in omnibus ijs, quæ mix-
 ta, concretaq; sunt ex dissimillimis
 rebus, vt habeant suum robur, ac
 speciem, & concinnitatem, quam
 diu viget, & permanet moderatio
 illa, qua temperantur æquabiliter
 vniuersa: cum autem vis ea remitti-
 tur, ac debilitatur, quæ res discor-
 des, atq; aduersantes ita coercebat,
 vt redderet inter se concordes, & cō-
 sentientes; tum quoq; paulatim vi-
 gor omnis, atq; forma deperit, & ip-
 sa demum coagmētatio omninò dis-
 soluitur. Verum de Repub. integra,
 firma, atq; florente, non infirma, la-
 bente, & corrupta res est in præsenti-
 a. Falluntur enim, vel magis fal-
 lere nos student, qui obtrudunt vel
 Ochlocratiam, vel Oligarchiam pro
 Aristocratia, hoc est pro legitimā
 re adulterinam, pro sincera corru-
 ptā, & ἀντὶ τῆς πολιτείας, τὰς παρε-
 κβάσεις τῆς πολιτεῶν, quod ait Ari-
 sto-

stoteles. Enimuerò dum celebramus Aristocratiam, tanquam optimam formam ciuilis administrationis, ponimus eam, vt par est, constitutam esse, & spectare in primis illum finē, quem habet propositum. Quo quidem posito, vt poni necessariò debet, per se faciliè corruunt, & ad nihilum recidunt, quęcunque temere solent aduersus eam obijci. Multò plus autem cum labi, tùm nequitie loci, vbi vnus imperat, quàm vbi plures, dari, ex eo duci, ac probari potest euidenter, quod infra cap. 5. disputatur satis copiosè; *Proclivius esse ad vitium Regnum, quàm Remp.*

Cuiusnam modi sit idea illius Monarchię, quam Philosophi magnificè celebrare solent. Ex eo quod vnus mundi sit rector, atq; Princeps Deus, captiosè, & fallaciter admodum concludi, magis optandum vnius imperium, quàm plurium. De varia sm-

plicitatis, & gubernationis ratione non pauca præstantia. ciuilis principatus vndenam existat. Cur habeatur sui iuris, & liberi ciues Reipublicæ; contra vero serui, qui premuntur regio dominatu.

CAPVT TERTIVM.

NVlli obscurum, aut dubium potest esse, quid senserit Arist. de Aristocratiâ, probè consideranti testimonia super ius adducta: sed quia deferre nonnumquam primas Monarchiæ videtur quemadmodum consueuerunt alij celebres Philosophi; age quid hi sibi velint, inuestigemus, & qua ratione sit hoc verû, aperiamus. Aristoteles ergò post satis longam disputationem tertio politic. extremo ita rem concludit.

ἀλλ' ἐκ τῶ ἐρημένων γε φανερόν, ὡς ἐμ
 μέν τοῖς ὁμοίοις, καὶ ἴσοις, ὅτε συμ-
 φέρον ὅσιν, ὅτε δίκαιον ἓνα κύριον
 εἶναι πάντων, ὅτε μὴ νόμων ὄντων,
 ἀλλ' αὐτὸν νόμον ὄντα, ὅτε νόμων ὄν-
 των:

των, ὅτε ἀγαθὸν ἀγαθῶν, ὅτε μὴ ἀγαθῶν ἀγαθόν, ὅδ' ἂν κατ' ἀρετὴν ἀμείνον ᾖ, εἰ μὴ ῥόπον ἔναι. Veruntamen ex ijs, quæ dicta sunt, manifestum est, neq; utile, neq; iustum esse, ut inter similes, atq; pares unus existat, qui sit omnium dominus, siue leges absint, ipse verò existat lex, siue leges adsint; neq; si bonis ciuibus bonus, neq; si malis malus imperet; ne si virtute quidem præstantior quis fuerit, nisi certo quodam modo. Quis autem ille sit modus in genere tantum, & summatim paulò post ita explicat:

διαφέροντα γενέας κατ' ἀρετὴν τοιοῦτον, ὥδ' ὑπερέχει τῇ ἐκείνῃ ἢ ἄλλων πάντων. Tantum præstare oportere, ut eius virtus longè superet omnium aliorum virtutem. Sed quantum debeat superare, hoc loco non exprimit, alibi tamen id præstat, & præsertim lib. VI. dum ait. ἵνα ἀναμφισβήτητον εἶναι, ὡς φανερόν

τὴν ὑπεροχὴν τοῖς ἀρχομένοις τὴν τῷ
 ἀρχόντων. *Ita ut extra controuersiam
 sit posita, & manifesta ijs, qui parent,
 excellentiam dominantium.* Varijs
 autem comparationibus, & simili-
 bus hanc ipsam rem illustrauit. Ali-
 quādo enim quantum inter dominū
 & seruos, aut certè inter parentem
 & filium familias, tantum statuit in-
 teresse oportere inter genus vtrumq;
 vt lib. VII. aliquādo non minùs hęc
 duo inter se distare, quàm vel ab ap-
 petendi vi ratio, vel à pecūde homo,
 vt lib. I. Addit alicubi, quo nullum
 maius discrimen, tanquam Deum
 aliquem, aut Heroem inter homines
 esse lib. VII. Ex quibus animaduer-
 tere, & colligere licet, non celebrari
 à Philosopho Monarchiam simpli-
 citer, sed ex Hypothesi quadam, seu
 fictione istiusmodi: *Si quis plurimū
 inter omnes tanquam Deus emineat.*
 Nam quod in cunctis artibus fieri cō-
 suevit,

fuevit, vt effingatur idea quædam
consumati artificis, qualis tamen re
ipsa nullus existit; hoc etiam à Phi-
losophis vsurpatum cernimus, vt
speciem quandam Monarchiæ com-
miniscerentur, eandemq; nobis pro-
ponerent ad contemplationem tan-
quam omnium optimam, præstan-
tissimam, atq; absolutissimam. Fieri
tamen qui potest (atque hoc est rei
caput) vt ad ciuiles hominum cœ-
tus hæc accommodentur? siquidem
primò in vnum hominem, quem gu-
bernationi præficiunt, tot, tantaq;
conferunt, immò congerunt, atque
coaceruant, quanta natura hominū
capere vix queat: ideoq; affirmant
vltrò, Plato præsertim IX. de legi-
bus, fieri nunquam posse, vt talis vir
existat, qualem ipsi formant: dein-
de cuncta, quæ tribuerunt, summa,
& absoluta, eadem quoq; firma, at-
que fixa manere iubent: quasi pen-

dere omnia non oporteat ab vnius hominis saltem vita, si non voluntate; quarum altera facillimè inflecti, mutariq; potest, altera verò est breuissimis terminis circumscripta. Homo igitur donandus fuerat immortalitate, atq; adeò tanta fortitudine mentis, & constantia, vt ab ingenta virtute nunquam deficeret; aut certè summum opificem, id præstare oportebat, vt nullus ante migraret ex hac vita, quàm alter esset in promptu, qui ei succedere posset eadem virtute summa, nec non firma præditus. Sed utrùm hæreditario iure, an per electionem? Nam vtraq; res habet suas difficultates. Exigeret illa, vt non tantum corporis forma, sed ingenij quoq; virtute semper nascerentur omninò similes, atq; pares liberi parentibus, prætereaq; non superstites illis nunquam essent, sed adulta iam ætate, atq; imperijs apta.

Hæc

Hęc autem, vt de medio planè tollerentur odia, inuidię, factiones, animiq; pestes, quò promptis, & concordibus animis conuenirent omnes ad eum, qui præstantissimus esset, eligendum. Sed exoptari, & haberi is minimè posset, si versaretur in occulto, & virtus eius lateret. Multi autem sunt viri probi, atque sapientes, qui consultò declinant celebritatem, vt liberiùs contemplationi vacent, cui se tradiderunt. Itaq; hos ad diuersum quoq; vitę genus vel reluctantes, & inuitos oporteret traducere; immò rerum naturã omnium prorsus immutare, tandemq; ex homine prodigiosissimè Deum quendam efficere, si talis in hominum cœtus inducenda esset, qualis effingitur à Philosophis Monarchię forma. Quid igitur? Percontabitur aliquis hoc loco; tunc hoc Philosophorum studium putas reprehendendum, aut etiam

tiam fortè reiiciendum, vt inane pron-
fùs ? Bodinus quidem videtur æquè
reprehensurus, ac eos, qui sibi fingūt
ideam historici perfecti, qui neque
fuerit vñquam, neque possit esse.
Veruntamen non idea debet, sed il-
li reprehendi, qui pro re ducunt
ideam ipsam complectendā, neq; ani-
maduertunt illud se præposterè age-
re, quod non gubernationem ciuile
ad hominum coetus, quorum caussa
instituta fuit, accommodare nitun-
tur; sed contrà iura naturæ ita per-
turbare, vt contra quàm fas est, trās-
ferantur, atq; adeò trahantur huma-
næ societatis rationes ad nescio quid
fictum. Vt omittam, quod si ex vo-
to rem oportet fingere, multò præ-
stat omnibus ijs rebus, quæ vni tri-
buuntur, eadem opera exornare, &
augere quàm plurimos. Magis enim
communi hominum naturę consen-
tiens, & magis ex omnium vñ fu-
turum

turum esset. Quidni autem liceat, si minùs in re ipsa, at certè in optatis, & votis liberiùs versari; præsertim vbi de ijs fuerint nobis facièda, quæ maximè accidunt opportuna, nec nò præstabilia? Sed video quid his rebus omnibus opponant. Vnus est, inquiunt, Mundi rector, atque Princeps Deus; hinc ergò ciuilibus gubernationis tota ratio petèda. Quod argumentum vt illustrius, & firmitus appareat, quibusdam alijs probationibus explicant, atq; fulciunt. Habere suum apes Regem; suum armenta ducem; grues quoq; & plerasq; volucres vnum sequi. Porro excellere in singulis naturis semper vnum aliquid: vt adamas inter gèmas, aurum inter metalla, Leo inter animantes omnes, & Sol inter Sidera. Ex his autem concludere se arbitrantur, vniuersæ naturæ Monarchiam congruere. Quæ tamen, extrema

tremā præfertim, sunt quàm leuissī-
 ma, neq; certè digna, vt aliquid tem-
 poris infumatur in iisdem redar-
 guendis, atq; confutandis. Nā quid,
 obsecro, iuris, quid habet imperij,
 aut adamas in gemmas, aut Sol in
 altissima Sidera? Vniuersę quidem
 species, atque formę, quęcunq; cō-
 tinētur vno eodemq; genere, specta-
 re vnum aliquid solent inter ipfas e-
 minens, idq; appellatur à Philoso-
 phis in eo genere μέτρον mensura.
 Sed in hominibus, qui sunt omnes
 eiusdem formę, nullum constitui
 potest eiusmodi μέτρον, quod adhi-
 beri solet ad res natura diuerfas.
 Quid? cum statuere videntur velle
 rem ita ridiculam, vt rationis exper-
 tes animantes, cuiusmodi sunt apes,
 pecudes, & grues, hominibus statuā-
 tur tamquàm μέτρον, nonne rerum
 inuertunt naturam, vel potius euer-
 tunt? Nam constat hominem bru-
 torum

torum magis *μῆζον* esse, cuius vt gratia procreata, ita imperio subiecta. Quid est igitur causæ, cur isti velint, homines regi pecudum magis, quam hominum more? Ceterę omnes animantes ad communionem, societatemq; ciuilem non sunt aptę. Speciem quidem huius rei quandā illę habere videntur, quę ad præstātiā humanę naturę nonnihil accedunt: rem tamen ipsam non habent, neq; habere possunt; propterea quòd nullius ciuilibus communionis, multoque minùs imperij, verè sunt participes, quod rationis, atq; consilij constat proprium munus esse. His adminiculis cum bruta destituerentur, ingenita est illis quędā vis, & naturę propensio, qua sequeretur alterius ductum sine vlllo consilio. Hoc autem ipsum ad homines transferre conari, quid erit aliud, quàm ex homine belluam facere?

& tamen eodem negotio ijdē moliū-
tur nonnullos ex hominibus vel in
Deos conuertere, dum eterne, ac
diuine vim gubernationis ad morta-
lium hominum ceteris adaptare stu-
dent, cum tamen nullus existat tam
rudis, & vecors, qui celestia pluri-
mum à terrenis distare non sentiat,
& à mobilibus, & caducis æterna,
atq; fixa; proindeq; ab his ad illa
captiosissimè argui, quæ sitam in
cōtrarijs habeant perfectionem suā.
Si quidem in humanis ac terrenis re-
bus vt exemplo res notior, atq; il-
lustrior fiat, quo quid ex pluribus
est concretum, & coagmentatum,
eò comperitur perfectius, atq; adeò
præstantius. Neq; verò alia est ra-
tio, neq; fingi potest, cur homo bel-
luis antecellat, & belluæ plantis,
plantęquoq; metallis, & lapidibus,
hæc verò elementis, perinde ac cete-
ra conflata, mistaq; ex ijsdem. Ma-
teria

teria denique prima, quod simplicissima est omnium, habetur omnium abiectissima, & imperfectissima. Cōtrā verò in celestibus, atq; eternis reb. ratio perfectionis tota est in simplicitate, idq; perfectius, atq; nobilius perhibetur, quod est magis simplex: Deus autem ipse præstantissimus omnium, atq; perfectissimus, quoniam simplicissimus. Quare fieri non liceret argumētari ad hunc modum. In celestibus quò magis aliquid simplex, eò perfectius est; ergò in terrenis etiam, quæ celestia debēt imitari: eadem planè ratione non valet hæc argumentatio. Incelesti gubernatione vnus est rector, atq; princeps; ergo etiam vnus debet esse in humana & ciuili. Primò quidem quia, vt argumentum rectè procedat, quemadmodum est vnus omnium moderator Deus, ita oportet in terris quemdam summum Prin-

Principem, à quo penderent omnes alij Principes, vnum esse, & ne quid eundem fallere, aut latere posset, cū-cta intuentem, perinde ac Deum, & vbiq; præsentem. Postea dissimilitudo naturæ, summaq; diuersitas nullam imperij communionem admittit, neq; societatem. Nam qui fieri potest, imperij vt in partem veniat aut cum homine bellua; aut homo cum intelligentia; aut tandem aliquid creatum cum suo creatore? Quæcunq; sunt eiusdem naturæ societate coniuncta, hæc vt pariter, aut vicissim imperent, apta sunt. Quamobrem si eiusdem nature, formeq; communio cum hominibus, aut intelligentijs intercederet Deo, etiam aliqua communio imperij posset intercedere. Sed quia quantum finitum ab infinito, tantum res omnes creatæ distant à summo Deo; propterea neq; sunt, neq; possunt esse
eius

eius rei participes : quemadmodum neq; hominib. vllis pateret imperiũ, si qua foret humana societas, siue Politia conflata simul ex hominibus , atq; intelligentijs . Qua propter ẽt Philosophi statuerunt , vt si quis inter omnes ciues plurimũ excelleret instar cuiusdam intelligentiæ , siue, vt aiunt, Dei , huic vni traderetur imperium, ceterique obedirent . Id verò , vt superiũs quoq; non semel admonui, non est absolutè , ac simpliciter Monarchiam celebrare ; sed per quandam hypothesim, & in hãc sententiam . Si ciuitates, & hominũ coetus ita Deo iubente ab aliqua diuersa natura gubernandi essent, quæ longè mente humana superaret oĩa, tunc iure Monarchiæ locum datum iri, atq; hoc futurum genus optimũ administrationis . Quid ita ? quoniam ea, quæ sunt ab inuicem plurimum disiuncta , imperij societate

copulare inter se non licet. Hæc enim est potissima ratio, eademque certissima, cur hanc rerum vniuersitatem Deus vnus regat, ipse non debeat, neq; possit ab vlllo alio regi: summa diuinæ naturæ dignitas, & præstantia, à qua remota vniuersa quam longissime absunt. Enimvero hic futuros aliquos intelligo, qui periculi magnitudine probè animaduersa, si moles eius argumentationis, qua præcipuè nituntur, & in qua præsidia sua cuncta collocarunt, labefactata vehementer ad extremum concidat, vel sustinere, vel reparare eādem aggressi, vt quæ à nobis posita sunt, facilius oppugnent, his opponere illud connitātur: simplicitatem pariter, & gubernationem in eo rerum genere collocatum iri, quæ attributa diuina nuncupātur, quæq; suapte natura perfectissima sunt, & in quacunq; re inueniantur, eandem vim

vim retinent. A nobis igitur falsò prædicari aliam, atq; aliam rationem vtriusq; esse, in terrenis, atque in coelestibus, & diuinis rebus. Et si verò quæcunque exempli gratia referuntur, ea necessariò præstāda nullus vnquam duxit, & satis haberem dicere de simplicitate, auctore D. Thomam me libèter sequi prima sū. quæst. III. art. VII. ad II. arg. quidquid & Scotus pr. sent. d. VIII. q. I. & alij cum eo senserint; vt tamen omnes aditus aduersarijs præcludā, neq; cuiusquam auctoritati plus detulisse, quam quantum esset tribuendum, alicubi videar, idcirco res quo modo se habeat, penitus inspicere, & pauca de simplicitate ante statui dicere, quàm gubernatio ciuilis à me expediatur. Nego itaq; simplicitatem perfecti quippiam, si generatim sumitur, & non propriè in Deo, vel cohibere sua vi, vel nota-

re posse. Nam simplex ita composito ex aduerso respondet, vt nullam certam rationem, & præcipuam vim, quemadmodum est perfectionis, ac præsertim summę, sed tantum quodcunque vacat, & qualitercunque omni genere concretionis, & compositionis, id confusissimè notet veriùs, quàm in se contineat: ex quo non alia communio existit, quàm vocis inter ea, quæ longissimè distāt immò ἐκ διαμέτρου *ex diametro*. Nam quædam res compositione tantū ob id caret, quò se facilius adiungat omnibus: atq; omnia suscipiat, quę propensio fuit illi à natura ingeni-ta, ut cum esset imperfectissima, nec non abiectissima, inde perfectionis non nihil sibi compararet: & hac ratione dicta simplex est materia prima, longè alia (quod facile apparet) quā sūmus Deus, qui ab omni concretionis labe alienissimus est,

rerumq; omnium perfectiones vniuersas continet, non dispersas, dissipatasq; vt in rebus singulis, neq; vt cumq; coeuntes, & coagmentatas, sed ita, vt vnum sint penitus, atq; idē, quod ipse. Id autem genus simplicitas est attributum diuinum, proindeq; absoluta perfectio, siue, vt aiūt, simpliciter. Simplicitas autem vniuersē communis est vox, quæ vim non habet designandi, aut declarandi quidquam, nisi compositionis cuiusq; meram vācuitatem. Sed ad ciuilem gubernationem iam reueniamus. Hęc ex ea parte quid & perfectum, & diuinum continet, quatenus habet potestatem ad regendos populos, non ab alio tributam, quā ab ipso Deo, & ex ipso diuinæ naturę fonte sic ex æquo manantem, vt inde plus dignitatis Regnum sibi sumere, quā Respublica vlla, nec debeat, nec possit. Ex qua verò parte

eadem hæc humana sunt, hoc est hominum inuenta, atq; cogitata, quæ sanè vis est innata eorundem, & propria, non possunt esse cunctis numeris absoluta; & quo minus Deo tribuantur, nihil quidē obstat; sed ea tantum ratione, atq; adeò notione, qua cetera, quæ propriè insunt in humanis rebus, cuiusmodi sunt, esse agricolam, pastorem, & Patrem familias. Cum enim hæc per similitudinem transferâtur in Deum, vix, præter communionē nominis, quidquam aliud ingerunt. Desinant igitur aduersarij temerè id iactare; conuenire in Deum Regnum, non Aristocratiam. Nam species omnes ciuilis administrationis accepta referunt hominibus & quæ ortus sui primordia: omnes pariter egent consilio, & deliberatione; proptereaque alienissimæ sunt à diuina natura, nisi quatenus aut summam illam pote-

sta-

statem continent, quam rem diuinā esse, non humanam constat, aut etiā verbo tenus quādoq; adsciscunt, ducta similitudine ex humanis rebus. Sed hoc eorum plerōq; in fraudem induxit, quod extra cōstitutos fines, terminosq; egressi, formā gubernationis contēplati sunt aut physico, aut metaphysico, potius quodam more, quā legitima ratione, nimiiū politica. Nā ratio gubernationis in cōmuni sumpta, triplici ferē modo cogitari potest, animoq; concipi. Primo quatenus ἀδιαφορος *indifferens* est; & cuiusmodicumq; multitudini regendę applicari potest. Secundo quatenus re ipsa certæ multitudini, quę constat ex rebus maxime dissitis, applicata est. Eiusmodi sunt, quę diuersis generibus continentur, præcipuē verò decem illis, quę suprema dicuntur. Postremò quatenus ijs rebus est adiuncta, quę minimum dif-

ferunt ; cuiusmodi sunt omnes homines formæ eiusdem participes ; & hac ratione duntaxat ad Politicum pertinet : ceteræ verò contemplationes alienæ sunt , ad phyzicos , atq; metaphyzicos omnes reiiciendæ .

Cum verò tam vniuersæ actiones , quàm actionum principia ab ea re , circa quam uersari solent operando , atq; agendo , præcipuam vim , & rationem sumant , qua distinguuntur ab alijs ; forma quoq; ciuilis administrationis ab hominum societate , cui regēdæ adhibetur , totam suam vim , & rationem , & naturam obtinet .

Quandocunq; igitur inter se conferendæ sunt , apteq; suis ponderibus examinandæ Monarchia pariter , atq; Aristocratia , communione ciuili adhibita tamquam libra , vnaqueq; in suam lancem imponi debet , quò pateat intuentibus , vtra deprimat alteram . Communio ve-
rò

rò ciuilis continere non potest, nisi res inter se tam similes, quàm sunt homines: manat autem omnis hæc similitudo ex duplici fonte. Alter est ipsa natura capax rationis, omnibus communis; alter autem quædam res præcipua, & non ita communis, quam ciuilem virtutem, seu prudentiam appellari docui. Vtrunque deriuata quando in vnum confluit, tum demum efficitur ea perfecta similitudo, quæ honorum communicationem, atque imperij, exigit, modò vincula non reuellat obligatæ fidei, & aditum non aperiat sceleris, atq; fraudi ad possessiones legitimas conturbandas. Quoad igitur fas est, quoad licet, quoad nihil incurrit, quod alterius iura, equitatē, atq; fidem violet, administratio ciuilis ita instituenda, vt neq; priuatorum numero, & loco habeantur, quicunq; sunt excellenti, & eximia virtute,

tute , neque vulgares homines illis adæquentur , non satis habiles ad sustinendum imperij onus : alioquin , vt rectè monet Aristoteles ἀδίκησονταε ἀξιόμενοι τῷ ἴσῳ , ἀντιστοι τοσούτου κατ' ἀρετὴν ὄντες , καὶ τῇ πολιτικῇ δυνάμει . *Iniuria fiet ipsis , si pari conditione censeantur , cum existant impares adeò , & inæquales virtute , facultateq; gerendi negotia publica .* Neq; verò tantum fore valdè odiosum , sed æquitati , & naturæ parum consentaneum , nisi qui sunt æquales inter se , atque pares , ijs tribuantur equalia , & paria , censet Polit. VII. Aristoteles , cuius verba superiùs recitata sunt . Itaq; si aut primam illam naturæ communionem inter omnes homines (quanquam hæc sola non sufficit , vt satis monuimus) aut alteram præcipuam , quæ imperio verè dignos facit ; aut potius utramque simul spectare velimus :

mus : minus utriq; rationi congruet
Monarchia , quippe quæ res omnes
ad solitudinem quandam redigit ,
ideoq; in societates liberas minimè
inducenda , quodocunq; libera est
optio, ut non semel est dictum , nisi
per hypothese[m] illam adeò celebra-
tam ; si quis excellat tantum inter
alios omnes, ut appareat Deus qui-
dam verius , quàm mortalis homo :
vel certè si multitudo , quæ regi de-
bet, sit admodum rudis, agrestis, hor-
rida, & inculta . Siquidem homines
ingenio liberali præditos, disciplina-
que, & moribus , ut par est, excultos,
æquabilitas iuris cum primis decet ,
imperandiq; ac parendi communes
vices . Hic autem superiorum reno-
uanda memoria ; cum ratio tota ci-
vilibus administrationis ex parentibus
conflata sit, atq; ex imperantibus ,
sed illorum potissimum causa , homi-
nem non item ; optimo quoque iure, non
hinc

hinc, verum illinc principatus præ-
 stantiam inuestigari, oportere. Quod
 quidem ab Arist. factum memini,
 qui Polit. lib. I. de parentibus; atq;
 imperantibus cum sermonem habe-
 ret, mox imperantibus omissis, ita
 rem concludit. καὶ αἰ βέλτιον ἢ ἀρχὴ
 αἰ τ βελτιόνων ἀρχομένων, διον ἀν-
 δρώπων, ἢ θηρίων. τὸ γὰρ ἀποτέλεμα
 τὸν ἀπὸ τ βελτιόνων βέλτιον ἔργον.
*Et semper eò melior principatus, quò me-
 liores ij, qui parent imperio; ut homi-
 nes, quàm belluæ. Quod enim opus per-
 ficitur à melioribus, id est melius.*
 Non igitur inficiamur, quod est ex-
 plicatum, in præstantissimo regimi-
 ne statuendo, si tantum modo illius,
 qui tenet imperium, aut certè potissi-
 mam rationem habere oporteret, fa-
 cile primas omnium Regno dandas
 esse. Veruntamen quia res multò se-
 cus, immò contrà se habet, Reipu-
 blicæ omnino cōcedere Regnum est
 necesse:

neceſſe : cum præſertim ex hiftoria-
rum monumentis conſtet, quicumq;
ſummo imperio vnius regis præ-
muntur, multò deteriori eſſe condi-
tione, quam ciues Reipublicę. Non
enim poſſunt vt effugere ſeruitutis no-
men: tametiſi non ita ſerui, vt habentur
mancipia, quia de ciuili principa-
tu res eſt in præſentia, non de impe-
rio, quod herile dicitur, ſiue domina-
tus ; ſed eatenus propriè Regi ſerui-
re dicuntur , quatenus habere non
poſſunt ius id ſummi imperij , quod
optimatibus communiter intercedit,
alteriusq; poteſtati commiſſi viden-
tur, tanquam ab obeundum hoc mu-
nus per ſe minùs apti. Seruus autem
is dicitur, qui minùs ingenio valet ;
ea mentis vi, & facultate non ſatis
inſtructus, qua rectè ſine adminicu-
lo alterius operari queat, rationem,
& vim operandi totam illi tribuen-
tis . Et quoniam finis etiam opera-
tioni

tioni respondet, quemadmodum seruus pendet ab alio, vt præcipuo agente, sic etiam pendet aliunde in fine assequendo. Nam reuera magis operatur ad finem illius, à quo mouetur, & regitur, quam ad finem suum. Ex quo fit, vt seruus alterius gratia, siue causa; liber autem contra dicatur existere, sua, & eò plenioris quisque compos libertatis, quò minus aliò spectare cogitur, suaq; omnia referre, in utròq; genere pariter, & finis, & efficientis. Ciues ergò, qui versantur in sua Republica communis imperij, & quidem æquo iure participes, non magis alienis commodis seruiunt, atq; suis, neque alterius magis arbitrio, quàm proprio reguntur: parentes autem vni regi, aut supremo Principi, licet ad aliquod munus imperij ab eodem vocentur, omnes tamen illius nutus obseruare coguntur; quandoquidem to-

ra inde pendet ipsorum auctoritas; & præterea conatus omnes, industriã, & studium, ad illius commoda, & amplitudinem præcipuè referre. Quapropter omninò compotes non sunt libertatis, neq; cum illis vlllo pacto conferendi, qui nati, atq; educati in libera ciuitate quidquid imperij, atque iuris comparatum habent, alijs acceptum non referunt, quàm sibi-met ipsis, & peregregiè tueri, atque augere student hoc decus, & ornamentum per manus à maioribus traditum. Quo fit, vt auctores grauissimi accipiant hæc duo, esse in Regno, & in libertate, vt pugnantia, & opposita: & qui Regum imperio parent, eos seruire dicant; liberos autem, & sui iuris ciues Reipublicæ. Quod sanè rationes expositæ aperte demonstrant, in singulos cadere, non modo in omnes generatim. Licet enim contingere sæpe videamus, vt
apud

apud Reges nonnulli valde gratiosi
vsq; adeò floreant cùm opibus, tùm
auctoritate , vt quod ait Creon a-
pud Sophoclem in Oedipo tyranno
τὸ γὰρ πάντες ἔχουσιν , quæ Reges possunt, ea
præstare valeant; hæc tamen res est
paucorum , neq; ad singulos perti-
net, neque manat ex ingenita vi gu-
bernationis, sed ex aduentitia re pen-
det, hoc est illius nutu , quo regun-
tur pariter vniuersa publica, & priua-
ta . Frustra ergo Barclaius lib. III.
vt rem in angustum contrahat, & de
solida Rerumpublicarum libertate
detrahat non nihil, laborat, dum sin-
gulos sub Regibus maiori multò li-
bertate, quàm in populari domina-
tione tradit frui solitos . Id verum
nec ne sit, pugnare nil attinet: satis
est nullatenus attingi Aristocratiā ,
nominatim expressa per ipsum De-
mocratia . Non me latet quosdam
eruditos viros, vt Ludouicum Moli-
nam

nam de Iustitia tomo I. tract. II. Disput. XXIII. Franciscum Victoriam de potestate ciuili num. XI. vtramq; complexos, nō minus esse libertatis in Monarchia, quā in ceteris regiminibus scriptum reliquisse; sed hac vna rōne, ea q; infirma ductos, quod in his plures domini sint, illic vnus tantū. Quasi verò inter plures quoq; tributa non sint, aut principes, aut præfectos, aut duces regia quæque mūnia, nullaq; imposita necessitas ijs obtemperandi. At enim supremi domini nusquam sunt, quippe qui summo imperio vnus omnes continentur. Atque etiam vnus Reipublicę maiestati suos fasces sūmittūt quotquot in ipsa Magistratus, & honores obtinent: quapropter supremi domini appellari nequeunt. Verum tamen in eo fraus omnis, & fallacia latet, quod nullis inficiantibus vnū fore Principatum, siue vnus, siue plu-

res fuerint dominati, supremęq; potestatis rationem minimè multiplicem, nisi materialiter, vt scholę modò loquuntur, hoc est eorum, qui præsunt, habita ratione, quæ res dominatum non variat, neq; in plures diuidit; huius tamen insita vi neglecta, aut posthabita, quæ colligit omnia in vnum, atq; coagmentat, quæritur nescio quid singulare, atq; solitarium, præter id, quod ratio cõmunis ciuilis, & natura postulat. Qua de re cum sit inferiùs adhuc nobis disputandum, pluribus agere in præsentia minime erit opus. Est alius ex recentioribus haud ignobilis auctor Io. Casus Sphæræ li. III. cap. III. qui libertatis nomen ita distinguendum putat, vt ea spectetur vel ex arbitrio, siue voluntate, vel ex ordinis ciuilis, & rationis præscripto: hanc autem libertatem verè existimandam, quæ in Regno primum

vigeat

vigeat, tum inter optimates; illam in populari statu maiorem videri, quæ tamen licentia potius, quàm libertas sit. Veruntamen vtrâq; notio pertinet ad Ethicam, quæ virtutes, & perturbationes animi considerat. Politici est libertatem ita contemplari, quatenus ex altera parte servitio respondet, & operantem primò, ac per se notat in rem sui ipsius, non autem alterius gratia, nisi contingenter, habentēq; in summo imperio non nihil iuris; & hac ratione accipere solent libertatem, quot à Regno secernunt liberas civitates.



*Iustitiam magis vigere in Aristocratiâ, quàm in Regno, contra quàm Iusto Lipsio visum fuit monere. Aristotelis locus, ubi expressè hoc tradidit, à Barclaij calumnijs vendicatus. Quænam ciuilis administrationis labes omnium sit deterrima; Regni-
ne, an Aristocratia, seu Democratia. Sententię Polybij, D. Thomæ Aquinatis, nec non Aristotelis de optima temperatione simplicium formarum, in qua tamen tota regni vis abeat in Remp. Quid sibi velit Aristoteles, ubi statuit, præstare multò legi parere, quàm homini.*

CAPVT QVARTVM.

Non modò inter se concordia, & beneuolentiæ, sed etiam communis vsus, atq; vitæ vinculo coniuncti semper esse debent, & qui parent, & qui imperant. Id verò præstat Iustitia fundamētum virtutum, sine qua prudentia nihil valet, vt ait M. Tullius offi. lib. II. Hanc quoque laudem sibi vendicat Aristocratiâ, quòd in ea magis emineat Iustitia, quàm

quàm in vlllo Regno: Si quidem
habet iudicia magis incorrupta, &
sincera. Negat id Lipsius libr. II.
cap. I. qui tertio loco ita monet: *In
vnius principatu iustitiam magis exer
ceri.* Atqui Aristoteles hoc affirmat,
quod à Lipsio negatur. Vtri ma
gis credendum? Sed argumenta vi
deamus. Arguit ita Lipsius. *Rex,
aut ipse ius dicit, aut qui dicant eligit,
& designat. Si ipse; supra metum, aut
gratiam est; magis auaritiam; & ni
hil istis, quæ præstringere oculos iudi
cantium solent, donat. Si alij; sunt
tamen ab ipso, & cura eligit, & ele
ctis iam superest, & intendit. Non
sunt ijs sic libera iudicia, vt non iudi
cium huius metuant, & si quid sædius
patrent, pœnam. In alio statu quid
simile? Si ad optimates is; factio, &
agnati, & amici occurrent, & alter
nis inter se ius, aut iniuriam gratifi
cantes. Hæc sunt argumenta Lipsij.*

Aristoteles autem ipse longe aliter differit, & exemplo aquæ, cuius difficilius corrumpitur maior vis, & copia, probat iudicia in Rebusp. non corrumpi ita facile: & præter id exemplum eam rationem affert, quia multitudo præsertim non vulgaris, & vilis, sed liberalis, & moribus non nihil exulta, iracundiæ, prauisq; cupiditatibus minùs est obnoxia, quæ peruertere solent mentem, rectumq; iudicium, quàm vnius hominis arbitrium, siue ipsa voluntas, quæ minimo negotio flecti potest, nec non immutari, prout animi libido, cæcaq; cupiditas iusserit. Huic autem non tantum seruire, atq; obsecundare, sed necessariò parere alios oportebit, quotquot à Rege designati fuerint, vel Lipsio teste, qui fatetur, ijsdem iudicia nō sic esse libera, quin iudicium eiusdem, & pœnam quoq; reformident. Quare sicuti falsissimum

num est illud, quod primo loco ponit; Regem supra cupiditates uniuersas esse, ceterasq; animi perturbationes effrenatas; sic etiam non habent locum, neq; vera sunt, quæ de iudicibus à Rege designatis subiicit. Quod autem attexit de factionibus, & agnatis, mutuoq; gratificandi studio inter optimates id etiam quonā modo refelli debeat, Polit. libr. III. Aristoteles docuit, qui propositam quæstionem his verbis concludit.

εἰ δὲ δὴ τοῦτο μὴ ῥᾶδιον ἐν πολλοῖς ἄλλ' εἰ πλείους εἰεν ἀγαθοὶ καὶ ἀνδρες καὶ πολῖται, πρότερον ὁ εἰς ἀδυσίαφθορώτερος ἄρχων, ἢ μάλλον οἱ πλείους μὲν ὄντι ἀριθμὸν, ἀγαθοὶ δὲ πάντες; ἢ δὴ ἅλως, ὥς οἱ πλείους. ἀλλ' οἱ μὲν σασιάσουσιν, ὁ δὲ εἰς ἀσασιάσος. ἀλλὰ πρὸς τοῦτ' ἀντιθετέον ἴσως, ὅτι σπᾶ δ' αἰοὶ πλὴν ψυχῶν ὥσπερ καὶ κεῖνος ὁ εἰς.

Si autem id non est facile in multitudine, nimirum ut incorrupta sint

iudicia, at si fuerint plures viri probi, atq; ciues, utrùm minus poterit corrumpi unus tantum princeps, atq; dominus, an numero plures, & omnes probi viri? Plures certè; ut constat.

At enim hi seditionibus agitabuntur; ille autem à seditionibus liber erit. Sed huic rei fortasse ita erit occurrendum, plures eos viros tam benè, ac præclare animatos fore, quàm illum unum. Notari debet in primis hic Aristotelis locus, quia multa, quæ ad rem nostram faciunt, peregregia continet. Nam primò multitudinis consilia, & iudicia non satis integra, atq; incorrupta esse posse ostendit, quod etiam M. Tullius non semel pro Planc. & pro Murena testatur. Cui enim sunt occulta illa, vel ignota? Populum nō delectu aliquo, aut sapientia duci ad iudicandum, sed impetu nonnunquam, & quadam etiam temeritate; & nullum fretum, nullum euripum tot motus

tus

tus, tantas, tam varias habere agitationes fluctuum, quantas perturbationes. & quantos aestus habeat ratio committorum. Quæ certè non tantum de multitudine aliqua sordida, & agresti, sed etiã liberali, & civili sunt accipienda; nisi quis impudèter pretendere velit, omni vita, omniq; cultu Populum Romanum, neq; excultum, neq; expolitum omnino fuisse; neq; secum modo ita de suis civibus Ciceronem sensisse, sed palàm quoq; ac publicè idem prædicasse. Hoc igitur primum colligimus hic ex Aristotele; nullius esse roboris argumentum id, quod ita regerunt: ergò Aristocratiæ popularem statum præferendum, in quo sint magis incorrupta futura iudicia, propterea quod multò plures iudices existunt. Quasi verò numero tantum sit res metienda, non ratione; ac prudentia, qua præstant optimates. Alterum colligitur à nobis

à nobis superius traditum, quidnam sit respondendum obijcienti, vel coniunctiones, & mutua gratificandi studia, vel dissensiones, ac seditiones inter optimates. Excipitur enim, quod æquum, ac verissimum est; singula spectanda fore, atque examinanda, quatenus integra sunt, & non deprauata; si quidem necesse est, ut ait ipse Philosophus Polit. III. τὰς ἡμαρτημένας, καὶ παρεκβεβηκύνιας ὑσέρας εἶναι τὴν ἀναμαρτήτων πολιτειῶν. *Vitiatas, & degeneres Politias esse posteriores ijs, quæ non sunt vitiatæ.* Huc accedit porrò Respublicas optimè institutas multò difficilius discedere à statu suo, quàm vnius principatum vel optimè constitutū. Est profecto verissimū id, quod vulgò fertur: Neminem fieri pessimum de repente. Sed multò magis cadit hoc in plures, quàm in vnum hominem, qui fieri deterior potest quàm breuif-

breuissimo tēpore, præsertim in summo imperio, vbi parem non timet, & in summa licentia, quæ peccati est maxima illecebra. Exemplo fuerit C. Cæsar, qui Tiberio successit, initio clemens, & popularis, atque satis pius; mox erumpentibus vnâ vitijs omnibus, supra fidem facinorosus, infamis, & perditus. Contigit idem cum Neroni, tūm Domitiano; qui probitatis, & modestiæ edito specimine, in grauissima quæque scelera, extemplò effusi, tyranni tandem euaserunt minimè ferendi. Habet nimirum hoc prospera fortuna, ut afferat quosdā spiritus, atq; animos efferat, vbi res omnes fluunt ad voluntatem, insolentia nimia. Accedit comes arrogantiæ confidentia, & securitas, quæ nedum trahit ad improbitatem, sed ad summam vecordiam, & demum impellit in furem, atq; immanitatem. His autem

tem pestibus non ita facilè sunt propositæ, ideoq; firmiores, ac tutiores optimæ Respublicæ. Atq; hoc ipsū est, quod Aristoteles tradit; Plures posse corrumpi difficilius, quàm vnū. Scio Barclaium lib. I. contra Monarchom. non tantum dissentire, sed et redarguere Aristotelem, tanquam mentientem; quandoquidem ex historijs constare ait, in regimine, vel multorum, vel paucorum nullum grauius, aut frequentius incommodum fuisse deprehensum, quàm quod per corruptelas importaretur, maxime verò per auaritiam, & per ambitionem, quibus facillimè singulos ex multitudine, Reges vix vnquam contingat deliniri, & capi. Nam ij muneribus, & largitione corrumpi qui possint, qui versantur in summa affluentia, atq; rerum copia? quanam verò ambitione ijdem stimulari, qui ad supremum fastigium iam diu

diu peruenerunt? Contrà verò in priuatæ conditionis hominibus has geminas cupiditates herere tam facîle, ut nihil procliuius sit, quàm illos corrumpi. Hinc eas nundinationes suffragiorum Romæ fieri solitas, quæ compulerunt ad exclamandum Iugurthâ Regem apud Salust. in bello Iugurthino. *O Urbem venalem, & citò perituram, si emptorem inuenerit.* Veruntamē si uenalis erat tempore Iugurthæ, citòq; peritura, ut ipse prædicabat, Respublica, descuiuerat utiq; à se ipsa, & degenerauerat, & non erat amplius integra, sed vitia-
ta, & corrupta, atq; ut Aristotelis ipsius verbis utar, *ἡμαρτημένη, καὶ παρεβέλκυία*. Quo fit, ut in eodem Iusto Barclaius hæsitet, in quo Bodinus, & alij supra confutati. Quæ verò de avaritia, & ambitione disse-
rit præcipuè; succūbere minus utriq; vitio Reges, quàm priuatos homi-
nes;

nes ; quàm certa, quamq; vera hæc, profectò nescio . Eorum enim , qui suo còmmodo, non publico ita feruierunt, vt omni diuino, atque humano pessumdato iure , expilarint quàm immanissimè populos subiectos, refertæ sunt exemplis innumeris etates, atq; historiæ omnes. Quid verò de Imperij propagandi libidine dicam, quæ atrocissima bella tã sæpe conflauit ? nonne multò acrioribus stimulis hæc pestis exagitat elatissimos eorum animos , immensosq; spiritus à quibus perpetuò tenetur simul omnia delata, quàm moderatas ciuium mentes, qui per vices imperant, & propterea æquo iure consueuerunt viuere ? Sed gratia disputationis vtrumq; demus, non minùs ambitioni, quàm auaritiæ ad vnũ hominem præclusum aditum , atq; obseptum fore : Quid prauis, & effrenatis alijs affectionibus plurimis, quibus

quibus mortalium animi tantopere infestari solent? Iræ, qua nihil est cōcitatus, nihil turbulentius; Odio, quod in omne facinus impellit crudele, ac nefarium; Amori, qui mentem excœat, tam sui, quàm suorum; Audaciæ, quæ quò magis eminet, eò deterior est; Metui, atq; suspitioni vel animo ingentæ, vel à malignis, & peruerfis hominibus fraudulenter iniectæ, quæ multorum, magnorumque malorum sæpe causam præbet? Hæc omnia nonne multò faciliùs, atque vehementiùs occupant vnius hominis sensum, quàm plurimorum, tantoq; altiùs insidere solent in magnis principibus, quò maiora commoda suppetunt illis, maioraq; adiumenta, quodcunque destinauerint animo facinus exequendi in summa licentia, potestate, atq; impunitate? Quamuis igitur minùs Reges, quàm quisq; optimatum cū
ambi-

ambitioni, tùm auaritię forte manus darent; quod quidem non adeò certum est, vt controuerti non debeat; tamen argumentari nullo modo licet ex duabus rebus tātummodo ad genus vniuersum, cum pręterea sint adhuc alia non pauca, nec parua, quibus hominum mentes, atq; studia deprauari queant: neq; vero dū taxat ea, quę allata, vt pręcipua, sed alia quoq; ex ijs capitibus deducta, atq; propagata; arrogantia, procacitas, peruicacia, inuidia, fraudes, & perfidia. Adde voluptatum illecebras, inertiam, insatiabile abdomē, & flagitia cetera, prętereaq; assentationes, amentiam, & furorem pręcipitem. Nunquid hę pestes magis in alios, quàm in Reges grassantur? Optarem certè prorsus ita rem se habere; sed vereor, vt suffragentur exempla, si minùs rationes. Quàm multos enumerando complecti liceat,

rit, qui sese inuictos præstiterint ab his monstribus? Euolue annales; excute monumenta, & vetera, & noua; circumspice florentissima quæq; imperia, atq; regna; quoquò te vertaris, haud multò plures intuebere, quàm qui facilè valeant, vt aiebat ille, in vnus annuli pala simul omnes scalpi. At Respublicæ modò tres (vt aliæ taceantur) Atheniensium, Spartanorum, atq; Romanorum, antequàm degenerarent ab infita probitate, fontes, & seminaria extitisse nouimus temperantiæ, modestiæ, ac virtutum omnium. Non igitur sine causa scribit Aristoteles; plures corrumpi quàm vnum difficilius esse: neq; id erat à quoquam temerè in dubium vocandum, ac multò minùs asseueranter improbandum, & reiiciendum. Quod enim tanquàm absurdissimum Barclaius hinc colligit, præstantiorem fore gubernatio-

H nem

nem plurium, quàm vnus; hoc à nobis contenditur, atq; in præsens vrgetur. Neq; verò satis idonea ratione infirmari, neq; vlla inconstantia potest eleuari, cuius idem insimulare audet Aristotelem, propterea quòd scribens ad Nicomachum lib. IIX. cap. X. cū tres regiminis formas enumerasset, Monarchiam, Aristocratiam, & Timocratiam, omnium optimam statuerit esse Monarchiam. Nā ibidem suum sensum explicat, atque ostendit Philosophus, id accipi non debere de alia Monarchia, quā quæ solet effingi, vt exēplum quoddam. Sic enim ait οὐ γὰρ ὁ βασιλεὺς ὁ μὴ αὐτάρκης, ἅπανσι τοῖς ἀγαθοῖς ὑπερῆχων, ὁ δὲ τοιοῦτος ὁ δεινὸς προσδεῖται. Non est enim Rex, qui non sit per se sufficiens, atq; omnibus bonis multum antecellat. Talis autem nullius indiget rei. Eiusmodi cerrè Regem hoc loco descriptum, qui sit in-

stru-

structus ornamentis cunctis animi;
atq; corporis, diuitijs quoque, & co-
pijs omnibus abunde paratus, vt cu-
mulatis his bonis omnes nimium
quantum superet, quis non videt in
eo genere Monarchiæ designatum
iri, quæ ad exemplar diuinæ guber-
nationis instituta, vt diximus, pro-
ponitur ad contemplandum vt abso-
lutissima? Equidem illa duò, quæ
Regi tribuuntur, vt nullius rei sit in-
digens, sed omnino αὐτάρκης & suf-
ficiens, vix vlli mortalium conueni-
re hac in vita possunt. Hæc autem
licet vt exempla supponi queant ab-
solutissimæ, ac præstantissimæ Mo-
narchiæ, qualis tamen re ipsa nulla
vspiam existit, sed animo, & cogita-
tione tantum continetur; nihilomi-
nus vniuersum genus Monarchiæ,
cuiusmodi viget, ac vigere potest in-
ter cœtus hominum, nullo modo
anteferre licebit Aristocratiæ, quæ

propterea est in primis apta rationi
 ciuili, quia communi naturæ quàm
 maximè congruit, hoc est vtriq̃ue
 cōioni superius expositæ, quodq̃;
 præterea confert ad stabilitatem, a-
 git ea fundamenta, vbi sedem ha-
 bet, quæ non qualibet impulsione,
 aut agitatione, secus atq̃ue Mo-
 narchiæ contingit, facilè mouentur.
 Sed cum ijs hæctenus, qui ab Aristo-
 tele dissentiunt, sermo nobis fuit. Re-
 liqui sunt, qui non grauate hoc as-
 sentiri videntur; *Multò facilius unum*
hominem vitiari, quam plures; sed
 aiunt hominum vitio adscribi oport-
 ere, cum nullius virtus absoluta, cu-
 mulataq̃; existat: contrà verò quidā
 contendunt, ac probare nituntur, id
 argumentum esse præstantiæ, ac no-
 bilitatis, Aristotelicumq̃; illud Pol.
 lib. IV. libenter vsurpāt. ἀνάγκη τὸ
 μὲν τῆς πρώτης, καὶ δευτέρας, παρὲν
 βασιμ εἶναι χειρίσω. *Necessarium*
est

est, ut prima, ac maximè diuina admistrationis labes omnium sit deterrima. Ex quo tyrannidem mox colligit idem esse quàm deterrimam.

Veruntamen aliqui adsunt Monarchiæ patroni, qui multò maiora incommoda existere disputant ex Aristocratia vitiata, quàm ex vlllo Regno. Hæc autem discrepant inuicē *ἡ δ' ἵς δ' ἰὰ πασῶν bis per omnia.* Sed quoniam causari possunt, esse cuiq; integrum, quæ sibi videatur potior, illam viam insistere, operæ, credo, pretium est hos aggredi singulos, excussiq; ex ipsorum manibus, aut extortis telis, inter se diffidentes facilius obruere. Nam qui conditionē humanam commiserantur, & misérias communes non tantum deplorant, sed cogitatione detrahare saltem ipsa student, quando re id assequi, ac præstare nullo modo possūt, tam ieiuni, maligniq; animi esse nō

oportet, ut uni, aut alteri tantummodo consultum velint, ceteros omnes plane vacuos, atque inanes relinquāt. Itaque si ex tam benigno fonte, atque adeò inexhausto, si non tantumdem ad singulos, qui nonnihil sapiunt, quod equitati cum primis consentaneum foret; at certè, quod huic est proximum, deriuari sinant, quantum videtur opus fore Aristocratiae; ita res integra nobis adhuc reservabitur. Nam re pro aequitatis ratione probe temperata, ut cumulatior existat vnius hominis virtus, quam ceterorum omnium, fieri numquam poterit. Culpantes igitur humanam imbecillitatem ita dimittamus. lactantes porro sermonibus crebris illud axioma. *Vbi corruptum fuerit, eò deterius euadere, quod unumquodque praestantius in suo statu fuerat*: Vtrū sibi concedi velint, de ipsis quaerirè; Regnine labem maiorem, an vllius

vllius Reipub. ? Nam si prius illud v-
demus non modo postulant, sed vl-
trò sibi sumunt vel inuitis nobis; de-
finant ergò in posterum id vocife-
rari; *satiùs esse tyrannum unum per-*
peti, quàm multos, eoq; nomine Res-
publicas vniuersas damnare. Sin
hoc tueri præfaciè animum induxe-
rint, alerum certè nobis relinquere
omnino cogentur, atq; ita è manib.
amittent, immò verò ad nos transfe-
rent argumentum illud præstantiæ,
ex minori labe. Sed Aristotelis, in-
quies, auctoritas obstat. Cur igi-
tur quæ constare non possunt, ea cõ-
iungis, ac socias; esse, ac non esse pa-
riter summam hanc, atq; illam labè?
Quin expedire pergis rem, quomo-
do se habeat? Aristoteles enim pro-
culdubio differit eo loco, non de qua-
cunque regni specie vñitata, & vulga-
ri, sed quæ disertè uocatur *πρώτη, καὶ*
δευτέρα *precipua*, & maxime diui-

na. Fac aliquem consilio, ac mente
 usque adeò valere, ut quàm longis-
 simo interuallo post se omnes relin-
 quat, immò ad naturam diuinam
 quàm proximè accedat: certè quæ
 tam ingentem virtutem corruppe-
 rent, ea vitia summa oporteret esse,
 atq; ita violenta, ut non modo im-
 pressionem quàm acerrimam face-
 rēt, sed conuellerent animum pror-
 sus de suo statu, immanitate vehe-
 menti quadam efferatum. Quod
 autem sibi nihil aliud velit Aristote-
 les ex his, quæ ibidem attexit, ma-
 nifestò constat. τὸ δ' ἐ βασιλείᾳ
 ἀναγκᾶν ἢ τὸ νομᾶ μόνον ἔχειν ὅκ
 σταν, ἢ διὰ πολλῶ ὑπεροχὴν εἶναι τὸ
 τὸ βασιλεύοντος. *Necessarium est, Re-*
gnum aut, re ipsa cum nihil sit, nomen
tantum habere, aut quatenus multum
præcellit is, qui regnat, existere. Cu-
 iusmodi verò solet esse Regnū apud
 homines, de corruptione, labeq; ip-
 sius

fius ita est differendum, vt si amiffio fpectanda fit vniuerfæ formæ, illius nimirum *τάξεως*, *ordinationis* qua ciuilibus administratio tota continetur, longè grauior futura fit confufio omnium rerum in quauis Republica vitiata, quàm in vlllo regno, propterea quod inclinabunt omnia eis *τὸν ἀναρχίαν* *principatus vacuitatem*. Sin autem amiffio tantùm illius propriæ formæ, qua fingulæ fpecies infignitæ, ac diftinctæ funt; multò quidem facilius continget, ac fæpius, vt degeneret regnum in tyrannidem, quàm in Oligarchiam Aristocratia; qua de re pluribus à nobis difputatum fuit. Sed quoniam ratio ciuilibus administrationis, quamuis deprauata, & corrupta, conftat tamen adhuc; idcirco meritò cenfetur minùs grauis ea labes, quàm quæ omninò confundit, ac perdit vniuerfum ordinem, tametsi multò difficilius

lius hoc sit euenturum, nec nisi longissimi temporis decursu. Sed inter ipsas Respublicas id plurimum interest, quòd in Democratia manat latius, atq; ad plures pertinet vis, & contagio vitij, malorumq; omnium; in Aristocratia verò multo atrocius grassatur. Si quidem populi ardor omnis citò deferuescit, vbi præsertim duces nulli sunt locupletes, ac nobiles. Qui verò pollent opibus, atq; auctoritate, diu, multumq; soliti sunt alere conceptum furorem, & exercere intolerabilius cuncta pessumdando. Quo fit, vt huius quidem labe, *Intensivè*, illius autem *Extensivè* deterior appareat. Nam retinere iuuat compendij, causa vocabula in scholis vsu iam pridem recepta. Vtraq; certè id conatur, atq; eò sensim tendit, vt administrationis civilis labefactet vim, quod malum est longe grauius, quam tyrannis vlla.

Veruntamen hoc omne periculum multò longius abest, & antequam peragatur facinus, immò verò inchoetur, cum plurimi, tum maximi semper opus habet, & operis, & temporis, & conatus. At Regnum quàm facillimè in tyrannidem labitur; quippe loco sitæ res eius admodum præcipiti: quo in genere concedit plurimum Aristocratix. Non me fugit, Polybium auctorem grauissimum, & longo rerum usu, prudentiaq; eximia, & liberali omni peritia, atq; disciplina, simplices omnes formas, & non vnum regnum, eodè nomine pariter improbasse, quod sint obnoxie facili vitio, ac deprauationi. Laudatur enim Lycurgus ab eo quàm qui maximè in Spartanorum Repub. constituenda lib. VI. συλλογισάμενος, ὅτι πᾶν εἶδος πολιτείας ἀπλῶς, ἢ ἡπλῆς, ἢ ἡμίαν συνεσθῆκε δύναμιν, ἐπισφαλὲς γίγνεται διὰ

ὁ ταχέως εἰς τὴν δίκειαν, καὶ φύσει
παρεπομένῃν ἐκτρέψας κακίαν.

Quæ in Latinum conuertere, atque
interpretari, non est, quod ego, aut
quisquam speret accuratiùs, quàm
recens ab Isaaco Caufabono est fa-
ctum, viro ad omne scriptorum ge-
nus & Latinè, & Græcè, in primisq;
ad antiquitatem vniuersam, & ab-
strusissima quæq; illustranda, nec nō
eruenda, proindeque ad laudem, &
ad gloriam immortalem nato. Eius
ergo interpretatione libētissime vtar.

*Statuerat, inquit, apud se, quam liber
Reipublicæ formam simplicem, & uno
genere constantem periculosam esse,
quia faciliè ad proprium sibi vitium,
quod ipsum natura comitatur, defle-
ctit. Hac ergo ratione adductus idē
legislator. ὅχ ἀπλὴν ὁδὸν μονοειδῆ σὺν
νεσίσατο τὴν πολιτείαν, ἀλλὰ πάσας
ὁμᾶ συνήθροιζε τὰς ἀρετὰς, καὶ τὰς
ἰδιότητας τῶν ἀρίστων πολιτευμάτων.*

Non

Non simplicem, neq; uniformem Rempublicam constituit, sed optimarum quarumque Rerumpublicarum virtutes omnes, ac proprietates in unum copulauit. Atque hoc ipso Lycurgi exemplo Polybius vsus de optima forma gubernationis eam sententiã tulerat. ὁ ἥλουν γὰρ, ὡς ἀρίστων μὲν ἡγετῶν πολιτείαν τὴν ἐκ πάντων τῶν προειρημένων ἰδιωμάτων συνεσῶσαν. Eam Rempublicã censeri debere optimam liquidò constat, quæ ex omnibus illis, quas diximus, formis sit composita. De simplicibus autem formis superius meminerat, quas utiliùs, ac meliùs censet vnà permisceri. Quæ doctrina consentanea est Aristotelicæ. Nam Polit. II. ita scriptum est; ἡ ἐκ πλείονος συγκεκμηνη πολιτεία βελτίων. Quæ conflata Respublica ex pluribus, ea melior est. Sic etiam D. Thomas & sincera doctrina, & sanctitate insigni auctor celeberrimus prima II. quæst.

quest. C V. art. I. optimam tradit
Politiam eam existimandam, *quæ*
probè commista sit, atq; temperata ex
Regno, Aristocratia, & Democratia,
cuiusmodi censet fuisse Hebræorum
Rempublicam, antequam Saul pri-
mus Rex constitutus esset. Licet
autem simplicium formarum inter
se contentio non eadem planè futu-
ra videatur, quæ cum multiplici re-
gimine fit ipsarum collatio: neq; ve-
rò hoc in præsentia querimus, sed il-
lud: nihilominus ex hoc animaduer-
tere, & colligere licet, quanta sit Re-
rumpublicarum excellentia, & di-
gnitas, quæ propriam, atq; insitam
vim perpetuò retineant, siue simplex
ipsarum forma, & vnius modi exi-
stat, siue cum regno coniuncta, atq;
temperata. Hac enim temperatio-
ne tantum abest, vt aliqua diminu-
tio vel exigua fiat de firmitate, atq;
robore illarum naturæ, vt accessio-
nes

nes magis afferantur non leues, ipsaq; ingenita vis multò se acriùs incitet, ac non modo regni omnē vim frangat, & debilitet, sed immutet omninò, atq; in se conuertat. Nam vbi sociatur regnum Reipublicæ, neq; ex arbitrio suo Rex cuncta moderatur, sed ex præscripto legū, quas tueri debet, etsi obtinet consuetudo, vt regnum dicatur, reuera tamen nō Regnū, sed Respublica existit: atq; hoc manifestissimè Aristot. tradit.

ὁ μὲν γὰρ κατὰ νόμον λεγόμενος βασιλεὺς ἔκ ἐστιν εἶδος, καθάπερ ἔπομεν, βασιλείας. ἐν πάσαις γὰρ ὑπάρχειν ἐνδέχεται στρατηγίαν αἰσίου, ὅιον ἐν δημοκρατία, καὶ ἀριστοκρατία, καὶ πολλοὶ ποιεῖσιν ἐνακύνειον καὶ διοικήσεως.

Nam qui ex lege Rex dicitur, non est regni species; ut diximus. Nam in cūctis Rebuspublicis vsuuenit, vt sit rerum bellicarum imperium perpetuum, vt in Democratia, & Aristocratia; &

multi

multi creant unum, penes quem summa administratio. Cum autem genus illud regni, siue Monarchiæ, quod appellatur ibidem *παμβασιλεία* plenū regnum ea ratione Polybio, nec non D. Thomæ, quia simplex est, atque vniusmodi, non satis probetur, hoc est, nulla cum Republica iunctum societate; tū verò ab Aristotele deprimitur hoc præcipuè argumento, quòd ibi Deus videatur, vbi lex imperet, at quibus homo dominetur, ijs bellua præesse. Qui verò collationem hanc hominis cum lege, vt minùs aptam, & legitimam, & reprehendunt, & damnant, propterea quòd hæc, inquiunt, silet, ille verò loquitur; hæc per se nihil valet aut prestare, aut agere, ille munera cuncta sustinet, atq; impigrè obit; huius deniq; nulla vis est, nisi præsto adsit, qui ferat eidem opem, atq; adijciat robur: hæc, & eiusmodi quicūq;

Ari-

Aristoteli obijciunt, eius mentem, atq; sententiam minimè assequuntur, immò, vt est in adagio vteri; tota aberrant via. Nam propterea legem Philosophus cum homine contulit, quia legi videntur magis parere, quàm homini, qui parent ex decreto legum res administranti. Si enim princeps, est verè custos, & minister legis, vt est Polit. lib. III. cuius mandata debet exequi, ac peragere; totam verò efficiendi vim primò illi tribuendam, à quo motionis est principium, iure censent Philosophi. Nimis autem absurdum, atq; stultum foret, legi tantùm ab homine seiunctæ committere ciuitatem regendam velle; neque id vel somniauit vnquam Aristoteles; sed vt ostendimus, propositis duabus formis regni, quarum altera suum Regem habeat legibus solutum, & ex arbitrio suo res omnes gerentem, altera

tera legibus obstrictum, vt sit
in Republica; dum probat ex
præscriptione legum multò melius
esse, quàm ex hominis arbitrio pen-
dere, atq; regi, sententiam suam de
optimo genere principatus tam ma-
nifestè profectò enunciat, ac prodit,
vt nullus amplius ambigendi relin-
quatur locus.

Cuiusmodi rerum status apud Hebræos
fuerit, antequam Saul primus Rex elige-
retur, allatis auctorum varijs in medium
sententijs, vbertim, & accuratè disputatur.
Opiniones duæ præcipuè examinantur; alte-
ra Caietani; altera Toslati. D. Thomæ sen-
tentia, & Sigonij probatur. Sacrarum lit-
terarum testimonio superiore proximo capite
tradita confirmantur.

CAPUT QUINTVM.

M Vltis egregijs rationibus atq;
testimonijs, in Rebus publi-

cis iustitiam maxime vigere, verissimumque fore illud Axioma; *Mul-
tò facilius unū deprauari, quàm plu-
res*; euicisse nos hactenus persuasum
habeo. Sed licet in hanc sententiam
multa allata fuerint, & tantum non
res ipsa oculis subiecta; cum tamen
auctoritas diuina sanxerit id ipsum,
cui non habere fidem nefas, repu-
gnare est amentia, sciens, prudensq;
prætermittere hoc nullatenus debeo.
Haud me præterit, alijs alia sentien-
tibus, quæ sumenda sunt testimonia
ex diuinis litteris in discrepantes sen-
tentias ab interpretibus trahi. Mihi
quantum ad stabiliendum illud sa-
tis erit, de quo proximo capite disce-
ptatum fuit, tantum ex eorum fonti-
bus sufficiat haurire. Vt autem rem,
quæ est in manu, commodius ape-
riam, operæ pretium fuerit, paulò
altius repetere, & de Repub. Hebræo-
rum nonnulla edisserere. Tamen si

enim ad præsens institutum nostrū ,
cuiusmodi fuerit priscum gentis il-
lius regimen cognoscere , non ita
necessarium esse arbitror , vt alioqui
nos omnes probationes deficiant ,
quibus propositæ rei fidē faciamus ;
hæc tamen eadem exploratio , ac
testatio erit , quo plura vel aucta-
rij , vel cumuli loco ad eam illustran-
dam , corroborandamq; accessura
sunt . Priusquam insanirent Hebræi
Regis desiderio , inter omnes aucto-
res conuenit , & constat , ita Kempu-
blicam eo tempore constitutam fuis-
se , ut qui præesset eidem regendæ , ac
tuendæ , ij nullam dominationem
haberent in populo . Nam sacrarum
litterarum interpretes duo præcipuè
notant , quibus a Domino Iudex di-
stinguebatur : Alterum , quod ille
arbitratu suo moderari omnia , huic
à legum præscripto discedere nullo
pacto licebat . Alterum , quod Domi-

no succedant, aut filij, aut nepotes, aut qui propinquitate maxima sunt cum eo coniuncti; ludici verò neq; filij, neq; consanguinei, sed alij omnes & quidem vt plurimum ex diuersa tribu. Tria verò genera ludicum explicant, quę fuerint. Vnum eorum, qui de causis cognoscerēt, ac sententiam ferrent. Alterum, quod creare Deus ad ea solitus esset, vt ab hostibus liberaret populum, atq; vēdicaret, auctoritate quoq; sua quietem tueretur, & contineret vniuersos in fide, atq; obsequio in Deum. Postremum genus eorum, qui sic vocarentur, quod populus frequens assiduè conueniret eos, vt moyses est Hebræorum loqui, *Iudicij causa*, hoc est inquirendæ, cognoscendæq; studio veritatis; quippe quibus arcana multa patefierent a Deo. Hoc autem in numero Deborah fatidicam ponunt, & quot quot consulebā

tur extra ordinem grauib; de rebus. In secundo Præsides Reipublice, atq; in bello Duces, quorum gesta continet is liber, cui nomen dederunt. In primo cum minores, tum maiores iudices. Minores vocant, qui singulis ciuitatibus; Maiores, qui pariter omnibus ius dicebant; sed aut ex prouocatione, aut ex ampliatione, cum Iudices minores rem non expedirent. Fuit hic Senatus celeberrimus septuaginta virum, posterioribus temporibus Sanedrim vocatus à Græca voce συνέδριον concilium, ab Hebræis corrupta. Muneris omnium Iudicum accurata descriptio Deut. XVII. continetur: ac superiori quidem capite Iudicum minorum; Num. autem XI. institutio, & creatio maiorum. Atq; hoc fuit Hebræorum regimen, hic status diuino monitu, atq; iussu à Mose ordinatus, antequam eius peritæ expectarent

terent Regem. Vtrum verò status
eius Reipublicę eiusmodi fuerit, vt
Respublica verè foret appellanda,
nempe vel Aristocratia, vel Demo-
cratia, an potius Regnum quoddam
extiterit, siue Monarchia, ancipites
admodum fuerunt hac de re senten-
tiæ. Barclaius quidem nrat, neque
sibi constat. Lib. II. tradit eum statu
Monarchiæ fuisse, in quo Deus esset
summus Rex, homo vero Prorex;
lib. IV. cap. VI. tempus dominatum
regium antecedens ad popolare im-
perium manifestò refert. Ait enim
*à populo illo sui potente res ferè omnes
eo tempore geri consueuisse communi-
bus consilijs, atq; suffragijs sine Duce,
vel Principe.* Carolus autem Sigo-
nius vir apprime doctus, qui de Re-
publica Hebręorum septem libros
scripsit, eosdemq; Pont. Max. nuncu-
pauit, vbi de forma Reipublicę Israe-
litarũ ex professo agit, quod caput

est ordine V. lib. I. his planè verbis inchoat, quæ duxi exscribenda. Sequitur, ut de forma Reipublicæ disseram, quam Deus aut superiore lege præscripsit, aut post induci neglecta lege permisit. Ceterum cum de forma Reipublicæ quaeritur, nihil aliud quaeritur, nisi penes quem principatum summa rerum fuerit constituta. Hec verò apud Hebræos primum penes optimates posita fuit, deinde penes Reges; quorū principatū illum Aristocratiam, hoc Regnum Græci vocarunt. Aristocratia fuit sub Moyse, Iosue, Senioribus, & Iudicibus. Regnum sub Regibus. Quatuor, ut patet, hic auctor tempora proponit, quibus Aristocratiam putat locum habuisse, quæ prosequitur ordine singula, & deinceps probat: Iosephi quoque gravissimum testimonium affert, qui lib. IV. Antiquitatum Mosem ipsum inducit, ad populum hac rōne verba facientem.

*Aristocratia, & vita, quæ ex ea degi-
tur, res optima est: nec vos capiat desi-
derium alterius Reipublicæ, sed hanc
amate, leges habentes dominas, ex his
omnia facientes. Satis enim est, vt
Deus præsit. Quod si Regis cupiditas
vos incesserit, is ex eadem gente sit.
Ab Iosepho, & Sigonio nõ multum
abesse celeberrimum illum interpre-
tem Diuinarum rerum, cui nomen
est Alphonsus Tostatus, ea verba de-
clarant in cap. II. X. lib. I. Regum
Quæst. IV. quæ recitabuntur inferiùs
opportuno loco. Diuus autem Tho-
mas Aquinas, vt superius memini,
cum optimam Politiam statuisset il-
lam, quæ constaret ex omnibus for-
mis probè temperatis, Regno sci-
licet, Aristocratia, & Democratia.
Et hoc, inquit, fuit institutum se-
cundum legem diuinam. Nam Moy-
ses, & eius successores gubernabant po-
pulum, quasi singulariter omnibus prin-
cipantes.*

cipantes, quod est quedam species regni. Eligebantur autem septuaginta duo seniores secundum virtutem. Dicitur enim Deut. I. Tuli de vestris tribubus viros sapientes, & constituite eos principes: & hoc erat Aristocraticum. Sed Democraticum erat, quod isti de omni populo eligebantur. Dicitur Exodi XIX. Prouide de omni populo viros sapientes &c. Et etiam quod populus eos eligebat. Vnde dicitur Deut. I. Date nobis viros sapientes &c. Vnde patet, quod optima fuit ordinatio Principum, quam lex instituit. Hec D. Thomas de regimine veteri Hebræorum, quæ si adamussim Aristotelicam exigantur, Regnum cum Republ. mixtum, atq; temperatum ad Rempublicam proprie reuocantem, nec obscurum, nec dubium potest esse, quin hic auctor cum Sigonio, & Iosepho faciat. Caietanus à duce suo sine causa discedens, in opusc. Ientac. III. de Sacerd.

Sacerd. primus omnium fuisse mihi videtur, qui Regni quandam specie excogitarit, & quidem *temporalis* ut ipse loquitur, in qua supremum Regem ita Deum poneret, ut nullus homini alicui relinqueretur, nisi Vicarij, aut certè Proregis locus, quales extiterint omnes Duces, atq; Iudices, quicunq; rebus præfecti fuerint usq; ad Samuelem. Caietani hanc sententiam libenter amplexos, & doctos, & magnos viros complures video, qui scribunt Hebræis de Rege nullo cogitare, cum Deum haberent Regem, licitum fuisse; de quo à Samuele admonitos, graviterque reprehensos, agnouisse tandem ipsos errorem suum, quo peccata commissa omnia commularint. Quid autem fuerit, quod peccarint, & reprehensi fuerint, nihil aliud neq; apparere, neq; statui posse, nisi flagitiū illud ingens, quod factum fuerit

à Deo

à Deo Regnū in hoēs transferēdo.
Fidem quoq; huius rei facere opinā
tur, & quæ Deus exposulauit cum
Samuele I. Reg. cap. VIII. *Non abie-*
cerunt te, sed me ne regnē super eos : &
quæ Samuel vniuerso populo palā
exprobrauit cap. XII. *Dixistis: Rex*
imperabit nobis ; cum Dominus Deus
vester regnaret in vobis. Quibus e-
tiam, quæ Gedeon lib. Iudi. C. VII.
excusauit, per me accedant licet.
Non dominabor vestri, nec dominabi-
tur in vos filius meus ; sed dominabi-
tur Dominus. Hæc sunt, quibus emi-
nentissimi viri persuasi videntur, ut
non aliter regnasse Deum olim apud
Hebræos, atq; Reges in subiectos
populos fuerint arbitrati. In tanta
Catholicorum scriptorum varietate
illis me comitem adiungere liceat
mihi obsecro, quos vero magis dice-
re similia comperi. Quod igitur He-
bræorum Politia prorsus eadem, quæ
opti-

optima, cum D. Thome, tum alijs quoque visa fuit; id non ita exploratum, atque certum est, ut meritò reuocari nequeat in dubium, atq; controuerti. Nam si agros omnium feracissimos, atq; saluberrimos, ut habuerint Hebrei, nihil est necesse, cum tractus ille Palæstine, quem coluerunt, & ubertate frugum, & clementia celi, cum terris alijs, tum Indiæ facile concedat: quid optimum omnium regimen, ac præcellentissimum necesse habemus illi populo attribuere? cum præsertim Mosaicę legis solennes ritus, vnàq; iudiciorum vniuersa ratio, quâ principatus ille totus nitebatur, omninò fuerit antiquata, non modò immutata. Quod autem temperatum id regimen censet extitisse, confusumq; triplici genere administrationis, cum certum sit non tollere vim ipsius Reipublicę, in hanc sententiam concedere

re

re minime grauabor, à qua non dissentire Sigonium, & Iosephum arbitror. Caietani verò sententię cur nolim subscribere, multę rationes, ni fallor, satis ualidę faciunt. Nam cognoscere ab ijs, qui eum sequuntur, aueo, qua ratione hæc sententia cohærere valeat cum ijs, quę Iudicum libro repetuntur identidem. *In diebus illis non erat Rex in Israel, sed unusquisque, quod sibi rectum videbatur, hoc faciebat.* Equidem quādiu præcipuus Dominus, & Rex summus adest, quamuis forte vicarius, siue prorex desit, dici verè non potest Rex nullus esse. Quid? Quod ex interpretibus alij ad *ἀναρχίαν*, *vacuitatem principatus*, alij ad Rempublicam præcipuè eam sententiam referunt: vtrumq; verò his auctoribus aduersatur æquè. Nam siue omni rectore destituti erant, & summa rerum penes nullum princi-

patum; siue continebantur Hebræi-
aliqua Republica oportet, aut Re-
gnum Dei nonnumquam abolitum,
quod tamen, credo, permittere ne-
fas ducunt: immò affirmat Caieta.
ibid. vsq; ad Saulem semper id mā-
fuisse: aut certè contra atque censent,
hoc non effecisse, vt vel de medio tol-
leret, & labefactaret, quæ tunc vige-
bat Respublica, eius propriam ratio-
nem, vel ex vna in alteram formam
migrare cogeret. Et verò ita rem se
habere hoc perspicuè arguit, quòd
D. Thomas temporibus illis tribuit,
non aliquod proprium Regnum, sed
Regni speciem, quā et spectandam
sibi proposuit nō ex vlla realia, quā
ex persona Moïsis, atq; successorum:
cum tamen expeditum foret, immò
necessarium, si quidem idem sensis-
set de hoc Dei Regno, quod isti po-
stea opinati, cōmentiq; sunt; à Deo
regni rationem venari, atq; sumere.

Sed

Sed argumenta proposita iam excutiamus, quæ cum omnia sint leuia, infirmaq; admodum, tùm verò quod primo loco, vt præcipuum affert. Præterquam enim quòd tanquã notum, & probatum assumit, quod accuratè probandum erat, atq; enucleãdum; ita rationem abiēcisse Hebræorum populum, vt extorquere constituerit gubernacula Deo, vt committeret eadem nescio cui homunculo, quo nihil fingi potest amentius, nihil sceleratius: quàm porro illud ridiculum, atq; ineptum est, à genere vniuerso ad formam sic argumentari. *Populus ille reprehensus est, atq; peccauit: ergo reus maiestatis factus est, quatenus à gubernaculis Regem suum amouit.* Quasi verò alio nullo nomine reprehendi, nullaq; alia ratione peccare potuerint. Afferre quidem non paucas interpretes solent, sed satis est in præsens attingere

re

re duas. Alteram, quod auctoritatem diuinam nihili duxerunt, administrationis ea forma minimè contenti, quæ fuerat à Deo commendata, atq; adeò instituta: hanc verò fuisse Aristocratiam persuasum habemus. Alteram, quod multò plus, & fiduciæ, & spei collocarunt in Rege, quàm in Dei patrocínio, firmoq; præsidio: atq; hoc est, quod vrget admodum Samuel vsus ijs verbis Reg. I. C. XII

Et misit Dominus Ierobaal, Badan, & Sanson, & Barach, & Iephthe, & Samuel, & eruit vos de manu inimicorum vestrorum per circuitum, & habitastis confidenter. Videntes autem, quod Naas Rex filiorum Ammon venisset aduersum vos, dixistis mihi; Nequaquam; Sed Rex imperabit nobis, cum Dominus Deus vester regnaret in vobis. Hæc autem eo, quo dixi, modo esse accipienda, ex ijs, quæ scribit Toftatus, facile perci-

pitur, in cap. hoc XII. quæ. XI. *Volebāt, inquit, Regem ad hoc, quod liberaret eos à periculis bellorum; quasi intelligentes, quod aliàs non possent liberari, nisi Regem haberēt. Sic patet supra cap. VII. scilicet. Rex enim erit super nos, & erimus nos quoq; sicut omnes gentes, & iudicabit nos Rex noster, et egredietur ante nos, & pugnabit bella nostra pro nobis. quod magis patet infra in littera, scilicet. Videntes, quòd Naas Rex Ammon veniret aduersum vos, dixistis; Nequaquam, sed Rex imperabit nobis. Quasi dicat: non poterimus habere alium principatum, per quem eruamur ab hostibus, nisi per Regalem. Sed adest multò locupletior testis, quàm Tostatus. Is est D. Hieronymus in Oseam Prophetam cap. XIII. quo loco iuxta editionem LXX. interpretum explicat hæc verba. *Vbi est Rex tuus iste? & saluum te faciat in cunctis urbibus tuis: indi-**

cet te, de quo dixisti. Da mihi Regem,
 & Principem; & dedi tibi Regem in
 ira mea, & tabui in furore meo. Hæc
 igitur D. Hieronymus interpretans
 ait. *Vbi est Rex tuus?* de quo dicebas
 ad Samuel; *Constituere super nos Re-*
gem, ut iudicet nos, sicut & gentes ha-
bent ceteræ; cumq; ille contradiceret,
respondebatur. Nequaquam; sed Rex
erit nobis, & erimus etiam nos, sicut
& gētes omnes, & iudicabit nos Rex
noster, & egredietur ante nos, & pu-
gnabit pro nobis. De quo tibi ergo pro-
miseras, quod tua bella bellaret, nunc
in necessitate subueniat, & vniuersas
urbes tuas liberet de seruitute. Quid
ergo peccarint Hebræi, manifestum
est. Quod spectat ad expostulatione-
nam illam Dei cum Samuele; Non
abiecerunt te, sed me, ne regnem super
eos; nihil est opus interpretationem
comminisci nouā; multiplices enim
non desunt apud insignes auctores.

Vnam D. Gregorij iam superius attul; alteram quoq; afferre hoc loco minime grauabor, quæ rem, vt habet vetus adagium, acu propè tangit. *Notandum, inquit, quia abiectionem propheta Dominus suam facit. Non enim simpliciter dicit; Abiecernunt me, ne regnem super eos: sed, non te abiecerunt, sed me, ne regnè super eos; vt profectò ostendat, quia in persona electi præsulis ipse suis subiectis præeminet, & cum ad spiritale culmen delectorum carnalis rector assumitur, ipse abiecti videtur, cuius præcepta dissipantur. Ergò quàm reuerendi sint optimi pastores sanctæ Ecclesiæ, liquet. Ecce enim dum fideliter Deo seruiunt, tanto ei amoris vinculo coniunguntur, vt quidquid eis ingeritur, diuinæ iniuriæ adscribatur. Vnde & in Evangelio primis Ecclesiæ pastoribus dicit. Qui vos spernit, me spernit. Addam postremo egregiam Caroli Sigonij,*
fed

sed ex Aristotele sumptam interpretationem. Significauit aperte, inquit, Iudicibus rerum si nunc ex lege habentibus regnasse Deum super Hebræos, quia lex dominata esset imperio, & ad regem gentium more translato, Deum non regnaturum, cum non per es-
 legem, sed penes voluntatem unus ho-
 minis summum rerum esset futura. Pro-
 bē. Etenim, ut optime dixit Aristote-
 les in Politicis; Qui legem vult impe-
 rare, Deum vult imperare; Qui Re-
 gem, id est hominem, belluam: quod
 non semper ratione, sed plerumque cu-
 piditate ducatur. Hoc autem arbi-
 trarium regis imperium expressit
 Deus, cum addidit. Filios, & filias,
 & pradia, & seruos vobis auferet, &c.
 Cur igitur Deus abiectum & conque-
 stus fuerit, & cur in Habitionum po-
 pulo regnasse dicatur, cum rationes
 non paucas utraq; res habeat, tūc
 posterior hec vnam satis euidentem.

Nam præcipuæ sunt Regis partes hostem propulsare, tutosq; à vi, & ab iniuria subiectos præstare: quæ munera cum obire Deus consueisset, & non modo præcipuam curam illius populi, sed etiam tutelam quandam propriam suscepisset, propterea fuit hoc regis nomine insignitus, à quo certè Gedeon censuit olim abstinendum, qua reuerentia, & pietate in Deum summa fuit, delatamq; sibi dominationem vltro recusauit; veritus, ne sibi decus illius victoriæ hoc pacto arrogaret, quæ non suo robore parta esset, neq; suis auspicijs, sed ipso Deo iubente, ducente, ac iuuantē. Hac religione adductus sustinere noluit, vt Dominus, atque Rex ipse appellaretur, quod tamen accedente consensu Dei, cuius erat ad hoc eligere, & vocare, cirra vllius noxæ conscientiam permittere poterat, quemadmodum alij postea mul-

si permiserunt haud minori pietate
infignes, & moderatione: qui sanè
& Domini, & Reges cum audirent,
& essent, nihil ereptum se ire Deo
vmquam crediderunt, cui iuris,
quod priùs haberet, nil deperiisset,
cunctaq; integra mansissent, immò
prorsus eadem. Illam verò præci-
puam curam, ac tutelam, cuius cau-
sa potissimum Rex appellabatur, tan-
tum abfuit, vt deponendam Deus e-
xistimaret, vbi Reges optati sunt,
atq; constituti, vt multò propensius
adhuc, & multò studiosius officium
Regis præstaret hostes proffigando:
quod etiam per Samuelem professus
est illicò, vt animos ab ea castigatio-
ne afflictos recrearet, quæ acerbitalis
quàm plurimum visa fuerat habere.
*Non, inquit, Regum I. cap. XII. de-
relinquet Dominus populum suum pro-
pter nomen suum magnum, quia iurauit
Dominus facere vos sibi populum.*

Sed multò deinde sanctiùs hæc Dauidi recepit, cum Nathan prophetâ misit, vt ea nunciaret Regum II. cap. VII. *Et ponam locum populo meo Israel; & plantabo eum, & habitabo cum eo, & non turbabitur amplius, nec addent filij iniquitatis, vt affligant eum, sicut priùs ex die, qua constitui Iudices super populum meum Israel.* Quid ergò Caietanum ad scribendû impulerit; *Populum Israel paruo tempore dignitatem Regni Dei retinuisse; scilicet à Moyse vsq; ad Samuelem; postea autem in Regnum hominis degenerando transiisse;* hoc profecto ignoro. Cõstat enim euidentissimè ex ijs, quæ sunt dicta, imperium, & principatum illum, quem gerebat Deus, nullo tempore, neq; amisisse nec deposuisse; qui etiam Regis optionem ideo sibi Deut. cap. XVI. reseruauit, & quemadmodum consueuerat Iudices deligere, sic & Saulem, & Dauidem

uidem consecrauit Reges, vt æque
hos atq; illos significaret, & obno-
xios, & subiectos habere se perpetuò
velle. Cumq; in bello suscipiendo
semel tantum, aut iterum, quo tem-
pore præsidebant Iudices Reipubli-
cæ, oraculum diuinum consultum le-
gamus cap. I. & XX. (res enim quã-
uis arduæ inciderent, admodumque
ambiguæ, cum ex præscriptione le-
gis, si qua erat, tum ex arbitrio illo-
rum definiebantur, quibus erant per-
misse, ita Deo iubente) frequentissi-
ma tamen in libris Regū occurrunt
eius rei exempla, maximèque insi-
gnia. Nam Saul, & cum sequeretur
Philistæos fugientes Reg. I. cap. XIV
& conserurus extremum prælium,
in quo perijt cap. XXIIIX. Dauid au-
tem consuluisse Deum legitur, & in-
uasurus cum copijs suis Amalechi-
tas cap. XXX. & Regnum initurus
à cede Saul Reg. II. cap. II. & cum
Phi-

Philistæos aggredi statueret cap. V.
 & cum in magna difficultate anno-
 ne versaretur cap. XXI. quinimmò
 solitum id vulgò fieri ex eo potest
 colligi, quòd Achitopheli præbetur
 testimonium eiusmodi cap. XVI.
Consilium Achitophel in diebus illis,
quasi si quis consuleret Dominum.
 Neq; igitur oraculi diuini consulendi
 mos, neq; quod Iudices Deus dili-
 geret, & Reges non item, neq; cu-
 ra illa, quam gerebat, seu tutela præ-
 cipua; quæcunq; tandem rationes
 afferri possunt, cur Deus in Hebræo-
 rum natione regnaret, nullæ sunt, qui-
 bus aliquid horum persuadeatur, aut
 non ita reliquisse locum Reipublicæ,
 quemadmodum regiæ potestati di-
 uinum regimen; aut regnare Deum
 tunc primum desisse, cum Saul pri-
 mus Rex fuit inauguratus; aut nefa-
 rium illud consilium populum cepis-
 se, vt depelleret, atq; extruderet à re-
 gno

gnō suo Deum. Hæc fortasse quia vidit Alphonsus Tostatus acerrimo cum ingenio, tūm iudicio vir, ea Regis optione non id factū ait, ne Deus esset amplius Rex, & supremus dominus, quod fieri nullo modo potuisse affirmat, sed ne proximus ita Rex esset, prout antea fuisset; interiectis nempe, medijsq; Regibus. Quærenti verò de Mose, Iosue, cunctisq; iudicibus, alterutrum profectò esse cōcedendum, aut nullos intercessisse, quod est omnino falsum, aut Regem proximum, ne tūm quidem Deum extitisse: respondet; illos vicariorū tantū loco, non autem summorū Principum censeri oportere: ceterum per hos fieri, non item per illos, ne sit Deus amplius, quod aiunt, Rex immediatus. Enimuerò quis ea ratione summus esse potest, vt nullum habeat superiorem, ne Deum quidē ipsum? Non ne Reges quoq; ipsi
sunt

sunt vicarij Dei, καὶ δυνάκοντες καὶ λειτουργοί. *Et serui & ministri: quod ait D. Paulus ad Rom. cap. XIII. Nam quod ex eis, qui vicariam gerunt potestatem, alij sunt alijs maiores auctoritate, cum pariter indidem pendean, unde ius omne manat, nullum discrimen relinquitur ex hac parte, maiorisq; ac minoris vicarij eadem planè ratio, vt pariter Deus in omnibus, & per omnes regnet. Agnouit hanc rem tandem ipse quoq; auctor cogente veritate, cuius vis est maxima. Nam in cap. VIII. q. XIV. cum aperire vellet, atq; exponere causas, quibus Regis optionē Deus sibi reseruasset, hæc ita scripta reliquit, quæ rem totam continet, Cum, inquit, non permisit eos Regem constituere, sed quod illum solum Regem acciperent, quem ipse eis daret, ostendebat eos sibi omnino subditos, & magis eum illis præsidere quàm præsideret is, quem*

quem in Regem à Deo acceperant. Secundo ad ostendendum potestatem super Regem. Nam si populus sibi ipsi constitueret Regem, videretur Rex supremam potestatem habere, eò quòd non respiceret alium dominum superiorem: cum verò non poterat esse Rex, nisi is, quem Deus in Regem daret, non videbatur ille Rex, sed potius vicarius Regis; quasi Deus esset immediatus Rex illius populi, & qui constitueretur in Regem, gereret vices illius, sicut vicarius; ideo sic fuit conveniens. Habemus igitur ex ijs verbis, quod probare intendimus, iuxta Reges Hebræorū, ac Iudices Dei vicarios fuisse, proindeq; Deum per Reges non exclusum fuisse ab eo, quem vocant principatum immediatum. Nam quod idem Tostatus non semel repetit in caput V l l l. quæst. VII. in caput XII. quæ. XIV. Tantum honoris ademptum ipsi Deo,
quan-

quantum accederet homini, qui Rex crearetur: quid hac de re sentiendū, alij certè viderint. Facile mihi sanè persuaderi patiar, nec de iure, nec de honore Deo quidquam decessisse. Si quid tamen ad honorem diuinum interesse statuitur, quod nullus princeps summus interponi debeat inter populum, qui regatur, nec non Deum ipsum, existimo cum Monarchiæ hoc parum honorificū, tūm vniuersis Rebus pub. longe amplissimum, quarum ad gubernacula qualescunq; sedent, per eos vel duces, vel iudices nihil obftet, quo minus valeat Deus quā proximus esse, hoc est, quemadmodū dicūt, Rex immediatus. Cum aut regimē diuinū hoc habere constet, ut ornet, augeat, atque omnibus numeris absoluat, non verò euertat, imminuat, atq; labefaciat eam Politici principatus vim, ad quam sese adiungit; nihil er

go detrimēti passura est Respublica, si quam Deus eo modo regendā suscipere instituat, quomodo suscepit olim Hebræorum gentē, in qua maiestas diuina cum dominaretur, nihilominus relictum locū ipsi quoq; Reipublicæ & nos permultis rationibus supra demonstrauius, & etiā Tostatus ipse non grauatè fatetur. Si quidem IV. quæst. in cap. VIII. hanc vti præcipuam causam inter omnes memorat, quæ impulerit Israelitas ad Regem petendum; *Causa, inquit, erat, quia videbatur eis indecorum esse, quod cum ipsi essent magnus populus, non haberent Regem. Putabant enim magnum esse honorem populi, & quod priuarentur hoc honore, erat eis graue. E contrario tamen fit, quoniam honorabilior est populus, qui non habet Regem, dum tamen possit aliàs benè regi per quemcumq; politicū principatum, quàm si regem habeat:*

nam

*nam habentes regem quoddam genus
magne subiectionis tolerant; Israeli-
te tamen non attendebat ad hæc. Ex
his autem palam est, atq; apparet
liquidò, cum in præcipua controuer-
sia de optimo principatu, tum in præ-
senti disceptatione de Hebræorum
Republica hunc auctorem neuti-
quam dissentire à nobis, quamvis
fortè prima facie secus videatur: tem-
pora quoq; Mosis, atque Iosue ab
ijs, quæ successerunt, ætatibus ita
eum non secernere, sicuti neq; Ca-
rolus Sigonius, neq; D. Thomas;
tametsi quidam hoc ipsum in discrimen
vocarunt, propterea quòd pote-
stas eorum vtriusq; adeò magna præ
ceteris videatur fuisse, ut accederet
quàm proximè ad dominationem.
Et quidem non nihil Sigonius vide-
tur mutasse. qui cap. I. li. VII. mortuo
Iosue tradit populum Republica à Deo
tradita uti cæpisse. Vt cumque fue-*

rit (id enim parui, aut nihil refert)
res eodem propemodum recidit, vti
planè constat . Satis est enim prius
Rempublicam quam Regnum, diui
no iussu ordnratam, & constitutam
fuisse; & Regni quidem, si vellent,
Hebræis potestatem factam, sed præ
latam Rempublicam tanquam po
riorem; quod Deut. Cap. X. VII.
apertè declarat. Quia verò ab Ægy
ptiaca seruitute vendicandus popu
lus, atque in ea loca necessariò dedu
cendus erat, in quibus domicilia col
locaret, atque sedes suas, ad hæc præ
standa, quæ magna, nec non ardua
erant, & princeps, & dux aliquis il
lis opus erat . Nam Deus in rebus
agendis quanquam vt consilio, sic
etiam adminiculo vlllo numquam
eget, cum solus omnia peragere, ac
perficere valeat; hominum tamen
statuit vti opera, & industria, quibus
agendi facultatem tribuit, atque vi

res adijcit, vt ordinē suo res procedant, ac suum cursum teneant. Moses itaq; vocatus ad ea munera fuerat, quæ quoniam obita morte obire non potuit, excepta sunt à Iosue fortissimo Duce, qui ferocissimas quasque gentes vel accidit, vel domuit, earumque agros, & vrbes in singulas tribus, atque adeò in singulas familias, atque domos tribuit. His autem omnibus confectis cum de vita migrasset, neque ducis opera videretur amplius necessaria, nullus eidem suffectus traditur à Deo, qui vellet, vt ea gens libera, sui que iuris effecta per se Rempublicam gereret, atque administraret, vt homines decet ingenuos, magno, excelsoq; animo, & natos ad imperandū, non ad seruiendum. Quapropter singulæ tribus commemorantur Cap. I libri Iudicum rem per se gessisse, tribu Iudæ auspicante, hostesq; inuadente,

dente, quæ postea sibi conterminã
Simeonis tribum in societatem ad-
sciuit belli, atque victoriæ, quarum
exemplo ceteræ incitatæ, vt propaga-
rent suos fines, omnes arma sumpse-
runt. Et Resp. quidem illa tamdiu
floruit, quamdiu pietatem, & iusti-
tiam coluit ille populus: collapsa
verò sæpenumero propter impietate,
& restituta in integrum Dei benigni-
tate, alijs, atq; alijs iudicijs consti-
tutis, qui principem in ea locum ob-
tineret, multas vicissitudines, atque
ærumnas passa cum execranda flagi-
tia perpetrare aliquando certè inter-
mitteret, sed mox acrius pergeret,
ad Samuelem deniq; peruenit, a quo
fuit extortus Rex assiduo conuicio.
Enim vero Hebræis Regem dari sibi
cupientibus, neq; verò efflagitandi
finem vmquam facientibus, sacræ
litteræ docent, ac testantur, Deum
non modò improbasse, palàmque

L 2 dam-

damnasse, sed etiam omnino execratum id peruersum consilium; & conatum, tametsi frustra, per Samuelem à proposita sententia illos reuocare, percensendo, atq; enumerando incommoda plurima, quibus obnoxij futuri essent sub imperio Regis libr. Regum I. cap. VIII. *Filios, inquit, vestros tollet, & ponet in curribus suis, facietq; sibi equites, & præcursores quadrigarum suarum, & aratores agrorum suorum, & messorum segetum, & fabros armorum, & currum suorum. Filias quoque vestras faciet sibi vnguentarias, & focarias, & panificas. Agros quoque vestros, & vineas, & oliueta optima tollet, & dabit seruis suis. Hæc igitur, & alia multa persecutus est Samuel, vt admoneret Hebræos, ita Deo iubente; ubi res omnes vertuntur in arbitrio vnius, nihil esse facilius, nihil vsitatius, quàm per iniuriam, & scelus hæc impune*

patrentur, quæ grauissima, & acerbissima cunctis accidant: ea verò in benè instituta Rep. vix timenda fore, in qua certè non pauca, neque parua sint, quæ singulos à nefario facinore abstertere possunt, multorumq; adeò ciuium mentes, atq; voluntates non ità facile simul impellantur ad exercendam tyrannidem in subiectos populos. Viderent ergo cuiusmodi rem appeterent, maturèq; prospicerēt, ne tam præposterum consilium imprudenter inirent, quo salutaribus noxia, non tuta seturis, deterioraq; præstantioribus anteponeētur. Huc enim spectat enumeratio illa tot malorum, quæ populum sub regibus passurum vaticinatur propheta. Atque ita intellexerunt eum locum, & explicauerunt egregij rerum diuinarum interpretes, doctoresq; non pauci, quorum testimoniā aliquot adducere, ne videar ex inge-

nio rem fingere, necessarium ducō :
Audiamus igitur D. Thomam Aquina-
tatem prima secundæ Quæst. C V.
art. I. argumento primo ita respon-
dentem . *Dicendum , quod Regnum
est optimum regimen populi , qua ra-
tione cēseat optimum regimen, iam
fuit explicatum , si non corrumpatur .
Sed propter magnam potestatem , quæ
Regi conceditur , de facili regimen de-
generat in tyrannidem, nisi sit perfectæ
virtus eius, cui talis potestas concedi-
tur . Perfectæ autem virtus in paucis
inuenitur; & præcipue Iudæi crudeles
erant , & ad auaritiam proni, per quæ
vitia maximè homines in tyrannidem
decidunt : & ideo Dominus à principio
eis Regem non instituit cum plena pote-
state, sed iudicem, & gubernatorem in
eorum custodiam; sed postea Regem ad-
petitionem populi quasi indignatus con-
cessit , ut patet per hoc , quod dixit ad
Samuelem . Primo Regum VIII. Non*

*te abiecerunt, sed me, ne regnem
super eos. Quid autem sibi velint hæc
diuina verba, datus est supra copio-
sè differendi locus. Quod attinet ad
rem præsentem, D. Thomam con-
stat eodem planè retulisse illa, quò
D. Gregorius, ut non magis expo-
stulatio fuerit, quàm prædictio. Nā
libr. III. Expositionum in primum
Regum, his ferè verbis concludit ca-
pitulum primum. Et illi quidem
(Israelitæ) contra Domini volunta-
tem Regem petierunt: sed à Regia di-
gnitate postea actum est, ut populus,
qui eum abiecerat, idola coleret, si-
mulacra adoraret. Mox paucis inter-
iectis. Meritò igitur se abiectum Do-
minus in regis petitione conqueritur:
meritò regiam dignitatem concedit in-
dignatus. Tanta quidem erat iniqui-
tas postulantium, ut cum illud pete-
rent, per quod à Deo recederent, ex Dei
iudicio permitti posset, prohiberi nō pos-*

set. Ex ijs apparet Regum suorum vitio, multò facilius, atq; citius à Deo desciuisse, quàm sua sponte videretur facturus Hebræorum populus: atq; hoc esse, quod iam abiectū se Deus ipse ducit. Alphonsus autē Tostatus scriptor peregregius, q. IX. in cap. hoc ipsum VIII. hæc litteris consignare minime fuit veritus. *Nul-
lus principatus quantum ad hoc est ma-
gis oppressivus subditorum, quàm rega-
lis, siue Monarchicus, qui subito verti
potest in tyrannidem; & hoc malum
illius significavit hic Deus, dissuadendo
Israelitis hunc principatum, scilicet
quod Rex decimaret greges eorum, &
armenta &c. Et paucis interiectis ita
pergit. Et ita dicendum, quod princi-
patus regalis pro regnante est aliquid
valdè honorabile, sed pro subditis est
aliquid valde onerosum, & minus eli-
gibile, quàm alià genera principatum.
Cum autem hoc administratio ciui-
lis*

lis integra distet à corrupta, quemadmodum in politicis est sancitū; quod illa populi ad fructum, cuius causa instituta, hæc ad commodum impetrantis præcipuè refertur: ex his necessario colligitur, Monarchiæ præstantiam adulterinum quid olere magis, quàm legitimum. Sed quæ superius commemorata sunt, atque examinata, eadem ingerere, ac repetere nihil est necesse. Nunc enim propositum est nobis demonstrare; Regnum degenerare faciliè in tyrannidem, idq; auctoritate diuina comprobari: quas in res cùm DD. Thomæ, atq; Gregorij, tùm verò Alphō si testimonium, ac sententiam lumpsimus. Adiungam illis postremò Guilielmum Barclaium libr. II. qui tamen non sentit idem de præstantia Reipub. nihilominus hæc à Samuele dicta non semel fatetur, vt à petitione Regis deterreret populum, iuraq;

raq; regis , seu regni legem eandem
 appellatam, vt quid à Rege fieri pos
 sit, omnibus pateretur, cum faciliè
 atq; expeditè, tum impunè, ac tutò;
 quippe qui nullam pœnam reformi
 det, nullum vindicem horreat. Fuit
 igitur *παμβασιλεία* *plenum regnum*
 eo loco descripta, in quo sunt omnia
 permissa quàm solutissima Regi, vt
 quidquid sibi libeat, id peragere va
 leat. Et quidem talem cum petierint
 Regem Israelitæ, qualem tum cete
 ri populi, atq; gentes haberent, ap
 paret eos genus regni illud exo
 ptasse, de quo Arist. ita scribit. III Po.
 πῆμπτον δ' εἶδος βασιλείας, ὅταν ᾖ
 πάντων κύριος εἰς ἓν, ὥσπερ ἑκάστον
 ἔθνος, & πόλις ἑκάστη τῇ κοινῶν τεταγ
 μένη ἢ τὴν οἰκονομικῶν. *Quintum*
genus Regni est, cum in unius potesta
te sunt omnia, veluti gens, & ciuitas
unaquaq; in qua communes res ordina
tæ sunt ad exemplum, & rationem ite
lam,

lam, qua familia regitur. Eiusmodi
verò genus Regni, siue Monarchiæ
ab Aristotele quondam meritò im-
probatum, qua in re cum diuina hi-
storia perbellè consentit, quamuis
antiquis temporibus fuerit peruulga-
tum, cunctisq; gentibus, & nationi-
bus vbique commune; nunc tamen
barbaris tantum populis relictum,
in Christiana Rep. vix, aut ne vix
quidem, nisi ratio me fallit, locum
habet. Sunt enim Christiani Prin-
cipes legibus adstricti, in quas conce-
ptis verbis etiam multi iurant: quo
fit, vt regimen eorum plus quidem,
minusue pro diuersis locorum, & ho-
minum ingenijs, sed tamen aliquid
habeat ex ratione Reip. cum regia
potestate cōiunctum, & consociatū.
His igitur cū de prisca Hebræorū
Republica, tū de labe, atque vitio,
quo regna facillè laborant, vel ex au-
toritate sacrarum litterarum, vel ex
au-

auctorum grauiſſimorum testi-
nio dictis; illud quoq; monendum;
atq; vrgendum superest, ita illum
ad proxima gradum per nos primò
iactum, vt eo conuulso, quod tamē
agile fieri poterit; verumtamen si
quo modo fiat, vt labefactetur, neu-
tquam certē futurum existimemus,
vt cetera tanquam superinducta è ve-
ſtigio corruant. Faciamus enim Ca-
ietani veram fore ſententiam, vt à
Dei regno & gubernatione discede-
re Hebrēi, & ad hominis vnus arbi-
trium se applicare voluerint; ſiqui-
dem expoſtulationi diuinæ ſua uis
item conſtat, quemadmodum con-
ſtare neceſſariò oportet, vtique argu-
menta iam dicta pariter conſtabunt,
de propēſiſſima inclinatione Monar-
chiæ ad vitium, futurorumq; malo-
rum enumerationi nihil obſtabit;
quin ſit eadem ſententia ſubiecta;
ex humanis videlicet politijs, quod
eſſet

esset omnium deterrimum, Hebræos
exoptasse, diuinæq; gubernationi
prætulisse, ad extremum, summumq;
amentie declinantes. Quamuis .n.
præ cœlestibus, ac diuinis rebus neq;
perfecta, neque pulcra multum hu-
mana sunt omnia; vt à reprehensio-
ne vacui futuri non fuerint, etiam si
Aristocratiam tunc expetiuisent,
imperio, siue regno Dei temerè ne-
glecto: nihilominus tam acerbè, opi-
nor, non fuissent increpiti: tam cer-
tè facilè tot in mala non incurrisent,
quot expressa, recensitaque eo loco
singulatim legimus. Quo fit, vt quā
quis opinionem tueatur, & quoquo
modo res administratę in ea gente
fuerint, non tamen efficere, aut nega-
re valeat, *παμβασιλείαν* *plenum re-*
gnum diuina sententia notatam, vt
omnium maximè corruptioni obno-
xiam, fuisse. Hoc autem nomine im-
probatam Aristocratiam, quid mi-
rum

rum fuerit in sacris litteris non tradi, quippe in qua vitium idem non tam facilè hæerere cùm ratio multiplex suadet, tùm res ipsa testatur? Sed his de rebus iam satis, vel nimis multa.

Quinque præcipuæ conditiones optimi imperij, & aliæ quædam cum ijs connexæ, atq; implicite exactè perpenduntur, & examinantur, & non minùs Aristocratice, quàm Regno conuenire ostenduntur. Quæ contrà dissertunt aduersarij, cuncta refelluntur. Summa totius disputationis, atq; brevis Epilogus.

CAPVT SEXTVM.

EXaminemus tandem, atq; excutiamus, quas optimo solent imperio conditiones tribuere, sed inesse Monarchiæ tantummodo, aut maxime putant. Harum prima est ordo, quem docent cõstare posse inter maiores, atq; minores, non inter æquales. Altera est pax, concordia, & cõ-
iunctio

iunctio ciuium, quam vigere potissimum perhibet in vnius imperio. Tertia, robur, opes, & potentia: potentiorum autem, robustiorumque esse Monarchiam, quam vllam Rempublicam. Quarta stabilitas imperij ex diuturnitate: regna verò quam diutissimè statum suum retinere. Argumento fore monarchiam summam Assyriorum, quæ steterit supra mille, & ducentos annos: sed præterea id ratione quoque persuaderi. Nam eò difficilior distrahi, atq; dissolui, quò magis vnum fuerit vnūquodq;. Porro magis vnum oportere vnum hominem esse, quam multitudinem in vnum conspirantem. Vltima cōditio est gubernationis facilitas, quā probant his argumentis esse in Monarchia. Primò, quia facilius est inuenire vnum hominem probum, & sapientem, quam multos. Secundò, quia publica negocia negligi solent
à fin-

à singulis, tanquam aliena . Tertio, quia cum gerendi magistratus peritia comparata est, eo tempore magistratu abire oportet . Postremò, quia videtur vix fieri posse, vt à Rebus publicis absint contentiones, & rixæ, & concertationes, quæ facilitè oriuntur in summa licentia cùm ex alijs prauis cupiditatibus, tùm ex ambitione . Hæ sunt quinque conditiones à summis viris propositæ ; quæ omnes si Aristocratia minime deesse, immò plerq; poterunt à nobis ostendi in eandem magis conuenire, quàm in Monarchiam, nec obscura, nec ambigua res futura est amplius . In primis igitur ordo, siue τάξις, quæ in definienda administratione ciuili statuitur, vt genus, quomodo abesse potest ab Aristocratia, quæ præcipua cēsetur eiusdem forma ? Certum quidem est inter pares ordinem non esse, vbi manent omninò pares, atq;

in

in omne tempus : Sed qui per vices imperant, atque parent, hac ratione fiunt impares, hoc est maiores, & minores; & hæc imperij communio, & vicissitudo mirificè cum natura consentit, vt superiùs probaui. Consentiet igitur & is ordo, qui manat ex ipsa . Pax deinde, coniunctio, & concordia ciuium sita est multò magis iniuris æquabilitate, & equa horum distributione inter optimos quosq; , quàm si quis vnus in rebus publicis cuncta sibi vendicet, & imperia non nisi quibus ipse velit, malignèq; tribuat, adempturus etiam facilè, quandocunq; libeat ; si quidem pendent res omnes ex ipsius arbitrio: cum tamen ea, quæ conferuntur per liberos populos, & munera, & ornamenta, & honorum insignia, perpetuò manere soleant ijs rata, atque fixa, quibus collata fuerint; neque hæc ipsa tantum, verum etiam

benemeritis omnibus de Republica singula vel promissa, vel tributa præmia. Quæ certè res quanti valeat, non est obscurum ad exterorum pariter, ac ciuium demerēdos animos, stabiliendosq; in Reipublicæ caritate. Quid verò pacta, foedera, iura societatis? nonne (quod apud omnes est in cōfesso) quàm sanctissimè, constantissimèq; coli possunt, tam maximè coluntur à liberis ciuitatibus? Habitura est itaque semper Aristocratia satis multa, cum domestica, tùm externa præsidia ad omnes temporū casus, & ad rerū discrimina iampridem comparata, atq; prompta sibi, quibus egregiè instructa, & probè munita neq; timere multum poterit intestina discidia, neq; reformidare, si qua uis inferatur extrinsecus. Quod vero spectat ad rerum gestarum amplitudinem, cur ijs maior, florentiorq; Monarchia, quàm reipu-

Respublicæ videantur, equidem non video. Nam Lacedæmoniorum, & Atheniensium maxime res gestæ; Carthaginenses bellicosissimi, potentissimiq; fuerunt; & priusquam ciuilibus armis opprimeretur, Romana Resp. latissimè imperium protulit, tantumq; bellicę laudis sibi comparauit, quantum nulla florentissima Regna vnquam sunt adepta. Nullum verò est administrationis ciuilis tam abiectum genus, in quò non sit aliqua facultas, aliquod præsidium; & conseruandi res proprias ab illata vi, & si res ferat, inuadendi etiam alienas. Quamuis hanc rem Aristoteles Polit. lib. VII. non ita magni faciat, & latius imperij propagandi studium magis damnet, quàm laudet: qua de re disputandi non est hic locus. Satis est nobis rerum bellicarum gloriam huic magis, quàm illi administrationi ciuili

non esse propriam, sed omnibus cōmunem, & in medio positam; neq; verò infixam, neq; innatā ipsis, sed adiunctam extrinsecus. Obijciētib; autem liberas ciuitates, & liberos populos, si fortè seditio, aut graue bellum immineret, ad imperium vnus confugere solitos, siue Archōtis, siue Harmostæ, siue Dictatoris; respondendum erit, vniuersam rationem imperij gerendi contineri duabus rebus, atq; omninò absolui, deliberando nimirum, ac exequendo: illud autem non modò caput esse rerum gerendarum, sed etiam præcipuam imperij vim sibi vindicare; hoc obsequendi primum, atq; adeò parendi; eatenus quoq; imperandi partes sustinere, quatenus prius illud spectat, vnde totum pendet; peculiarem verò consultandi, & prudētię laudem, quemadmodum fuit expositum, esse Rerum publicarum.

Quan-

Quantum ergò vnius auctoritatem ad res exequendas, tantum conferre grauissima optimatum consilia ad capiendas deliberationes, nec non iudicandum. Nam Regibus quoq; prudentia vel insigni præditis adhibendos in consilium viros prudentissimos; quod certè Reipublicæ quandam speciem habet: idcirco nihil mirum videri oportere, si quis attribuaturs vsus Monarchiæ ijs obeundis, ac peragendis, quæ decreta fuerint. Res omnes ita profectò natura se habere, vt ope mutua indigeant, atq; societate. *Nullum est genus rerum,* inquit in III. de oratore M. T., *quod aut auulsam à ceteris per se ipsum constare, aut quo cetera si careant, vim suam, atque aeternitatem conseruare possint.* Itaq; post consultationes, ac deliberationes, in quibus elucescit ipsa imperij maiestas, Dux aliquis diligendus spectatæ fidei, cui

mandetur prouincia, aut negotium gerendum. Nam pluribus idem cōmittere est perniciosissimum, præsertim æquato imperio, atq; potestate: neq; aliud certè sibi vult decantatū illud Iliad. B.

οὐκ ἀγαθὸν πολυκοιρανίη. ἔς κόιρα,
- vos ἔσω.

ἔς βασιλεύς.

*Multos dominari non expedit; Vnus
est dominus,*

Vnus esto Rex.

Quippe sunt variæ, discrepantesq; hominum sententiæ, sūt cuiq; sua studia; & pro insita cupiditate, qua facilè ducitur, non sēper habet idē propositum, sed alia, atq; alia: eius autem, quem parem, & equalem putat, acquiescere consilijs vel optimis sibi turpe ducit; immò sæpe, ne minus sapere videatur, contraria iubendo, rerum gerendarū cursum interturbat. Quibus incommodis, atque

que malis vt obuiam eatur, si quod consilium maturè fuerit exequendū, præstabit eximia virtute, & fide aliquem deligere, qui summo imperio præsit, & omnia moderetur. Id nihil officiet Reip. benè constitutę, præsertim quæ non diuturna imperia, sed ad tempus tribuit; & certa quadam ratione temperata, non imensa, & libera. Si quis autem etiam hoc putat non abesse à periculo, is velim consideret, nihil in rebus humanis adeò tutum esse, quin aliquid suspicionis, & timoris habeat. Regibus etiam ipsis hoc verèdum fore, ne à se deficient constituti Proreges, ac duces: illud etiam magnopere formidandum, ne sua consilia prodantur hostibus per eos, quibuscum oīa conferre necesse habent. Non enim minus in Regno, quàm in Rep. possunt aliqui largitione corūpi, & ab alijs emi, & quidquid Lipsius Moni

tò V. dicat, venale nihil nō habetur, dummodo sit, qui velit impendere sumptus, & laborem. Sed his omis- sis ad reliqua pergamus. Quarta præstantissimi regiminis conditio diuturnitas erat, quam Monarchiæ potissimùm Lipsius Mon. VI. suffra- gio suo defert: ipsius enim hoc moni- nitum; *Maximè hanc imperij formã diurnare.* Quin diuturnitas argu- mento sit præstantiæ, dubitari non debet: non tamen vsq; quaq; sed ex parte quadam: alioqui cerui, cor- nices, multęque adeò stirpes, quæ lōgius vitã suã producūt, quã hoīes, longè præstarent ipsis, qua re quid absurdus? Veruntamen cum satis, superque disputatum fuerit, & ratio- nibus firmissimis comprobatū, opti- mē constitutas Aristocracias de suo statū non ita facilē declinare, vt re- gna; ex his oportet fieri, vt diu- tius vigeāt, & longius omnem vim

fe-

ferāt quasi ingrauescētis etatis. Neq;
verò his rationibus exēpla sua desūt.
Nam de Rep. VENETA res est in
comperto, neq; vel Lipsius ipse refra
gari audet: Bodinus tamen contra
nescio quid obgānijt, cuius ineptias
alibi confutauimus. Quid? Quod
Lipsius hoc ipsum de nonnullis prę
dicat, quas nominatim non expri
mit, paruas tantum vocat, *validiorū
tuitione, aut amicitia firmas*. At exem
pladiūturnitati Monarchiæ adstruē
dæ per eūdē adducta, neq; apta, neq;
sincera, neque certa sunt; inclina
rint ne ad tyrannidem, quàm ad re
gnum verius: & licet historiarum
magna sit varietas, vt Perse tamen,
ita Medi comperiūtur paulò plus an
nis ducentis imperio potiti, cum ip
sa Romana Resp. plures quadringē
tis, & Spartana quingentis admo
dum viguerint. Assyriorum autem
res gestę fabulosæ sunt, & fateri co

gimur, nisi si diuinis litteris minorem fidem habemus, quam Ctesie Gnidi fabellis, vnde ceteri hausere, potentissimos maximosque Reges Assyriorum, quales imperium aut Ninuiticum, aut Babylonicum tenuisse legimus, ante Dauidis Regis tempora nullos extitisse. Nam Sobæ reges, quo nomine sacra Biblia eos vocant, Iosephus autem in antiquitatibus lib. VII. cap. V. & VI. appellat Sophenæ, quæ Strabone teste li. XI. maioris Armeniæ pars est, inter Antitaurum, atq; Taurum vltra Euphratem sita; huius inquam regionis opulentissimi, ac florentissimi reges in Mesopotamia latissimè tunc dominabatur, quando ibi David Rex. multa bella gessit, diuinaque ope adiutus prosperè confecit, non semel eorum copijs scèdè profligatis, imperij quoque sui finibus ita propagatis, vt Euphratem traiceret, atq; hostes in-

intri-

intima claustra regni compelleret fugientes, ut est in li. Reg. II. cap. VIII. & X. Paralip. cap. XII. & XIX. Sed hæc, & multò plura cõplecteretur nostra disputatio de quatuor Monarchijs Danielis aduersus Bodinum. Ratiocinatio illa modò examinanda, quæ colligit diuturnitatem ex maiore vnitate. Sed quanam ratione imperium vnus dicunt vnus? Vtrum, quia nihil habet insitum, quod ab eo seiungi, nullasque partes continet, quæ diuelli possint? An quia licet ex partibus multis constet, eę tamen referuntur oēs ad vnum aliquid? Priori modo *Vnum* sonat idem, quod indiuisibile: sed hoc vix in aliud cadit, quàm in ipsum Deum. Nam cetera omnia sunt coagmentata ex pluribus partibus, si non quantis, aut Phisicis, saltem Metaphisicis. Altero vero modo si sumatur *Vnum*, notabit quendam

dam cumulum, seu coaceruationem; in scholis vocant vnitatem aggregationis; qua dici non potest Regnum magis vnum, quàm Respublica. Si quidem omnia tendunt ad vnū utroque; non certè ad vnum quid solitarium, atq; singulare, cuiusmodi est persona vnius Regis, atque summi Principis; alioqui duo, velint, nolint coguntur admittere; Alterum nihil esse in Regno constantiæ, nihil firmitatis, siquidem status eius, atq; tota vis aliunde non pender, quàm ex vnius hominis incerta, fragiliq; vita, vicissitudinibus, ac periculis tot, tantibusq; obnoxia: Alterum nihil amplius superesse discriminis, quo Regnum à tyrannide secernatur; si non ad aliquid commune, verum ad imperantē primò, ac per se referenda illius quoq; ratio. Non est ergò vnitas ciuilis administrationis ex ijs, qui rebus præfunt, vnquā æsti-

æstimanda (nam plures, an vnus præsit, nihil planè refert) sed ex fine, ordineque ciuili spectari debet, sine quo regimen planè nullum potest esse: quo fit, ut optimo iure ordo ipse ponatur in administrationis ciuilibus definitione. Continet is præcipuè, atq; adeò deuincit imperantes, atque parentes mutuo quodam nexu; singula quoq; membra, siue partes, eò minus dissociandas, atq; distrahendas, quò arctiùs inter se coierint colligatæ, & cõiunctæ. Hoc igitur aduersarijs probandum fuerat vsu venire, potius in Regno, quàm Aristocratia; & hac ratione maior adstruenda vnitas, nō autem ex imperantis singulari persona. Veruntamen ad hoc expeditum, atque obuium sunt propterea delapsi, quāuis ad vnitatem probandam nihil prorsus faceret, quia prius illud statuere facilè non erat. Nam cum ita

natura comparatum sit, vt non eadem constantia, neq; caritate res alienas, atq; nostras propugnemus: quis non videt vniuersos ordines, & singulos ciues, alacritatis ad pericula quæq; propulsanda, concordieque ad imperium tuendum eò plus allatu-
 tuos, quò magis eius participes, atque compòtes fuerint? Ad hæc opus quodcumque magnum, ac difficile, cuiusmodi nulli dubium, quin sit imperare, multò commodius, quàm vnus, plures moliuntur, multòque plus omnes uirium in comune conferunt ad onera grauissima omnia sustinenda, quibus vnus par esse non nisi egrè posset. Aristotelis quidem lib. III. Politic. sententia hæc memoratu digna.

ἀλλὰ μὴν ὁ δὲ ῥαδιον ἐφορᾶν τὸν ἐνα-
 δεήσει ἄρα πλείονας εἶναι τοὺς ὑπ' αὐ-
 τῷ καθισμένους ἄρχοντας· ὥς τε τὸ
 διαφέρει τοῦτο ἐξ ἀρχῆς εὐδύς ὑπάρ-
 χει,

χειν, ἢ τὸν ἕνα κατασῆσαι τοῦτο ὁ
τρόπος. *Verū tamen quia unus omnia
intueri nequit, plures ab eo principes
cōstitui oportebit. Quid igitur interest,
vtrum statim id initio fiat, an unus
Princeps hac statuatur conditione?*
Quandoquidem vtrolibet modo fie-
ri non potest, quin ab vno res pen-
deat summo principatu. Exigit au-
tem ratio, vt is rectius administret;
qui propriam, atque legitimam ge-
rit potestatem, quàm qui precariam
ex alterius incertissimo arbitrio. Qui
cunq; porrò Monarchiam vsque eò
protendunt, vt nihil accidere posse
opportuniùs prædicent, quàm si om-
nia simul & Rerump. & regnorum
iura in vnum supremum principem
transferantur, cuius imperio conti-
neantur omnes gentes; vbicunque
sedem fixerint huic suo Imperatori,
siue in Italia, siue in Gallia, siue in
Hispania, non video, quibus ratio-
nibus

nibus persuadeant fore, vt extremis orientis prouincijs ille meliùs consulat, quàm proprij Reges, atq; Principes singularum regionum, qui assiduè, iugiterq; rebus omnibus intersunt non modo αὐτόπται, ἐπίκουροι, συνεργοί, coràm inspectores, adiutores, administri, verum etiam moderatores, supremiq; arbitri, vt nihil opus sit aliena edicta, atq; iussa ex disiunctissimis, atq; remotissimis locis præstolari. Sed ad prius institutum nostrum redeamus. Ostendimus, in quo sita ea vis vnitatis, quæ ciuilem quamque societatem ornat, ac tuetur, stabilitque ad longissimi temporis diuturnitatem. Nam quod est vnum, hoc est vnicū, atq; solitarium, id imbecillius, ac proinde minus diuturnum: quæ verò connexa inuicem, compactaque sunt, tantò plus habent roboris, atq; firmitatis, quantò validior est colligatio,

gatio, atq; partium nexus. Talis est Reipublicę VENETÆ constitutio ex optimis quibusque rationibus ita temperatæ, vt apta, & convenientia inter se omnia consent. Hinc mirificus ille consensus omnium ciuium in eadem tuenda, qui nullis hætenus diffidijs, atque seditionibus, nullis hostium vel conatibus, vel insidijs labefactari vnquam potuit. Et quemadmodum stabilis permanet adhæc vsq; tempora, ita Deo propitio, ac volente perstabit in posterum, durabitq; ad multas ætates florens omnibus copijs. Examinanda modò superest vltima conditio, gubernationis facilitas, hoc est expedita ratio. Sed priusquàm diluantur obiecta, quę superius adduximus, refellenda quędam argumentatio ab Isocrate in Nicocle sumpta, cuius hæc ipsa sunt verba de Monarchia. καὶ πρᾶοτέρων τοσούτω, καὶ

N διναια-

δικαιοτέραν δικαίως ἂν αὐτῶν εἶναι
 κρίνομεν, ὅσω περ ῥᾶόν ἐστιν ἀνδρὸς
 ἐνὸς γνώμη προσέχειν ὅρ νοῦν μᾶλλον,
 ἢ πολλὰς παντοδαπὰς διανοίας
 ζητεῖν ἀρεσκέν. *Eò ipsam faciliorem,*
& equiorem iure censuerimus, quò fa-
cilius est accommodare mentem ad u-
nus viri sententiam, quàm conari
multis, atq; multiplicibus ingenijs pla-
cere. Hæc ratio non magis ad faci-
 litatem pertinet, quàm ad vnitatē;
 sed non minùs est fallax, quàm supe-
 rior altera. Pluribus enim, quate-
 nus plures, ac diuersi sunt, inserui-
 re admodum difficile; neq; aliud si-
 bi vult illud in Euangelio Matthæi
 cap. VI. *Nemo potest duobus dominis*
seruire, nimirum dissentientibus,
 & contraria iubentibus. Quid verò
 si contraria non iubeant, sed probè
 consentiant, & in vnum conspirent
 omnes, vt par est, optimates? Vnū
 quidem corpus est Reipublicæ benè

constitutę: vnitas porrò sumi debet à fine, & à forma, non ab agente, neq; à materia, ut Philosophi docent. Cum verò in optimum, atq; rectum multitudo conspirans, (ut non magis ex Aristotelis sententia, quàm ex ipsa veritate definitum est) multò minus fraudibus pateat, atq; corruptelis, quàm mens vnus hominis, commodè possumus aduersariorum tela in ipsos conuertere, quandoquidem magis expeditum, atque tutum est, obtemperare vni Reipub. rectè sentienti, cuius æquissima, & grauissima solent esse decreta, quàm vnus hominis voluntati, atque arbitrio subijci, quod nullo negotio huc, atque illuc impelli potest, & multis occasionibus deprauari quantumuis rectum. His tanquam subsidijs aduersariorum fortiter reiectis, aggrediamur eos rectà, qui differere audent, facilius ab vno,

quā à multis id imperij onus, quod Ætna grauius existimatur, sustineri posse. Certè Moyses vir præstantissimus diuino præsidio fultus, egregijs-
 que ornamētis plurimis instructus, huic nequando succumberet, tamen verebatur; ideòque sibi munus impositū populi regendi, priusquàm cōstitueretur Hebræorum Resp. obire cum desperaret solus, tandem recu-
 sauit. *Cur afflixisti* exclamabat ac Deum Num.cap.XI. *seruum tuum? Quare non inuenio gratiam coram te? Et cur imposuisti pondus vniuersi populi huius super me.* Et mox *Non possum solus sustinere omnem hunc populum, quia gravis mihi est.* Vtrum in eo Moyses aliquid peccarit, quod visus fuerit aliquantulum diuinę sapiētię diffidere, unde multę latis illi vires suppeditabantur, temerè, atq; inconsultè iudicare nolim: arguit certè id summam quandam rei difficultatem,

tem, vt nisi præcipuam opem Deus ipse ferat, immò etiam si ferat, atque eo planè modo, quo Mosi adesse cōsueuerat populum regenti; tamen difficile, & graue ad huc opus videatur, vnum hominem prout decet, omnia rectè moderari. Ideoq; Deū obsecutum Mosi præcepisse legimus, vt septuaginta viri diligerentur, vt ætate, sic etiam vsu rerum maximo præstantes; *Vt sustentet, inquit, tecū onus populi, & non tu solus graueris.* Quo fit, ut auctoritatem Isocratis nihil morer, aut si qui alij gubernationis facilitatem Monarchiæ tribuūt. Neq; verò me Augusti factum, aut consilium mouet, qui audita disputatione benè longa amicorum non idem sentientium, atq; suadentium, Monarchiam, quam gerebat, statuit retinere. Assueuerat enim iam pridem vnus imperare; quare non nisi grauatè poterat imperium deponere.

rè, & fortasse minime tutum id existimabat. Alij quorum gratia scribebant, auribus plurima dederunt, & non protulerunt ex animo, quid verè sentirent. Nam quod vrgent quidam, maioris negocij fore, eximia prudentia plures inuenire, quàm vnum: certè constat longè faciliùs, multa mediocria, quàm vñ aliquid numeris omnibus absolutum, quodque diuinum sit potius, quàm humanum, reperiri posse. Si vnus tantum præfuerit, opus eidem fore exquisitissima prudentia, summaq; virtute; sic enim omnes Philosophi rem concludunt: mediocritatem porrò sufficere in Rebuspublicis, vbi alter alterius ope plurimum iuuatur, mutuaq; cum prudentia, tum industria sese ingenia exacuunt. Dicer vtiq; hic aliquis, etiam summo Principi non defuturos prudentes cōsiliarios, quorum fideli opera commodè vti queat.

queat . Atqui sapientissimus Rex quidam prædicare solebat, instar cōspiciliorum regibus esse consultores: veruntamen inter reges, valdè fore miserum, cui nisi adhibitis conspici-
lijs cernere non detur . Præterea sūt repetenda , & reuocanda in memo-
riam , quæ superius dicta fuerunt , atq; comprobata ; vt puta, hominū præstantissimorum penuriam adhuc rudi seculo, instituendæ Monarchiæ primum causam præbuisse , Reipublicæ verò postmodum magnā eorum copiam : hanc excellenti naturæ hominum conuenire quàm maximè ; illam naturæ imbecillitatem, & vitium arguere : postremò , si res pro votis succedere debeat , magis optandum, quod deceat magis, atq; expediat, vt multi per quàm insigni virtute, & ingenio , & non vnus vir tantum sit vbiq; gentium: sin autem quod est magis parabile immò ha-

betur ad manum, contenti sumus hoc inuento, nec amplius requirimus; multò plus ingenij, & virtutis pluribus, quàm vni à summa Dei sapientia tributum videmus. Atq; ut vnum posse aliquando existere faciamus, in quem collata fuerint vbertim, immò copiosissimè vniuersa ornamenta corporis, atq; animi, quorum gratia dignissimus sit imperio; tamen is aut latere potest, aut iacere despectus; aut saltem destitutus ijs viribus, atque opibus, quæ necessariae sunt ad comparandum imperium: & si eò fastigij perueniat, fieri nullo modo potest, quin exiguo curriculo eius vita definita sit, & qualemcunq; fors dederit, habere successorem oporteat: cum tamen optimorum ciuium pari virtute, & industria, ijsdemq; prorsus institutis continuare Respublicam immortales quodammodo haberi possint.

Quod

Quod autem quidam ex aduersarijs
vereri sese aiunt, ne publicę res à plu-
ribus negligentur, & habeantur eo
loco, quo sunt alienę: hoc minime ca-
det in optimā Rempublicam; quin-
immò ratio ipsa docet, atq; expe-
rientia, homines liberos multò lau-
dis appetentiores, & ad præclara fa-
cinora promptiores euadere, propte-
rea quod amplitudini suę, atque di-
gnitati, non alienę sese intelligunt
nauare suam operam, & ferere, quod
ipsi metant opportunè, non alij. Qui
bus rebus vehementer illos inflam-
mari oportet, & ad publica münera
probè, decenterq; obeunda singula-
rem animi fortitudinem, & constan-
tiam afferre. Si quid porrò habent
vitiij annui magistratus, id aut ali-
qua temporis prorogatione, aut ite-
rata electione tolli facillè potest, quę
admodum V E N E T I I S fieri cõ-
suevit, vbi triplex Collegium qua-
dra-

draginta virale, quò sunt à magistratibus minoribus prouocationes, biennium iuri dicundo ea ratione impendit, ut bis octonos menses vacet ciuilibus rebus, primum quidem prouinciabilibus, deinde verò urbanis; postremos tandem quæstionibus capitalibus tribuat: quin etiam iterare hoc muneris, quoties libet, datur, non tamen cõtribuare sine intermissione. Tale quid vix concedi solet, præterquam Senatoribus, ea tamen lege, ut quotannis iteretur electio, subiiciaturque singuli ciuium suffragijs, quod in maioribus comitijs fieri consuevit. Quod attinet ad contentiones, atque simultates, præter ea, quæ superius dicta multa sunt, vigilandum erit omnibus ijs, qui præsunt Reipublicæ, ne quid accipiat hinc mali, atque detrimenti. Quin inter ciues dissensiones aliquando oriantur, equidem vix, ac ne vix quidem fieri posse

posse existimo : sed ipsarum discordiarum semina subito tollenda , ne qua labe alios attingat , dum permanant latius . Quare sapientissimè V E N E T I I S institutum videmus , si quæ intercedant concertationum causæ inter aliquos ciues , vt statim atque summi Decemuirum præfides rescuerint , edicant , ne partes ante domo pedem efferant , quam ipsius Magistratus amplissimi auctoritate interposita , sibi inutuas offensas condonent , atque in gratiam redeant . Ita verò contentionibus cunctis facile sopitis , id V E N E T A Respub. consecuta est , quod hætenus non memoratur vlli contigisse alteri , vt à ciuilibus seditionibus libera , atque tuta , supra mille ducentos propè annos tranquillissimè exegerit . Itaque non desunt , neque deerunt vniquam sapientissimis viris , cuiusmodi sunt non tantum no-

mine, sed re ipsa ægros optimi cum
seditiones, & turbas omnes compe-
scendi egregiæ rationes, tum corri-
gendi, si non penitus euellendi ea vi-
tia, quæ rebus omnibus humanis
permessa sunt ad hærescere, vt cuncti
disceremus eas non magni facere,
nostraque studia, & conatus conuer-
teremus ab hisce terrenis, & cadu-
cis, quæ non sunt integra, & perfe-
cta, ad æterna, & cœlestia quàm ab-
solutissima. Sed omnibus incom-
modis, & vitijs Aristocratiam eui-
dentissimis argumentis ostēdisse me
arbitror obnoxiam multò minus,
quàm Monarchiam, & propter mul-
tas, & magnas utilitates magis ex-
petendam, atque vtī naturæ magis
congruam iure præferendam. Obie-
ctiones, siue rationes aduersariorum
apta responsione, ni fallor, omnes
confutatae sunt, aut certè potissima
fundamēta labefactata, quibus Mo-
nar-

narchia niti maximè videbatur. Si
qua fortè prætermiffa, aut elapfa è
memoria, hæc aut non ita magni
momenti funt, aut quàm facillimè
poterunt ex dictis retelli.


FINIS.





Patauij ex Typographia Lau-
rentij Pasquati. 1611.

Superiorum Permissu.



of the paper as shown
and the plate

Figure 1. (continued)





SPECIAL

92-

B21737

THE GETTY CENTER
LIBRARY

